

JNUHUN VAHA NI TEE SAN MATEO

Lista ñayuu yucūn jeē ní quiji Jesucristo

(Lc. 3.23-38)

¹ Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. ³ Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xihna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹ Te Uzías ni cuu de tátá Jotam, te Jotam ni cuu de tátá Acaz, te Acaz ni cuu de tátá Ezequías. ¹⁰ Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. ¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵ Te Eliud ni cuu de tátá Eleazar,

te Eleazar ni cuu de tátá Matán, te Matán ni cuu de tátá Jacob. ¹⁶ Te Jacob ni cuu de tátá José, tēe ni cuu yīi María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni iyo uxī cuūn yucūn. Te nde David te nde náa cuangoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

Jeē ní cacu Jesucristo

(Lc. 2.1-7)

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espiritu Santo. ¹⁹ Te José, tēe quijnáhan ña jíin, chi tēe ndaā cúu de. Te tu ní cúni de cuāha de jnūhun canu ña, chi sa cúni de jeē na jécuiñī sāhi jéē ma quijnáhan de jíin ña. ²⁰ Te níni súcuan nácani ni de, te jíin jéni ni quee-ni ñin ndajéhé maá Jítoho yō Yaā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū maá Espiritu Santo. ²¹ Te scácu ña ñin séhe yíi. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tācá jniñu yáha, návāha squícu jnūhun Jitoho yō Yaā Dios jeē ni cahān tēe ni nacani jnūhun ya nde jenahán. Te suhva ni cahān de:

²³ Coó ñin sūchi síhí, te nihīn séhe i,
te scácu i ñin séhe yíi,

te conaní sūchí un Emanuel.

Achí tutu. Te síhví yáha cúni cahān: Yaā Dios ndeé yá jíin yó.

²⁴ Te ni natahū ni José, te ni sáha de nájnūhun ni cahān ndajéhé Jitoho yō jíin de. Te ni jeca de María ni cuu ña

ñasihí de. ²⁵ Te tu ní quíxí de jíin ña, chi nde ni scácu ña sēhe yí núú ña. Te ni snaní de i Jesús.

Jeē ní quijicoo tē mago nuū yā

2

¹ Te ná ni cacu Jesús ini ñuu Belén ndañúū Judea, te tiempo un ndácu rey Herodes jniñu. Yūcuán na te jecu tē ndíchí jē cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. ² Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñuhún ná i, áchí de.

³ Te rey Herodes, ná ni jini de jñuhun yáha, te ni cunéé ni de, nde jíin táca ñáyuu ñuu Jerusalén. ⁴ Te ni nastútú de tāca sūtū cácujuhnu jíin tēe cástéén tutu ley Yaā Dios nuū ñáyuu. Te ni cajñuhún de tēe un ndé nuū cacu Cristo achí tutu. ⁵ Te ni cacachi nuū de:

Ini ñuu Belén ndañúū Judea. Chi suhva cáhán nuū tútu ni tee tēe ni nacani jñuhun ya nde jenahán:

⁶ Te róhó ñáyuu ñuu Belén ndañúū Judá, cújuhnu ga ñuu rō vēsú tāca gá jeē cujuhnu ini Judá. Chi suu ini ñuu rō quenda ñn Yaā ndacu jniñu, te coto ya ñayuu maá rí Israel, achí Yaā Dios. Achí tutu.

⁷ Yūcuán na te Herodes ni cana sāhí de tāca tēe ndíchí un jēe naní mago. Te ni cajñuhun yúcún de ndé quívī ní cane quími ún. ⁸ Te ni tají de tēe un quíngoo de ñuu Belén. Te ni cahān de:

Cuángoo ní te cajñuhun yúcún ní ndé nuū íne sūchi lúlí un. Te núu ni nanihín ní i, te quijicoo ní castūhun ní nuū ná, návāha suni máá ná quichiñuhún ná i, áchí rey.

⁹ Te jeē ní cajini de jnūhun ni cahān rey, te cuangoo de. Te máá quími cáhnu jeē ní cajito de ichi núū cáne niāndii, yósnúu núū de cuahān nde ni jinū nuū íne sūchi lúlí un, te yūcuan ní jecuiñī. ¹⁰ Te ná ni cajito de jeē ní jecuiñī quími ún, te yōhyo ni cacusī ni de. ¹¹ Te ni jinūcoo de ni quīvicoo de ini vehe, te ni cajito de nuū súchi lúlí un jíin náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jíin súje cútú jíin súje uvuā nuū i. ¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuangoo de nación Egipto

¹³ Te náa cuánuhun tāca téé mago, te ni scóto jēni José jeē ñn ndajéhé maá Jítoho yō Yaā Dios ni cahān yā jíin de:

Ndocuiñī te cunu ró quíngoo ró jíin súchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

¹⁴ Te ni natahū ni José. Te cuangoo de jíin súchi lúlí jíin náná i, te ñuú ní cajica de cuangoo de nación Egipto. ¹⁵ Te ni coyūcú de yūcuan ndé ni jihī Herodes. Te súcuan ni cuu návāha squícu jnūhun Jítoho yō Yaā Dios jeē ni cahān téē ni nacani jnūhun ya nde jenahán: Nde nación Egipto ni cana ri Sēhe ri vēji i, achí Yaā Dios, achí tutu.

Jeē ní ndacu Herodes jniñu jeē na cúū tāca súchi yíí lúlí

¹⁶ Yūcuán na te Herodes ni jini de jeē súcuan ni castáhú téé mago un de, te yōhyo ni quitī ni de. Te ni tají de soldado cuangoo, te ni cajehni tāca súchi yíí lúlí jéé uú cuiyā jíin jéé yiquín gá jeē cáyūcú ini ñuu Belén jíin táca ñuu yajni. Chi je ni cajnūhun yúcún de tāca téé mago un nasaa tiempo ni cuu jeē ní cacu Jesús. ¹⁷ Te súcuan

ni squícu jnūhun ni cahān Jeremías, tēe ni nacani jnūhun Yaā Dios nde jenahán, chi ni cahān de:

¹⁸ Ini región Ramá ni jini sōho ri jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña, te tu cácuu ni ña ndusiñ ni ña, chi ni cajihī i.

Achí tutu.

¹⁹ Yūcuán na te ni jihī Herodes. Te ni scóto jēni José jeē iñ ndajéhé Jitoho yō Yaā Dios ni cahān yā jíin de nuū ndeé de nación Egipto. ²⁰ Te ni cahān yā jíin de:

Ndocuiñi te nuhun rō ñuu rō Israel jíin súchi lúlí jíin náná i. Chi je ni cajihī tēe cánducú cahni sūchi lúlí jíin nuú. Achí ndajéhé.

²¹ Yūcuán na te ni ndocuiñi de, te cuanuhun de nación Israel jíin súchi lúlí jíin náná i. ²² Te ni nihin de jnūhun jeē Arquelao ni nucuiñi de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuangoo de. ²³ Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jnūhun Juan tēe scuándute

(Mr. 1.1-8; Lc. 3.1-9, 15-17; Jn. 1.19-28)

3

¹ Te ni yāha tiempo, te ni jinū Juan tēe scuándute nde nuū ñūhun téhé ndañúū Judea, nácani de jnūhun suhva:

² Nacani ni rō jijnáhan ró jēe stóo ró cuéchi ró, chi je ni cuyajni Yaā ndeé andiví jēe ndacu ya jniñu nuū rō. Achí de.

³ Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:
 Coō ñn tēe cana jee nde nuū ñúhun téhé:
 Sátūhva ró máá ró jijnáhan ró, chi quee maá Jítóho yō.
 Te sáha ró jniñu ndaā, chi vēji ya, achi de.
 Achí Isaías.

⁴ Te sahma ñúhun Juan cúu ixi quitì nání camello, te núhni ñn cinturón ññ chiji de. Te jeē técu de cúu táca ndicuéhyí jíin ndúxi yocō. ⁵ Te ñayuu ñuu Jerusalén jíin táca ñayuu región Judea jíin ñayuu yúcu yajni yuyúte Jordán, ni quijicoo i nuū de. ⁶ Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁷ Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núū castigo xeēn jeē quíji? ⁸ Núu súcuan te sáha ró jniñu váha, te súcuan steén rō jeē ní canacani ndije ni rō jeē stóo ró cuéchi ró. ⁹ Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yūū yáha nduu sēhe Abraham jeē candíje váha, te núu cúní yā. ¹⁰ Te cácuu ró nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. ¹¹ Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te Yaā quiji chi cújéhnū ndasí yá. Chi tú na vé jéhnū cuítì cúu ri nuū yā, ni jeē cuajníñu ri nuū yā vēsú ñn jniñu lúlí gá nájñūhun jeē

quénehen ri ndijēn yā. ¹² Te sáha ya nájnūhun sáha tēe scánda trigo, chi sásin ya ñayuu vāha jíin ñáyuu cunée, nájnūhun cúndoo trigo jeē quénda sīn paja. Te nastútú yá trigo yā ndīvi ini yacā yā. Te paja chi jnaa yā nuū ñuhún jeē ma ndahvá cuiṭi. Achí Juan.

Jeē ní jendute Jesús

(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. ¹⁴ Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãñá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájnūhun ĩn paloma, te ni quee xinī yā. ¹⁷ Te ichi ándiví ni cahān ĩn jnūhun:

Yāha cúu Sēhe ri jeē maní ndasí rí jíin, te yōhyo cúsi ni rī jíin, áchí.

Jeē ní jito ndee jexeén Jesús

(Mr. 1.12-13; Lc. 4.1-13)

4

¹ Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

² Te ni īyo ndite ni yā uū xico nduú uū xico ñuú, sáa te jíi yā sōco. ³ Te ni quee maá jéxeén jeē cóto ndee un yá, te ni cahān jíin yá:

Núu maá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu iī: Nasūu máni maá jíin stāā cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde ñuu iī Jerusalén. Te ni jeni ya xinī torre templo. ⁶ Te ni cahān jíin yá:

Te núu Sēhe Yaā Dios cúu ró, te sngava ró maá ró nde nuū ñúhun, chi jnama ya rohó. Chi yósó núu tútu:

Tejníñu ya ndajéhé yā quijicoo coto rōhó.

Te cunundee yā rohó jíináhan ya,

návāha ma cáchihi ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jítoho i Yaā Dios, núu jnama ya i chí tuú, achí yá.

⁸ Te jexeén un ní jeca tucu ya cuahān jíin yá nde xinī ñn yucu súcún ndasí. Te ni steén tācá nación ní cáhnu ñayīvi núu yā, te yōhyo luu cáa ndīhi. ⁹ Te ni cahān jíin yá:

Tācá ñuu yáha cuáha ri nuū rō, te núu cuiñi yítí ró chíñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chíñúhún ñayuu maá Jítoho i Yaā Dios, te nuū maá-ni ya cuajníñu i. Achí yá.

¹¹ Yūcuán na te ni cujiyo-ni jexeén un cuáhān. Te ni quecoo ndajéhé Yaā Dios ni cajejníñu nuū yā.

*Jeē ní quejéé Jesús nácani ya jnūhun región Galilea**(Mr. 1.14-15; Lc. 4.14-15)*

¹² Te ná ni nihīn Jesús jnūhun jeē íne Juan vecāa, te cuanuhun yā región Galilea. ¹³ Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí. ¹⁴ Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

¹⁵ Región Zabulón jíin Neftalí,
ichi jeē yłhi yumar, lado yūte Jordán nuū cáne niāndii,
jíin región Galilea nuū cáyūcú ñayuu tēcá nación tu jíin
jnūhun ya.

¹⁶ Ñayuu ún chi nájnūhun cáyūcú i nuū néē,
te coto i nájnūhun ñin luz cáhnu.
Te ñayuu je yajni naa, nihīn i jnūhun váha ndasí,
suu jnūhun jeē jnama ya anuá i.

Achí Isaías.

¹⁷ Te nde quivī yúcuán ní quejéé Jesús nácani ya jnūhun,
te ni cahān yā suhva:

Nacani ni rō jijnáhan ró jéē stóo ró cuéchi ró, chi je ni
cuyajni Yaā ndeé andíví jéē ndacu ya jniñu nuū rō, achí
yá.

*Jeē ní cana ya cuūn tēe jnī chācá**(Mr. 1.16-20; Lc. 5.1-11)*

¹⁸ Te jíca Jesús yumar Galilea cuahān yā. Te ni jito ya
nuū uú jnáhan ñani. Te ñin de cúu Simón jeē suni nání
Pedro, te inga de cúu Andrés. Te tēe cájniñ chācá cácuu
de, te cásinga de ñunu de ini mar. ¹⁹ Te ni cahān yā jíin de:

Condiquīn ruhū na quhín yō, te nasáha ri rohó tēe
nihīn cuehē ñayuu candíje ruhū, nájnūhun cánihīn rō
chācá, áchí yá.

²⁰ Yūcuán na te ni castóo-ni de ñunu de, te ni candiquīn
de ya.

²¹ Te ni jica ya jecu gā, te ni jito ya nuū inga uū jnáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñ de ñunu de. Te suni ni cana ya de jeē cóndiquin de ya. ²² Te ni castóo-ni de tátá de jíin barco, te ni candiquin de ya cuangoo de.

Jeē ni stéén yā nuū cuehē ñayuu
(Lc. 6.17-19)

²³ Te ni jica cuu Jesús ní región Galilea, ni steén yā jnūhun ini tǎcá vehe iī jeē cúu sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácu hū tǎcá-ni cuehyī. ²⁴ Te ni jitē núu jnūhun ya cuahān ní región Siria. Te nuū yā ni caquindeca i tǎca ñáyuu cácu hū, ñayuu cándoho tijni nuū cuehyí, jíin jéē jetú, jíin jéē ñūhun tachī ini, jíin jéē jihí yīhí, jíin jéē ni íjin. Te ni nasávāha ya i jíin áhan i. ²⁵ Te cuehē ñayuu región Galilea jíin Decápolis, jíin ñáyuu ñuu Jerusalén jíin región Judea, jíin tǎca ñuu ichi núu cáne niāndii yūte Jordán, ni cacondiquin i ya.

Jeē ní nacani ya jnūhun nde nuū yúcu

5

¹ Te ni jito Jesús nuū ñáyuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán. ² Te ni quejéé yá ni steén yā tǎca jnúhun yáha nuū de:

Jnūhun yōhoyo ndetū
(Lc. 6.20-23)

³ Yōhoyo ndetū ñayuu jeē cánacuni i jeē tu íyó váha ánuá i siquī cuéchi i, chi je ni quīvícoo i ndaha Yaā andiví jéē ndácu ya jniñu nuū i.

⁴ 'Yōhyo ndetū ñayuu cáccucuíhyá ni, chi ndusī ni i sáha Yaā Dios.

⁵ 'Yōhyo ndetū ñayuu cáhīyo vitá suchí ini, chi ni jejnūhun ya jeē cutahū i ñayīví.

⁶ 'Yōhyo ndetū ñayuu jeē nájnūhun jeē cájīi i sōco cájichī i, súcuan jnāā i sáha i jniñu ndaā, chi máá yá chindéé ñáhán yá i jeē cuu sáha i.

⁷ 'Yōhyo ndetū ñayuu cákundáhú ni jnáhan, chi suni kundáhú ni Yaā Dios i.

⁸ 'Yōhyo ndetū ñayuu cáhīyo ndoo ini anuá, chi coto i nuū Yaā Dios.

⁹ 'Yōhyo ndetū ñayuu cánasámanī jnáhan, chi cahān Yaā Dios jeē sēhe ya cácuu i.

¹⁰ 'Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chi je ni quīvícoo i ndaha Yaā andiví jēé ndácu ya jniñu nuū i.

¹¹ 'Yōhyo ndetū maá ró jijnáhan ró núu cácahān neé i nuū rō jeē síquī ruhū, te coto xeēn i róhó, te stáu yáhu i róhó, vésú tú cuēchi ró. ¹² Na cúsiñ ni rō jijnáhan ró núu súcuan, te sa víhyá gā cusī ni rō, chi cáhnu ndasí coo tahū rō nde andiví. Chi suni súcuan ni cajito xeēn i tāca téé ni canacani jnūhun Yaā Dios jeē ní quijicoo xīhna gā vésú rohó.

Jnūhun yátá síquī ñī jín síquī luz

(Mr. 9.50; Lc. 14.34-35)

¹³ 'Máá ró jijnáhan ró cájejniñu ró ini ñayīvi nájnūhun jéjniñu ñī nuū cúñu návāha tú tehyū. Te núu ñī ún na náā jeē uhvuá, ¿te ndese nduu uhvuā tucu? Tuá cuajniñu cuiti gā, chi sa cate ñayuu te cueñū i síquī.

¹⁴ 'Máá ró cácuu nájnūhun luz jeē steén ini anuá ñayuu ñayīví. Te cácuu ró nájnūhun ñn ñuu íne xinī yúcu, jeē ma cúu quisāhí. ¹⁵ Te ni tu nástīn ñayuu ñn lámpara te chune i chíji cajón, chi sa suhva jéni i nuū sucún, návāha

cundijin nuū tāca jéē cáyūcú ini vehe. ¹⁶ Te suni súcuan na stéén rō luz maá ró nuū tāca ñáyuu, te suu cúu jeē cúni i jniñu váha cásáha ró, te cahān i jeē yóhyo vāha Yaā cúu Tátá rō jeē ndeé yá andiví.

Jeē ni stéén yā siquī ley Yaā Dios

¹⁷ 'Ma cáni ni rō jijnáhan ró jéē véji ri snáā rī ley jeē ni jéhe Yaā Dios nuū Moisés, jín jéē snáā rī tāca jnúhun ni cacahān tēe ni canacani jnúhun ya jenahán. Tú vēji ri jeē snáā rī, chi sa suhva jeē steén cají rí jnúhun ndíso. ¹⁸ Chi jendaá cahán rī jín ró jeē núu níni íyó andiví jín ñáyiví, te ma náā cuiṭi ni ñn punto ni ñn letra nuū tútu ley yā, chi nde na squícu tācá ndihi jnúhun jeē cahán. ¹⁹ Núu súcuan te núu ñn ñayuu tu squícu i ñn jnúhun yáha jéē ndácu ley yā, vēsú ñn jnúhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñn ñayuu squícu i te stéén i jeē squícu ñayuu, yūcuán na te cujéhnú i ichi andiví nuū ndácu Yaā Dios jniñu. ²⁰ Chi cáhán rī jín ró jeē núu tú coo ndaā gā jniñu cásáha ró vēsú jniñu cásáha tēe cástéén tutu ley yā jín tēe grupo fariseo, te ma quívicoo cuiṭi rō ndaha Yaā andiví jéē ndacu ya jniñu nuū rō.

Jeē ni stéén yā jeē ma quiṭí ni yō

(Lc. 12.57-59)

²¹ 'Je ni cajini ró jnúhun ni cacahān jín ñáyuu jenahán, jeē ma cáhni i ndīyi, te na-ni ñayuu núu cahni i ndīyi, te cundaā cuēchi i nuū tāca tóhō, achí. ²² Te ruhū chi cáhán rī jín ró, vēsú núu máá jéē quiṭí ni ñn ñayuu jító i jnáhan i, suni cundaā siquī cuéchi i ún. Te núu ñn ñayuu cahān neé i nuū jnáhan i, núu súcuan te cundaā cuēchi i un núu justicia cujéhnú ga. Te núu ñn ñayuu cahān i nuū jnáhan i:

Róhó jéē canéé íi, achi i, núu súcuan te quívi i nuū ñuhún infierno te núu ma nácani ni i.

²³ Jeē yúcuan te núu ni jinū rō nuū altar jíin jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jnáhan ró, ²⁴ núu súcuan te squéndōo ró jéē socó rō ún xiin altar, te xīhna gā quihīn rō ndumanī rō jíin jnáhan ró. Yūcuán na te nandicó ró socó rō.

²⁵ Te núu ñin ñayuu quihīn i jíin ró nuū tohó jeē cacān i cuéchi siquī rō, núu súcuan te níní cuáhān rō jíin i ichi te sándaā maá ró jíin i, návāha ma squívi i róhó núu juez. Chi juez siáha de róhó núu policía, te chune de róhó vecāa.

²⁶ Te jendaá cahán rī jíin ró jeē ma quénda cuíti rō yūcuán, chi nde chunaa rō ndīhi cuíti xūhun jéē cájicān de.

Jeē ni stéén yā jeē ma cósiquí ndéē jnáhan

²⁷ Ni cajini ró jnúhun ni cacahān jenahán jeē ma cósiquí ndéē jnáhan ñayuu. ²⁸ Te ruhū chi cáhán rī jíin ró jeē núu ñin tēe ndéhe de nuū ñin ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

²⁹ Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi. Chi váha gā jeē náā ñin tinūu ró vēsú jeē cóo ndīhi yiqui cúñu rō te quihīn rō infierno. ³⁰ Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē náā ñin ndaha ró vēsú jeē cóo ndīhi yiqui cúñu rō te quihīn rō infierno.

Jeē ni stéén yā jeē ma ndusīn jnáhan

(Mt. 19.9; Mr. 10.11-12; Lc. 16.18)

³¹ Te suni ni cacahān nde jenahán: Núu ndé ñin cúní stóo ñasihí, te na cuáha acta nuū ña jeē ndusīn jíin ña.

³² Te ruhū chi sa cáhán rī jíin ró jeē núu ñin tēe stóo de ñasihí de, te núu nasūu jéē tǎjni ni ña, núu súcuan te sáha

de jeē casíquí ndéē ña de, chi condee ña jíin inga tēe. Te núu ñin tēe condeca de ñahan ní ndusñin, suni casíquí ndéē de ña.

Jeē ni stéén yā siquī jnúhun jéjnūhun téyí

³³ 'Te suni ni cajini ró jnúhun jeē ni cáhān jíin ñáyuu nde jenahán: Núu ni jejnūhun téyí ró jeē squícu ró, jíto jíinúu Yaā Dios, núu súcuan te cánuú squícu ró jéē ni cáhān téyí ró un, áchí. ³⁴ Te ruhū chi cáhān rī jíin ró jijnáhan ró jeē ní ñin siquī jníñu ma cahán téyí ró nde jíin síhví Yaā Dios, ni ma cahán téyí ró jeē jíto jíinúu yā. Te núu jéjnūhun téyí ró te tú vāha jeē ndácunehen ró andiví ni ñayiví. Chi andiví cúu nuū ñin mesa nuū ndácu Yaā Dios jniñu. ³⁵ Te ñayiví cúu nájñūhun teyū nuū ñin jehē yā. Te ni ma ndácunehen ró ñuu Jerusalén, chi suu cúu ñuu maá Yáā cúu Rey kujéhu. ³⁶ Ni ma cahán rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuiti sáha ró jéē ni ñin ixi xíní rō nducujín chí ndujnúú. ³⁷ Chi suhva-ni cahán rō: Cúu, achi rō. Tuú, achi rō. Chi núu chisóó gá rō jnúhun cahán rō, te nuū jexeén vēji.

*Jeē ni stéén yā jeē ma cuāha yó jéē ndútahū ñayuu
(Lc. 6.29-30)*

³⁸ 'Ni cajini ró jnúhun jeē ni cáhān jíin ñáyuu jenahán: Núu ñin tēe ndahva de tinūu jnáhan de, suni súcuan na ndáhva tinúú de. Te núu ñin tēe stáva de jnúhun jnáhan de, suni súcuan na stáva jnúhun de, áchí. ³⁹ Te ruhū chi sa cáhān rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yiquí núú lado váha ró, te vāha ga suni cuāha ró inga lado cani de, vēsú jeē nácuāha ró jéē ndútahū de. ⁴⁰ Te núu ndé tēe stáú yáhu de róhó te quénde de camisa rō, suni cuāha ró jnúhun jeē na quhín de jíin ndé ticāchi ró. ⁴¹ Te núu ndé tēe

scáca de róhó jéē condiso ró ndajníñu de ìin kilómetro, te caca ró úū kilómetro jíin de. ⁴² Te na-ni ñayuu núu jíicán i ndajníñu ró, te cuāha ró núū i. Te ñayuu jíicán núu ndajníñu nuū rō, ma sasáhán ró cuāha ró núū i.

Jnūhun jeē cundáhú ni yō ñayuu cájito uhū yohó

(Lc. 6.27-28, 32-36)

⁴³ Te suni ni cajini ró jnūhun jeē ni cáhān nde jenahán: Cundáhú ni rō ñayuu cáhīyo manī jíin ró, te coto uhū rō ñayuu cájito uhū rohó, áchí. ⁴⁴ Te ruhū chi sa cáhán rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha síquī rō. Te sáha vāha ró jíin ñayuu cáquitī ni nuū rō. Te cacān tahu rō jehē ñayuu cácahān neé núū rō te cájito xeēn i róhó. ⁴⁵ Te súcuan stéén rō jeē cácuu ró séhe máá Tátá rō, Yaā ndeé andiví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núū ñayuu casáha jniñu néé. ⁴⁶ Chi núu íyó manī rō jíin máá-ni ñayuu jeē maní jíin ró, te tú na tahū nihīn rō nuū yā. Chi nde tēe cástútú xuhun renta jeē castáhú, suni súcuan cásáha de. ⁴⁷ Te núu máni jnáhan ró cáhán yiñúhún ró jíin, ¿te na vé jeē váha ga sáha ró núu súcuan? Chi nde ñayuu tu cácañdije Yaā Dios, suni súcuan cásáha i. ⁴⁸ Núu súcuan te ndaā na cóo ndihī jeē sáha ró, nájnūhun íyó ndáā ndihī jeē sáha Tátá rō, Yaā ndeé andiví.

Jeē ni stéén yā ndese sáha yó jniñu váha

6

¹ Te jeē sáha ró táca jniñu váha nuū Yaā Dios, coto ró jéē ma sáha ró máá síquī jeē cúni ñayuu te cuajnúhún i róhó. Chi núu súcuan sáha ró, te tú na tahū rō cuāha máá Tátá rō, Yaā ndeé andiví. ² Jeē yúcuan te jeē sáha ró caridad, te ma sáha ró jéē cúni tāca ñayuu, nájnūhun

cásáha tēe stáhú-ni, cáhīin de nuū cúchitú ñayuu ini tǎcá vehe iī sinagoga jíin núū yáhu. Chi súcuan cásáha de návāha cuajnúhún ñayuu de jeē váha cásáha de. Jendaá cahán rī jíin ró jeē tahū de cúu jeē jejnúhún ñayuu de. ³ Te rǒhó jíjnáhan ró, núu cásáha ró caridad, te sáha yuhu rō, návāha nde amigo vāha ró tú cuni jeē sáha ró. ⁴ Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, iin quivī te cuāha ya tahū cuu ró.

Jeē ni stéén yā ndese cacān tahú yō

(Lc. 11.2-4)

⁵ Te jeē cájicān tahú rō, te ma sáha ró nájnūhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tǎcá vehe iī sinagoga jíin táca yíqui yáhu, návāha cuni ñayuu te cuajnúhún i de. Jendaá cahán rī jíin ró jeē máá yúcuan-ni cúu tahū jeē nihín de, suu jeē jejnúhún ñayuu de. ⁶ Te rǒhó jíjnáhan ró, núu cájicān tahú rō, te ndīvi ró ini vehe ró te casi rō yehyí. Te cacān tahú rō nuū máá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jicán rō.

⁷ Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájnūhun cásáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahān i, te sáa te cuni sōho ya, te tuú. ⁸ Núu súcuan te ma sáha ró nájnūhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā.

⁹ Núu súcuan te suhva cacān tahú rō:

Tátá máá ná jíjnáhan ná jéé ndeé ní andīví,

níní na cóo yíñúhún ná nuū ní, chi Yaā iī cúu ní.

¹⁰ Te ñúhun ni na jéé yachī quiji quivī ndacu ní jniñu ní ñáyīvi yáha.

Te na cóo tǎcá jniñu nújnahan ni ní,

nájñūhun íyo ini andīví, súcuan na cóo ini ñáyīví.

¹¹ Staā jeē cátecu na táca quívī, cuāha ní nuū ná vijna.

¹² Te cone cahnu ni ni nuū tāca cuēchi casáha ná nuū ní, nájnūhun cáhine cáhnu ni na nuū ñáyuu casáha cuēchi nuū ná.

¹³ Te ma cuáha ni jnúhun jeē coto ndee jexeén sãñá, chi sa suhva jnama ní sãña nuū tāca jēē neé.

Chi máá ní cúu Yaā ndácu jniñu, te jní ní poder, te yōhyo luu cújéhnú ní ní cáni. Súcuan na cóo. Amén. Achi rō jijnáhan rō.

¹⁴ 'Chi núu cone cáhnu ni rō nuū ñáyuu casáha cuēchi nuū rō, te suni súcuan cone cáhnu ni máá Tátá rō andiví nuū cuēchi rō. ¹⁵ Te núu ma cóne cáhnu ni rō nuū ñáyuu casáha cuēchi nuū rō, te suni súcuan ma cóne cáhnu ni máá Tátá rō nuū cuēchi rō jijnáhan rō.

Jeē ni stéén yā siquī jnúhun condite ni

¹⁶ 'Te núu condite ni rō jeē chiñúhún rō Yaā Dios, te ma sáha rō nájnūhun casáha tēe stáhú-ni. Chi casáha de jeē coto xíí de, te súcuan stéén de nuū ñáyuu jeē iyó ndite ni de, návāha cuajnúhún i de. Jendaá cahán rī jíín rō jeē máá yúcuan-ni cúu tahū jeē nihín de, suu jeē jejnúhún ñáyuu de. ¹⁷ Te máá rō jijnáhan rō, núu iyó ndite ni rō, te sa chuhun vāha rō xíni rō te nandahá nuū rō, ¹⁸ návāha ma cúni ñáyuu jeē iyó ndite ni rō. Chi máá-ni Tátá rō jeē ndeé yuhu yā jíín rō, cuni yā, te iin quívī te cuāha ya tahū cuu rō.

Ndese coo cúcá yó nde andiví

(Lc. 12.33-34)

¹⁹ 'Ma cóndihvī ni rō caya rō ndajniñu cúcá ini ñayvī yáha, chi quívī tiquíxin, te cáne xehyu, te tívi. Te suni quívicoo ñacuíhná te sácuíhná. ²⁰ Chi sa suhva sáha rō táca jniñu vāha návāha cayā tahū rō nde andiví. Chi yúcuan má quívī tiquíxin ní ma cáne xehyu jeē tívi. Ni

ma cúu quīvi ñacuīhna sácuihná. ²¹ Chi nde nuū nihín rō tahū váha ró, yūcuan cúu nuū cóndihvī ni rō siquī.

Tinūu cúu lámpara yiqui cúñu

(Lc. 11.34-36)

²² Tinūu ró cúu nájnūhun lámpara nuū yiqui cúñu rō. Núu sūcuan te núu tinūu ró iyó ndijin, te nñ-ni yiqui cúñu rō cúndijin. ²³ Te núu tinūu ró tu iyó ndijin, te nñ-ni yiqui cúñu rō iyó nee. Te suni sūcuan cúu ánuá rō, chi núu máni jeē jéni néé ni rō, te nacā jeē nee gā iyó ini anuá rō núu sūcuan.

Jeē ma cóndihvī ni yō siquī xūhun

(Lc. 16.13)

²⁴ Ni ñn mozo ma cúu cuajniñu de nuū uū patrón. Chi quitī ni de nuū ñn te coo manī de jíin ñga, chí squícu vāha de nuū ñn te sájéé ni de nuū ñga. Te suni sūcuan ma cúu cuajniñu ró núu Yaā Dios te núu máni siquī xūhun ndíhvī ni rō.

Yaā Dios ndíto ya yohó

(Lc. 12.22-31)

²⁵ Núu sūcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē cáji rō jíin jéé cūhun ró. ²⁶ Condēhe ró ndese cátecu saa, chi tu cátaji tī, ni tu cánastútú tī jeē chūvāha tī, ni tú yacā tī. Te vēsú sūcuan te máá Tátá rō andiví scáji yā tī. Te cánuú ndasí gá rō jijnáhan ró vēsú tācá saa ún. ²⁷ ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jée ita tāca yúcū. Chi tu sájniñu, ni tu táu. ²⁹ Te cáhán rī jíin ró jeē ni

rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún. ³⁰ Te núu súcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu róhó jijnáhan ró jéē ma sáha ya jeē nihín rō sahma. ¿Te naun tu cácanđije nihin ró jéē ndító ya rohó? ³¹ Núu súcuan te ma nácani ndasí ni rō siquī jeē cáji rō, jeē coho ró, jeē cuhun ró. ³² Chi tāca ñayuu ñayivī jéē tu cácanđije cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andiví, te jíní yā jeē cájini ñúhun ró tāca jéē yáha. ³³ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jín síquī jeē sáha ró jniñu ndaā jeē nújnahan ni yā. Yūcuán na te sáha ya jeē nihín rō tāca jéē yáha. ³⁴ Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnúndóho jeē iyó ná ñin ná ñin-ni quivī.

*Jeē ma cahán yō siquī cuéchi jnáhan yó
(Lc. 6.37-38, 41-42)*

7

¹ Ma cahán rō siquī ñayuu ndese sáha i, návāha suni ma cahán Yaā Dios cuéchi siquī maá ró jeē casáha ró súcuan. ² Chi nájnūhun cácahān rō siquī cuéchi ñayuu, suni súcuan cahán yā siquī cuéchi ró. Te cūhva jeē cándihvī ni rō siquī i, suni cūhva yúcuan sáha ya jín ró. ³ Chi cuéchi jnáhan ró cúu nájnūhun jeē íne ñin yāca lúlí tñnūú i. ¿Te naun cásáha ró cuenta jeē súcuan, te tu cásáha ró cuenta cuéchi máá ró jeē cúu nájnūhun jeē íne ñin nduhu tñnūu máá ró? ⁴ ¿Te naun cácahān rō jín jnáhan ró: Na táva rī yāca íne tñnūu ró, te tu cánacani ni rō jeē íne ñin nduhu tñnūu máá ró? ⁵ Tēe stáhú-ni cácuu ró núu súcuan. Xihna gā tñnūu máá ró tava rō nduhu, te yūcuán

na te cuu condēhe váha ró jéē táva rō yāca t́nūu jnáhan ró.

⁶ Ma sáha fuerza rō ñayuu cunéé quívicoo i nuū jnúhun iī yā núu tu cúní i. Chi ndonda i siquī rō nájnūhun ina jeē cáyīhi tí rohó. Te ma nácani ró jnúhun ya nuū ñayuu jeē tu cúní cuiti cuajnúhún. Chi cándāa i nájnūhun quinī jeē jeñú t́ siquī perla jeē ndeé yahu ga.

Cacān yō nuū yā te nihīn yō

(Lc. 11.9-13; 6.31)

⁷ Cacān rō nuū Yaā Dios, te cuāha ya nuū rō. Te nducú ró tāca jéē váha íyó núu yā, te nihīn rō sáha ya. Te cacān tahu rō nde nihīn rō, nájnūhun sáha ñayuu cahán yehyí ndé nune quíví i. ⁸ Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cúní i.

⁹ ¿Te ndé ĩn róhó núu sēhe ró jicán i staā nuū rō, te á cuáha ró ĩn yuū nuū i? ¹⁰ ¿Te núu jicán i ĩn chācá, te á cuáha ró ĩn coō nuū i? Tú cuiti súcuan. ¹¹ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéē váha nuū séhe ró. Te nagā ni cuu máá Tátá rō andíví jéē ma cuáha ya jeē váha nuū ñáyuu jicán nuū yā.

¹² Te nájnūhun cúní rō jeē sáha vāha ñayuu jíin ró, suni súcuan na sáha vāha ró jíin i. Chi tutu ley Moisés súcuan ndácu jniñu, jíin táca tutu tēe ni canacani jnúhun Yaā Dios.

Siquī jeē quíví yó yéhyí túū

(Lc. 13.24)

¹³ Condihvī ni rō quívicoo ró ndaha Yaā Dios. Chi cúu nájnūhun ĩn yéhyí túū. Chi yéhyí jíin ichi jeē cuahán nuū jnahnú ndetū ñayuu, jíté te cáhnu, te cuehē i quívicoo yūcuán. ¹⁴ Te yéhyí jíin ichi jeē cuahán nuū nihín tahu i cotecu i, chi tuū yehyí te cuñi ichi, te jecu-ni i cánihīn i.

*Jíin jniñu cásáha ñayuu te nácuni yō ndese ñayuu cácuu i
(Lc. 6.43-44)*

¹⁵ Te ma cándije cuiti rō tēe stáhú jeē cácahān de jeē jnúhun Yaā Dios cánacani de. Chi nájnūhun lanchi, quití tú xeēn, súcuan cásáha de vējicoo de nuū rō. Te ini anuá de chi cácuu de nájnūhun yihī, quití xéén. ¹⁶ Jíin jniñu cásáha de te nacuni rō de ndese tēe cácuu de. Chi cúu nájnūhun jeē tu scóyo ró ndehē uva xinī iñu, ni tu scóyo ró higo xinī iñu yóquin. ¹⁷ Te tēcá yujnu váha chi jéhe ndehē váha, te yujnu neé chi cúun ndehē neé. ¹⁸ ĩn yujnu váha ma cúun ndehē neé, te ni ĩn yujnu neé ma cuáha ndehē váha. ¹⁹ Te tēcá yujnu jeē tu jéhe ndehē váha, chi tahndē te cayū nuū ñuhún. ²⁰ Te suni súcuan cácuu tēe ún, chi jíin jniñu cásáha de te nácuni rō ndese tēe cácuu de.

*Nasūú ndihī ñayuu quīvicoo andiví
(Lc. 13.25-27)*

²¹ Nasūú ndihī ñayuu jeē cahán i Jitoho i ruhū cúu jeē quīvicoo nuū ndácu Tátá rī jniñu nde andiví. Chi quīvicoo máá nene ñayuu jeē squícu jniñu cúní Tatá rī andiví. ²² Te quivī jeē sándaā rī jniñu ñayuu, te cuehē i cahán jíin rí: Jitoho na jíjnáhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuehē jniñu jéhnú jíin síhví ní jeē náā ni ñayuu sáha. Achi i. ²³ Yūcuán na te cahán rī jíin ñáyuu ún: Tu jíní cuiti rī rohó. Cujiyó quingoo ró, chi ñayuu casáha jniñu neé cácuu ró, achi rī.

*Siquī uú vehe
(Lc. 6.47-49; Mr. 1.22)*

²⁴ Núu súcuan te tēca ñáyuu jeē cájini sōho jnūhun cáhán rī te squícu i, cácuu i nájnūhun ĩn tēe ni nacani vāha ni, te ni jeni de vehe de siquī cáva. ²⁵ Te ni cuun saū, te ni ndaa yūte, te ni quee tachī xeén, te ni cachundahá

vehe ún. Te tu ní cótúú, chi siquī cáva ndéé. ²⁶ Te tāca ñayuu jeē cājini sōho jnūhun cáhán rī te tu squícu i, cácuu i nájñūhun ñin tēe cánéé jeē ní jeni de vehe de nuū ñíti. ²⁷ Te ni cuun saū, te ni quiji ndute ñúhún cuéhē, te ni quee tachī xeén, te ni cachundahá vehe ún. Te ni cotúú-ni, te ni naa ñi-ni. Achí yá jíin i jíjnáhan i.

²⁸ Te ná ni jínu ni cahān Jesús tāca jnúhun yáha, te ñayuu cuehē un ní canaa ni i ni cajini i jnūhun ni steén yā. ²⁹ Chi ni steén vāha ya nuū i, chi máá yá cúu jeē ndíso jníñu siquī ndíhi. Te tēe cástéén tutu ley Yaā Dios, tu súcuan cástéén de.

*Jeē ní nasávāha ya ñin tēe ndóho cuehyī stehyú
(Mr. 1.40-45; Lc. 5.12-16)*

8

¹ Te ni nanuu Jesús yucu ún, te cuehē ñayuu cándiquīn i ya. ² Te ñin tēe ndóho cuehyī stehyú, ni quee de nuū yā. Te ni jecuiñi yití de nuū yā, te ni cahān de jíin yá:

Jíni na jéé cuu sáha ní jéé nduvāha ná, te núu cúní ni, áchí de.

³ Te Jesús ni soó yá ndaha ya siquī de, te ni cahān yā: Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ⁴ Yūcuán na te ni cahān Jesús jíin de:

Ma cáchi cuiñi rō nuū ní ñin. Chi quisteén rō máá ró nuū sutú, te condahá ró jeē socó rō nuū Yaā Dios, nájñūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

*Jeē ní nasávāha ya mozo capitán
(Lc. 7.1-10)*

⁵ Te ni quívi Jesús ñuu Capernaum. Te ñin tēe nación Roma jeē cúu capitán, ni quee de nuū yā, te ni cahān ndahú de jíin yá:

⁶ Mozo na cátú i vehe ná, chi ni ijín i te ndóho xeēn i, áchí de.

⁷ Te ni cahān Jesús:

Quihīn rī nasávāha ri i núu súcuan, áchí yá.

⁸ Te ni cahān capitán jíin yá:

Tu cújéhnú ná jéē quihín ni quívi ní vehe ná. Chi máá jéē cahán-ni ní, te na ndúvāha-ni mozo na. ⁹ Chi máá ná suni ndíso jniñu ná ní casáha tēe cácujehnú ga. Te cújéhnú ná núu tǎcá soldado na. Te núu cáhán na jíin ĩn de jeē na quihín de, te cuahān de. Te núu cáhán na jíin ĩnga de jeē na quíji de, te quíji de. Te núu ndácu ná ĩn jniñu nuū mozo na, te sáha i. Achí de.

¹⁰ Te jeē ní jini Jesús jnūhun yáha, te ni naa ni yā. Te ni cahān yā jíin ñáyuu cándiquīn yā ún:

Jendaá cahán rī jíin ró jeē ni nación yō Israel tu ní níhín rī ni ĩn ñayuu candíje níhin súcuan, nájnūhun cándíje tēe yáha, vēsú tēe nación tu jíin jnūhun Yaā Dios cúu de.

¹¹ Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quée niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andíví. ¹² Te sava ñayuu nación Israel jeē maá i quívicoo núu, te sa quenehen ya i quihīn i nuū néē, chi tu ní cácandíje i. Te yūcuan ndáhyū i te nacayíhí yuhu i jeē ndoho xeēn i. Achí yá.

¹³ Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájnūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro

(Mr. 1.29-31; Lc. 4.38-39)

¹⁴ Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña. ¹⁵ Te ni jniñ ya ndaha ña, te ni

quenda-ni quiji ún ña. Te ni ndocuiñi ña, te ni sáha ña jeē ní cayeji de jíin yá.

Jeē ní nasávāha ya cuehē ñayuu
(Mr. 1.32-34; Lc. 4.40-41)

¹⁶ Te jeē ní cuaa ni quecoo ñayuu jíin cuehē ñayuu jeē ñúhun tachī ini i. Te ni quenehen ya tachī un cuángoo jíin jnúhun cahán-ni ya. Te suni ni nasávāha ya tāca ñáyuu cácuñū. ¹⁷ Te súcuan ni cuu návāha cundaā jnúhun ni cahán Isaías, tēe ni nacani jnúhun Yaā Dios jenahán: Máá yá ni tejiyo ndinuū cuehyī cándoho yó, áchí Isaías.

Siquī ñayuu jeē cácuñi i condiquīn i ya
(Lc. 9.57-62)

¹⁸ Te ni jito Jesús jeē ní ndicó nduū cuehē ñayuu yā. Te ni cahán yā jíin tēe cácuáha jíin yá jeē na yáha de jíin yá inga lado mar. ¹⁹ Te iin tēe stéén tutu ley Yaā Dios, ni quee de nuū yā, te ni cahán de:

Maestro, condiquīn na níhín quíhín yō ndé-ni cúu-ni nuū quihín ni, áchí de.

²⁰ Te ni cahán Jesús jíin de:

Tāca ñúcuui, iyó yáū cava cáñuhun tī. Te suni saa, iyó táca tī. Te ruhū, Yaā ní nduu tēe, tuú nuū cusú rī, achí yá.

²¹ Te inga tēe ni cahán de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

²² Te ni cahán Jesús jíin de:

Condiquīn ruhū na quíhín yō. Te stóo tāca ndīyi na chindūji jnáhan ndīyi, chi ndīyi cácuu ñayuu tu cácuñíje. Achí yá.

Jeē ní jecuiñi tachī níhín jíin mar ni sáha ya
(Mr. 4.35-41; Lc. 8.22-25)

²³ Yūcuán na te ni quīvi Jesús ini barco, te tēe cáscuáha jíin yá ni quīvicoo de cuahān de jíin yá. ²⁴ Te nuū mar ni jequīhi iin tachī níhin, te ni stóna ndute mar, ni quīvi ini barco un. Te Jesús chi quíxí yā. ²⁵ Te tēe cáscuáha jíin yá ni castóna de ya, te ni cacahān de:

Jnama ní yóhó, chi je quee yó chíji ndute, áchí de.

²⁶ Te ni cahān yā jíin de:

¿Naun cáyūhú ndasí ró? Te tu cácandíje níhin ró jēe cácu ró sáha ri, achí yá.

Yūcuán na te ni ndocuiñī yā, te ni cahān yā nuū tachī níhin un jíin núū mar. Te ni cuu nayúú íi-ni. ²⁷ Te ni canaa ni de jíinahan de, te ni cacahān de:

¿Ndé iin ga cúu tēe yáha, jēe ndé tachī níhin jíin mar cájetáhú jēe cahán de? áchí de.

Tēe Gadara jeē cándoho tachī

(Mr. 5.1-20; Lc. 8.26-39)

²⁸ Te ni jinū yā inga lado mar, máa región ñayuu Gadara. Te uū tēe ni quendacoo de nde nuū yíndūji ndīyi, ni quijnahan de ya. Te cáñuhun tachī ini de, te siquī jeē yóhyo xeēn tachī ún, te ni iin ñayuu tu cúu yāha i ichi yúcuan. ²⁹ Te ni cacana cóhó de ni casáha tachī:

¿Naun vēji ní núū ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee maá quívī? áchí.

³⁰ Te nde jicá jecu cáhiin cuehē quīñī cájitu tí. ³¹ Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívicoo ná ini quīñī cáhiin yūcuán, áchí.

³² Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívicoo ini quīñī. Te quīñī un ní cajinu tí ni caningava tí iin yucáva, te ni ndaquīhi tí ndute mar, ni cajihī tí.

³³ Te tēe cándito tĩ ni cajinu de cuango de jeē ní cayūhú de. Te ni najinūcoo de ñuu. Te ni cacastūhún de tēcá jniñu yúcuán, jíin ndese ni cuu jeē ní quendacoo tachĩ ini ndĩndúú tée ún. ³⁴ Yūcuán na te ndívii ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quenda ya región yúcuán quíhĩn yā.

Jeē ní nasávāha ya ñin tēe ndóho cuehyĩ ni íjin
(Mr. 2.1-12; Lc. 5.17-26)

9

¹ Yūcuán na te ni ndĩvi Jesús ini barco. Te ni nayāha ya cuahān yā inga lado mar, te ni najinū yā ñuu maá yá.

² Te ni caquindeca ñayuu ñin tēe ndóho cuehyĩ ni íjin, cátú de nuū ñin camilla. Te ni jini Jesús jeē cá candíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyĩ ní rō séhē, chi je íne cáhnu ni rĩ nuū tāca cuéchi ró, áchĩ yá.

³ Yūcuán na te jecu tēe cástéén tutu ley Yaā Dios, ni cajeni ni de siquĩ yā: Jeē cahán tēe yáha súcuán, chi cáhán de jnūhun ndevāha jeē quitĩ ni Yaā Dios. ⁴ Te ni jini Jesús jeē súcuán cájeni ni de, te ni cahān yā jíin de:

¿Naun cájeni ni rō jeē cahán ndevāha rĩ? ⁵ Jeē úu jnūhun yáha, ¿ndé ñin yí gá cáa? ¿A jéē cahán rĩ jíin tée cúhú: Je íne cáhnu ni rĩ nuū tāca cuéchi ró? ¿Chĩ yí gá jeē cahān rĩ: Ndocuĩñĩ te caca ró, chi je ni nduvāha ró, achi rĩ?

⁶ Te vijna te na stéén rĩ jeē maá rĩ, Yaā ní nduu tēe, ndíso jníñu rĩ ini ñayĩvi yáha jéē cóne cáhnu ni rĩ nuū cuéchi.

Yūcuán na te ni cahān yā jíin tée ni íjin ún:

Ndocuĩñĩ te naquihin ró camilla rō te quinhun rō vehe ró, áchĩ yá jíin de.

⁷ Yūcuán na te ni ndocuĩñĩ-ni tēe ún, te cuanhun de vehe de. ⁸ Te ná ni cajito ñayuu un jéē súcuán ni sáha ya,

te ni cayūhú i. Te ni cacahān i jeē yóh̄yo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuan cuáhān yā. Te ni jito ya nuū ñn tēe nání Mateo, néne de nuū cutútú xúhun renta. Te ni cahān yā jíin de:

Condiquīn ruhū na quhín yō.

Te ni ndocuiñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuēchi, suni cáyūcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásáha cuēchi? áchí de.

¹² Te ni jini Jesús, te ni cahān yatá yá jíin de:

Ñayuu cáh̄yo vāha, tu jíini ñúhún i tēe tájñá, chi ñayuu cácuhū cúu jeē jíini ñúhún. ¹³ Cuáhán jíjñáhan ró núu súcuan, te nacani ni rō na vé cúu jeē cahán jnūhun yáha jēe yosó núu tútu i: Cúni rī jeē na cúndáhú ni rō jnáhan ró, nasūu jēe socó rō quitī nuū rī, achí Yaā Dios nde jenahán. Te ruhū nasūu jēe véji ri cana ri ñayuu tú cuēchi, jeē cúu i nájnūhun ñayuu cáh̄yo vāha, chi sa suhva véji ri cana ri ñayuu iyó cuēchi, jeē na nácani ni i te stóo i cuēchi i. Achí yá.

Jeē ní cacajñūhún de ya siquī jeē cóndite ni

(Mr. 2.18-22; Lc. 5.33-39)

¹⁴ Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Sãña jíin tée grupo fariseo, tijni jínu cáhīyo ndite ni na núu Yaa Dios. Te tēe cáscuáha jíin máa ní, ¿naun tu cása ha de súcuan?

¹⁵ Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu cucuíhyá ni ñayuu cáhīin vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chi condite ni i.

¹⁶ Te ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnúhun jenahán. Achí yá:

Ni ñin tu náchuhun ñin pedazo sahma jéé núu ñin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnu ga nuū catáhdé un. ¹⁷ Te suni tu cáchuhun vino jeé ini ñií túhú. Chi núu súcuan te ndatā ñií ún, te naa vino jíin ñií. Chi cánuú jéé chúhun i vino jeé ini ñií jéé, te súcuan te quéndōo vāha ndindúú. Achí yá.

Jnūhun sēhe síhí Jairo jíin ñahan ní quehé yusáhma ya
(Mr. 5.21-43; Lc. 8.40-56)

¹⁸ Te níni cáhán Jesús táca jnúhun yáha, te ñin tēe cújéhnu nuū ñáyuu hebreo, ni quee de nuū yā. Te ni jecuiñī yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuiñī Jesús, te cuahān yā jíin de, te suni cuangoo tēe cáscuáha jíin yá. ²⁰ Te mēhñu ñáyuu cuangoo jíin yá ni quee ñin ñahan, te je ni cuu uxī uū cuiyā ndóho ña cuehyī niñī. Te ni quee ña ichi yátá yā, te ni quehé ña yusáhma ya. ²¹ Chi ni jeni ni ña: Vēsú maá sahma ya na níhín rī quehé rí, te nduvāha rī, jéni ni ña. ²² Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha rī rohó, te jeé yúcuan ní nduvāha ró, áchí yá.

Te ni nduvāha ña máa hora un.

²³ Te ná ni jinū Jesús vehe tēe cújéhnun ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásávaā i. ²⁴ Te ni cahān yā jíin i:

Cujiyo jíināhan ró, chi sūchi sǎhí yáha, tu ní jíhí i chi quíxí-ni i, áchí yá.

Te ni cajecū catá i jeē ni cáhān yā. ²⁵ Te ni quenehen ya ñáyuu cuehē ún, te ni quívi ya ini vehe. Te ni jniñ ya ndaha sūchi sǎhí ní jíhí ún, te ni ndocuiñi-ni i. ²⁶ Te ní región yūcuan ní jíitē núu jnūhun jniñu jéhnun ní sáha ya ún.

Jeē ní nasávāha ya uū tēe cuáá

²⁷ Te ni quenda Jesús yūcuan cuáhān yā. Te uū tēe cuáá cuángoo de yatá yā, cácana jee de:

Máa ní jeē cúu ní Sēhe yucūn David, cundáhú ni ní sáña víi, achí de.

²⁸ Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cá candíje ró jéē cúu nanune ri tinūu ró? achí yá.

Te ni cacahān de:

Cá candíje ná, achí de.

²⁹ Yūcuán na te ni tee ya ndaha ya tinūú de, te ni cahān yā:

Na sáha ri nájnūhun cá candíje ró, achí yá.

³⁰ Te ni cananune-ni tinūú de. Te Jesús ni cahān nihin ya jíin de:

Ma cáchi cuíti rō nuū ni ñin, achí yá.

³¹ Te máa de chi ni quendacoo de, te ni cajete-ni de jnūhun ní región yūcuan jéē súcuan ni sáha ya jíin de.

Jeē ní nasávāha ya ñin tēe ñíhín

³² Te nuū ní quendacoo tēe un cuángoo de, te ni quecoo ñáyuu jíin ñin tēe ñíhín, jeē núhun tachí ini de. ³³ Te ni

quenehen ya tachī un cuáhān. Te tēe ñhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuítī yō ni ñn jniñu súcuan ini ñuu Israel, achí i.

³⁴ Te tēe grupo fariseo chi ni cacahān de:

Tēe yáha chi quenehen de tachī jíin fuerza maá jexeén jeē cujéhnū nuū tachī, achí de.

Jeē cundáhu ni yā ñayuu cuehē

³⁵ Te ni jica cuu Jesús tēcá ñuu jíin rancho, te ni steén yā jnūhun ini tēcá vehe iī sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuñū na-ni cuehyī cándoho i. ³⁶ Te cundáhu ni yā jíto ya nuū ñáyuu cuehē ún. Chi cándoho i te cácuñíhyá ni i, chi cácuu i nájnūhun lanchi jeē tú jito ho tī, chi tu ndíquín i Yaā cúu Jito ho i. ³⁷ Yūcuán na te ni cahān yā jíin tēe cáscuáha jíin yá:

Ñayuu yáha cácuu i nájnūhun trigo jeē tahndé, te ndāa jeē cuehē cúu, te tēe cahnde chi jecu-ni de cúu. ³⁸ Núu súcuan te cacān tahu rō nuū maá Jíto ho rō Yaā Dios jeē na tájí yá cuehē tēe na quíngoo de cahnde de trigo, cúu jeē nácani de jnūhun ya nuū ñáyuu. Achí yá.

Jeē ní nacāji ya uxī uū tēe apóstol

(Mr 3.13-19; Lc. 6.12-16)

10

¹ Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēe nasávāha de ñayuu cácuñū tēcá ndínuū cuehyī.

² Te yāha cúu síhví ndíhúxí uū tēe apóstol un: Tēe ñn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan.

³ Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jiín Lebeo jeē suni nání Tadeo, ⁴ jiín Simón tēe grupo cananista, jiín Judas Iscariote, tēe jeē ní nastúu de ya.

*Jeē ní tají yá ndihúxí uū de quinacani de jnūhun
(Mr. 6.7-13; Lc. 9.1-6)*

⁵ Te ni tají Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró táca ñuu ñayuu Samaria. ⁶ Chi nuū maá-ni ñayuu nación yō Israel quíngoo ró, chi cácuu i nájnūhun lanchi jeē ní sana. ⁷ Te jeē quíngoo ró te suhva nacani ró jnúhun: Je ni cuyajni Yaā ndeé andiví jeē ndacu ya jniñu nuū rō, achi rō. ⁸ Te nasávāha ró ñáyuu cándoho cuehyī stehyú jiín ñáyuu cándoho tāca gá cuehyī, te nastécu rō ndīyī te quenehen ró táchī ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jiín i.

⁹ Te ma cóndiso ró xúhun oro, ni xūhun plata, ni centavo cuechí. ¹⁰ Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquī jniñu jeē nácani ró jnúhun nuū ñáyuu, te cánuú coto i róhó.

¹¹ Te na-ni ñuu chí rancho núu ni jinūcoo ró, te yūcuán nducú ró ññ ñayuu vāha, te coyūcu ró vehe i nde quíngoo tucu ró. ¹² Te jeē quíví ró vehe ñayuu ún, te cahān rō jeē na quíji jnūhun ndeyí jnūhun sīñ ni nuū i. ¹³ Te núu ñayuu vāha cácuu i, te jnūhun ndeyí ní cahān rō quendōo siquī i. Te núu nasūu ñáyuu vāha cácuu i, te jnūhun ndeyí ní cahān rō ma quéndōo siquī i. ¹⁴ Te núu íyó ñáyuu jeē tu cájetáhú i róhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē

tu ní cájetáhú i. ¹⁵ Jendaá cahán rī jíín ró jeē quivī juicio te xeēn gā coo castigo siquī ñuu casáha súcuan vēsú siquī ñuu Sodoma jíín ñuu Gomorra nuū ní casáha ndasí ñáyuu cuēchi.

Jeē coto xeēn ñayuu de jíínáhan de

¹⁶ 'Cuni sōho ró, chi tájí rí rohó quíngoo ró nájñūhun lanchi mēhñu yfñī. Núu súcuan te coo listo rō nájñūhun coō, te coo vitá ni rō nájñūhun paloma. ¹⁷ Te condito ró máá ró nuū ñáyuu, chi quee quivī jeē quíndeca i rohó núū tohó, te cani i rohó ini tācá vehe īi sinagoga. ¹⁸ Te suni nde nuū tācá gobernador jíín rey quíndeca i rohó jēē siquí ruhū. Te súcuan te nune ichi jeē nacani ndaā rō jñūhun ri nuū de jíín núū ñáyuu tācá nación jeē tu jíní jñūhun Yaā Dios. ¹⁹ Te núu ni jendeca i rohó núū tāca tēe ún, ma nácani ndasí ni rō ndese cahān rō. Chi máá hora un te máá yá steén nuū rō ndese cahān rō. ²⁰ Chi nasūu máá ró cúu jeē cahán, chi Espíritu maá Tátá rō cúu jeē cahán jíín yuhu ró.

²¹ 'Te sava ñayuu tu cá candíje, nastúu i ñani i jeē na cúu. Te tátá nastúu sēhe. Te sēhe ndonda siquī tatá jíín náná jeē na cúu. ²² Te ndíhi ñayuu quitī ni i nuū rō jeē siquí ruhū. Te ñayuu jeē cuiñi ñihin nde jeē jínu jñūndóho, ñayuu ún chi cācu ánuá i. ²³ Te núu cájito xeēn i rohó ñin ñuu, te cunu ró quíhñ rō ñnga ñuu. Chi jendaá cahán rī jíín ró jeē ma ndécāva ró caca cuu ró ndíhi nación yō Israel te ndiji-ni máá rí, Yaā ní nduu tēe.

²⁴ 'ñin tēe scuáha, tu cújéñnu de nuū maestro de. Ni tēe cúu mozo, tu cújéñnu de nuū patrón de. ²⁵ Tēe scuáha chi nájñūhun ndóho maestro de suni súcuan ndoho nahín máá de, te tēe cúu mozo suni ndoho de nájñūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ìn cúu jeē yūhu yó
(Lc. 12.2-9)

²⁶ 'Núu súcuan te ma yūhu ró coto ró ñáyuu. Chi tāca jnúhun cácahān sāhí i ma quéndōo sāhí cuiti, chi ndíhi natūu ndijin, te cuni ñayuu. ²⁷ Jnúhun ní cahān rī jín ró jeē tu ní jíní ñayuu, na nácastūhun cájí ró nuū i. Te jnúhun ní nacani sāhi rí nuū rō, na nacani jee ró yátā tācá vehe. ²⁸ Te ma yūhu ró coto ró ñáyuu cahni yiquí cúñu rō, chi ma cúu cahni i ánuá rō. Chi sa suhva yūhu ró jéē ma stívi ró núu Yaā Dios, chi cuu snáhnú ndetū yā rohó jéē quívi ánuá rō jín yiquí cúñu rō infierno.

²⁹ 'Te tācá saa chi tú yahu ndéé tī, chi nde uū tī jeē ìn centavo lulí. Te ni ìn tī tu nínga nuū ñúhun te núu tu jéhe Tátá rō jnúhun, chi ndíto ya tī. ³⁰ Te nagā ni cuu rōhó jijnáhan ró, chi nde ndíhi ixi xíní rō je ni cahu ya. ³¹ Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

Ñayuu jejnúhún Jesucristo nuū inga ñayuu
(Lc. 12.8-9)

³² 'Te tāca ñáyuu jeē cuajnúhún rúhū nuū inga ñayuu, suni súcuan cuajnúhún rí i nuū Tatá rī, Yaā ndeé andiví. ³³ Te tāca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tatá rī, Yaā ndeé andiví.

Jeē siquí Jesús te cusín ini ñayuu
(Lc. 12.51-53; 14.26-27)

³⁴ 'Ma cáni ni rō jijnáhan ró jéē véji ri jeē cóyūcu mání ñayuu ñayíví. Tú véji ri jeē cóyūcu mání ñayuu, chi sa suhva cuajnáhan i jeē siquí ruhū. ³⁵ Chi jeē siquí ruhū te cusín ini sēhe yí jín tátá, te sēhe síhí jín náná, te sēhe jēnu jín náná chísó. ³⁶ Chi tāca ñáyuu candíje ruhū, chi jnáhan vehe i cúu jeē quitī ni nuū i.

³⁷ Te núu ndé ñn ñayuu manī gā i jíin tátá i chí jíin náná i vēsú jíin rúhū, nasūu ñáyuu vāha cúu i jeē cóndiquīn i ruhū. Te núu ndé ñn ñayuu manī gā i jíin séhe yí i chí jíin séhe sǎhí i vēsú jíin rúhū, te suni nasūu ñáyuu vāha cúu i jeē cóndiquīn i ruhū. ³⁸ Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquīn i ruhū, nasūu ñáyuu vāha cúu i jeē cóndiquīn i ruhū. ³⁹ Te núu ndé ñáyuu cúní i cācu i nuū jnūndóho quiiji nuū i jeē siquí ruhū, núu súcuan te jnahnū ndetū i nǎ cáni. Te núu ndé ñn ñayuu vēsú na cúu i jeē siquí ruhū, te cotecu i nǎ cáni.

Jeē iyó táhū yō nuū Yaā Dios
(Mr. 9.41)

⁴⁰ Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū vēji ri. ⁴¹ Núu na-ni ñayuu cuatáhú i ñn tēe nácani jnūhun Yaā Dios, siquí jeē jíca de jniñu Yaā Dios, núu súcuan te ñnuú-ni coo tahū de nuū Yaā Dios jíin tēe nácani jnūhun Yaā Dios. Te núu na-ni ñayuu cuatáhú i ñn tēe ndaā, siquí jeē tēe ndaā cúu de, núu súcuan te ñnuú-ni coo tahū de nuū Yaā Dios jíin tēe ndaā. ⁴² Te núu ndé ñáyuu cuāha i vēsú ñn ñajin ndute mǎjin coho ñn sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

Jeē ní tají Juan uū tēe nuū yā
(Lc. 7.18-35)

11

¹ Te ná ni jīnu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

² Te íne Juan vecāa. Te ni nihīn de jnūhun tācá jniñu sáha Cristo. Te ni tají de uū tēe cáscuáha jíin de, ³ cuacajñūhún de ya:

¿A máá ní cúu Cristo jeē achí tutu jeē quíji, chí condetu yó inga tēe quiji? áchí de.

⁴ Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnúhun cájini ró. ⁵ Te cachi rō nuū de jeē ñáyuu cuaá cánanune tinūú i, te ñáyuu yacué cánacaca i, te ñáyuu ndóho cuehyī stehyú cánduvāha i, te ñáyuu sohó cánanune sōho i, te ñáyuu jihí nátecu i sáha ri. Te suni nácani ri jnūhun nuū ñáyuu ndahú jēē jnama Yaā Dios i. ⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuán cachi rō nuū Juan. Achí yá jíin de.

⁷ Te náa cuanuhun ndindúú tēe ún, te ni quejéé Jesús cahán yā jnūhun Juan jíin ñáyuu:

¿Na vé ni jécondēhe ró jijnáhan ró nde nuū ñúhun téhé? ¿A ñn tēe jéni ñn jéni uū ni, nájnūhun ite jeē cánda sáha tachí? ⁸ Te núu tuú, ¿te na vé ni jécondēhe ró núu súcuán? ¿A ñn tēe cúní cujéhnu jeē ñúhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyūcú de. ⁹ ¿Te na vé ni jécondēhe ró núu súcuán? ¿A ñn tēe nácani jnūhun Yaā Dios? Cáhán rī jíin ró jeē suu ni jécondēhe ró, te cújéhnu ga Juan yáha vēsú tāca gá tēe ni canacani jnūhun Yaā Dios. ¹⁰ Chi jnūhun Juan cúu jeē ni cáhān Yaā Dios jeē yosó núu tútu íi:

Tají rí tēe nacani jnūhun ri cosnūú de ichi núú Cristo, návāha coo tūhva ñáyuu jeē jinú yā.

Achí Yaā Dios, achí tutu. ¹¹ Te jendaá cahán rī jíin ró jeē ini ñayīví yáha cújéhnu ga Juan tēe scuándute vēsú tāca gá tēe jeē ni íyo ini ñayīví. Te vēsú súcuán te tāca tēe núu ga ini ñuu nuū ndácu Yaā andiví jniñu, cújéhnu ga de vēsú Juan.

¹² Te nde quivī ní quee Juan tēe scuándute, te nde vijna, chi cánducú ndéyí ñáyuu quívicoo i ndaha Yaā andiví jéé ndácu ya jniñu nuū i. Te nde ñáyuu xeēn cánducú ndéyí i síquī. ¹³ Chi nde ná tu quiji Juan, te ni iyo máá ley Moisés, te suni ni iyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴ Te ni cacahān de jeē ndíji Elías. Te núu cácuni rō cuatáhú ró jnūhun, te jíní rō jeē maá Juan cúu tēe jeē ní cachi tutu jeē quiji, chi cúu de nájñūhun Elías. ¹⁵ Tāca róhó jéé jíní sōho, na chúsóhó ró.

¹⁶ Yāhá cachi rī ñn jnūhun yátá návāha na cúni rō ndese cúu ñáyuu tiempo vijna. Cúu i nájñūhun sūchi lúlí cáhiin nuū yáhu cácasíquí i. Te cácana ndee i xinī jnáhan i: ¹⁷ Ni cativí rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúlí un jéé tu ní núnahan ni i ni ñn, súcuan cándāa ró. ¹⁸ Chi ni quiji Juan te cuehē jínu ni iyo ndite ni de, tu ní yéji de ni tu ní jíhi de. Te tu ní cánujnahan ni rō, chi ni cacahān rō jeē ñūhun tachī ini de. ¹⁹ Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni rō, te chísoó jnúhun ró cácahān rō jeē máni máá jéé yéji rī jíhi ri vino. Te quíjnahan ri jíin tēe cástútú xúhun renta jíin táca gá tēe cásaáha cuēchi, achí ró. Te núu cúndichí ñn tēe jíin jnúhun Yaā Dios, te jíin jniñu sáha de te nátūu jeē tēe ndíchí cúu de. Achí yá.

Jeē ní cuxeēn yā nuū sava ñuu niñni ni

(Lc. 10.13-15)

²⁰ Yūcuán na te ni quejéé yá cúxeēn yā nuū tācá ñuu nuū ni sáha ya cuehē jniñu jéhnu, chi tu ní canacani ni i jeē stóo i cuēchi i. Te ni cahān yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhnu jeē ni sáha ri ini

ñuu maá ró, te yachī nacani ni ñayuu ñuu un jéē stóo i cuéchi i núú. Te sáha i seña jeē steén jeē nácani ni i siquī cuéchi i, chi kuhun i sahma jnúú te chuhun i yaā xinī i núú. ²² Núu súcuan te cáhán rī jíin ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón. ²³ Te róhó ñáyuu ñuu Capernaum, ¿á cájeni ni rō jeē cujéhnun ró nájñūhun ñin jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyí. Chi núu ini ñuu Sodoma ni sáha ri jniñu jéhnun jeē ni sáha ri nuū maá ró, te coo ñuu yúcuan ndé vijna núú. ²⁴ Núu súcuan te cáhán rī jíin ró jeē quivī coo juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

Nehen nuū rī ndetātu ró, achí yá

(Lc. 10.21-22)

²⁵ Te suni quivī un ní cahān Jesús:

Na cútahū na núu ni Tátā, Jitoho andiví jíin ñáyiví. Chi ni jesi ní táca jnúhun ndíchí ní, jeē ma cūni ñayuu ndíchí jíin ñáyuu tūhva cuenta ñayiví yáha. Te ni steén ni núu ñáyuu cácuu nájñūhun sūchí lúli. ²⁶ Chi súcuan ni nujnahān ni ni Tátā, achí yá.

²⁷ Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñin cúu ruhū, Sēhe Yaā Dios, chi máa-ni Tátá rī cúu jeē jiní yā ruhū. Ni tu cájini ñayuu ndese Yaā cúu máa Tátá, chi máa-ni Sēhe cúu jeē jiní. Te íyo ñáyuu jeē cuní maá Séhe steén yā nuū i ndese Yaā cúu Tátá yā, te máa i suni cuni i. ²⁸ Tāca ró jéē ni cuíta ró jíin táca jniñu jíin ley jeē yí sáha jíin ró, nehen quivīcoo ró ndaha ri, te ndetātu ró sáha ri. ²⁹ Quiví ró núu jniñu ndácu máa rí, te scuáha ró coo ró nájñūhun íyo máa rí. Chi vitá ni rī te suchí ni rī. Te súcuan

te ndetātu ró jín ánuá rō sáha ri. ³⁰ Chi tú yí jéē cuandetū rō nuū rī, ni tú yí jéē squícu ró jniñu ndácu ri. Achí yá.

Jeē ní cataxín de yoco trigo quivī ndétātú
(Mr. 2.23-28; Lc. 6.1-5)

12

¹ Te ñn quivī ndétātu ní yāha Jesús cuahān yā nuū cáa trigo. Te tēe cáscuáha jín yá, cáji de sōco. Te ni quejé de cátaxín de yoco trigo cáyeji de. ² Te ni cajito tēe grupo fariseo, te ni cacahān de jín yá:

Condēhé, chi tēe cáscuáha jín ró casáha de jniñu jeē tu íyó váha sáha yó quivī ndétātú, áchí ley Moisés.

³ Te ni cahān maá yá jín de:

¿A tu ní cácahu ró tutu ndese ni sáha David, ñn quivī jeē ni jí de sōco jín tēe cáhiin jín de? ⁴ Te ni quivī de ini vehe Yaā Dios. Te ni yeji de pan ñ jeē yosó ndijñ nuū Yaā Dios. Te tú na ley jeē cáji de, ni tēe cáhiin jín de, chi máa-ni sutū cuu caji. Te vēsú súcuan te tú na cuēchi ní íyo síquī de. ⁵ ¿Te á tu ní cácahu ró tutu ley Moisés, ndese cásajniñu sutū ini templo, vēsú quivī ndétātu cúu? Te tú na cuēchi íyó síquī de, vēsú quivī ndétātu cásajniñu de jniñu jeē cácuu de sutū. ⁶ Te cáhán rī jín ró jeē maá rí jeē iyó yáha, cújéhu ga rī vēsú templo. ⁷ Te tu cájecūhun ni rō jijnáhan ró jnūhun yáha jeē yosó núu tútu ñ jeē ni cáhán Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quiti nuū rī, achí yá. Te núu jeē ní cajecūhun ni rō jnūhun yáha, te ma cahán rō súcuan síquī tēe jeē tú na cuēchi núu. ⁸ Chi ruhū, Yaā ní nduu tēe, máa rí cúu jeē ndácu jniñu síquī ndese sáha ñayuu quivī ndétātú, áchí yá.

Jeē ní nduvāha tēe ni ichī ndaha
(Mr. 3.1-6; Lc. 6.6-11)

⁹ Yūcuán na te cuahān Jesús, te ni quivī ya ini vehe īi sinagoga. ¹⁰ Te yūcuan íne ĩn tēe ni ichī ĩn ndaha de. Te cācuni tēe grupo fariseo jeē nihīn de cuēchi siquī yā, te ni cacajñūhún de ya:

¿A íyó ley jeē cuu nasávāha yó ñayuu cuhú quivī ndétātú? áchí de.

¹¹ Te ni cahān yā jíin de:

¿Ndé ĩn róhó, núu névāha ró ĩn lanchi, te núu nínga tí ini ĩn yaū quivī ndétātú, te á tu jéhén rō natava rō tī, chí naún? ¹² ¿Te á tu cánuú ndasí gá ĩn tēe vésú ĩn lanchi? Núu súcuan te vetū-ni sáha yó jniñu váha quivī ndétātú, áchí yá.

¹³ Yūcuán na te ni cahān yā jíin tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájñūhun íyó inga.

¹⁴ Yūcuán na te ni quendacoo tēe grupo fariseo, te ni candajñūhún de siquī Jesús, ndese cahni de ya.

Jñūhun Jesús jeē ni cáhān Isaías nde jenahán

¹⁵ Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquīn i ya. Te ni nasávāha ya ndīhi ñayuu cuhú. ¹⁶ Te ni ndacu ya jniñu nuū i jeē ma stéén i ya. ¹⁷ Te súcuan ni cuu návāha squícu jñūhun ni cahān Yaā Dios siquī Jesús, te ni nacani Isaías jñūhun ya un ndé jenahán:

¹⁸ Yāha cúu mozo rī jeē ní nacāji ri, te manī rī jíin yá, te cúsihī ni rī jíin yá.

Te cuāha ri Espíritu rī coo jíin yá.

Te máá yá sándaā jniñu ñayuu tācá naciún.

¹⁹ Ma tejnáhan ya, ni ma cána jee ya, te ni ma cahán jee ya ichi jeē cúni ñayuu.

²⁰ Ma sáha xeēn yā jíin ñáyuu ni cunīhin jñūndóho siquī, ni ma snáá yā ñayuu jeē maá lulí-ni cācandíje.

Chi cujéhnū ya siquī ndīhi, te ndaā ndacu ya jniñu.

²¹ Te ñayuu tǎcá nación cocuhun ni i jeē jnáma ya i. Achí Yaā Dios, achí Isaías nde jenahán.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²² Yūcuán na te ni caquindeca i nuū yā ñin tēe cuáá ññhñ, chi ñúhun tachī ini de. Te ni nasávāha ya de. Te ni ndundijin tinūú de te ni nacahān de. ²³ Te ndíhi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhnú nuū tachí, áchí de.

²⁵ Te Jesús ni jini yā jeē súcuan cájени ni de, te ni cahān yā jíin de:

Tǎcá nación jeē casásñin máá te cájejnáhan máá, núu súcuan te snáá jeē iyó váha máá. Te núu ñin ñuu chí ñin vehe casásñin máá te cájejnáhan máá, te ma cúu ga coyūcu cáhnu. ²⁶ Te suni súcuan Satanás núu quenehen jnáhan tachí, núu súcuan te sásñin máá. ¿Te ndese cuiñi ñihin Satanás jeē ndácu jniñu núu súcuan? ²⁷ Chi cácahān rō jeē jíin fuerza Satanás quenehen ri tachí. Te núu súcuan cúu núú, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachí, cájени ni rō? Núu súcuan te máá i jijnáhan i cachi jeē ní castívi ndasí suhva ró ni cacahān rō jeē cáquenehen ri tachí jíin fuerza Satanás. ²⁸ Te tuú chi sa jíin Espíritu Yaā Dios cúu jeē quenehen ri tachí. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quívi ñin tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de

ndajníñu ún. Te suni súcuan cúu jeē jíñni rī Satanás te quénehen ri tachī.

³⁰ Te ñayuu tu íyó mánī jíñ rí, núu súcuan te jíto uhū i ruhū. Te ñayuu tu nástútú jíñ rí, núu súcuan te sa jéte núu i ñayuu vējicoo nuū rī.

³¹ Jeē yúcuan cáhán rī jíñ ró: Iyó modo coo jñūhun cáhnu ni nuū tāca cuéchi cásáha ñayuu, jíñ núu tāca jñūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. ³² Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayīvi yáha, ni nń tiempo quíji.

Jñūhun yujnu váha jíñ yujnu néé

(Lc. 6.43-45)

³³ Núu yujnu váha, te vāha ndehē, te núu yujnu néé, te cánéé ndehē. Chi jíñ ndéhē te jíní yō ndese yujnu cúu. Te suni súcuan ñayuu. ³⁴ Va sēhe coō cácuu ró, chi xeēn rō nájñūhun coō. ¿Ndese cuu cahān rō jñūhun vāha, chi ñayuu cásáha néé cácuu ró? Chi jniñu jeē jéni ni anuá ñayuu, mání yūcuan cáhán i. ³⁵ Tēe vāha cáhán de jñūhun vāha, chi íyó ndāā anuá de. Te tēe sáha néé cáhán de jñūhun néé, chi cánéé ánuá de. ³⁶ Te cáhán rī jíñ ró jeē tācá na-ni jñūhun cácahān ñayuu, nacuāha i cuenta jñūhun un quívī coo juicio. ³⁷ Chi jíñ jñūhun ni cahān rō sándaā yā siquī rō, núu jeē quéndōo ndāā rō chí jēé cóndee cuéchi siquī rō. Achí yá.

Jeē ní cajicān ñayuu tu cácañdije ññ jniñu jéñnu

(Mr. 8.12; Lc. 11.29-32)

³⁸ Yūcuán na te jecu tēe grupo fariseo jíñ tēe cástéén tutu ley Yaā Dios, ni cacahān de jíñ yá:

Maestro, cǎcuni na jēē sáha ní ñn jniñu jéhnú jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jíín de:

Ñayuu yáha jeē casáha jniñu néé, tu cájetáhu cuiti i Yaā Dios. Te cájicān i ñn jniñu jéhnú jeē steén núu Yaā ní tají Yaā Dios cúu ri. Te tuá na inga jniñu jéhnú stéén rī nuū i, chi máá-ni jniñu jéhnú nájnūhun ni cuu jíín Jonás, tēe ni nacani jnūhun Yaā Dios. ⁴⁰ Chi nájnūhun ni ine Jonás chíji chácá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáá te natecu rī. ⁴¹ Te tāca ñáyuu ñuu Nínive nuū ní nacani Jonás jnūhun, natecu i jíín ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújéhnú ga ruhū Yaā íne yāhá vēsú Jonás, te tu cǎcandíje ró rúhū. ⁴² Te reina jeē ní cújéhnú nación ichi sur, natecu ña jíín ñáyuu tiempo yáha, quivī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnú ga ruhū, Yaā íne yāhá vēsú Salomón, te tu cǎcandíje ró rúhū.

Tachī jeē nastútú jnáhan ndívi ini ñayuu

(Lc. 11.24-26)

⁴³ Núu ni quenda ñn tachī ini ñn tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: ⁴⁴ Na quínuhun rī vehe nuū ní quenda ri. Te núu ni ndee tucu, te jíto jeē tēe tu cándíje ún, cúu de nájnūhun ñn vehe íyú te ni ndundoo. ⁴⁵ Yūcuán na te jéquihín uxā gā tachī neé gá vēsú maá. Te quívicoo ini tēe un jēē cóyūcu yúcuan. Núu súcuan te xeēn gā ndoho tēe un jēē sándíhí vēsú jeē xíhna ñúhún. Te suni súcuan ndoho ñayuu tiempo yáha jeē casáha néé. Achí yá.

Náná yā jíin ñani yā

(Mr. 3.31-35; Lc. 8.19-21)

⁴⁶ Te níni súcuan cáhán yā jíin ñáyuu ún, te ni quee naná yā jíin táca ñani yā, íin ña nuū quéhe, te cúní ña cahān ña jíin yá. ⁴⁷ Te ni cachi ñn tēe nuū yā:

Náná ni jíin táca ñani ni cáhiin nuū quéhe, te cácuni cahān jíin ní, achí de.

⁴⁸ Te ni cahān yā jíin tēe ni cahān súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu tāca jéē yáha. ⁵⁰ Chi tāca ñáyuu casquícu jniñu cúní maá Tátá rī, Yaā ndeé andiví, suu cácuu ñani rī, cuāha ri, náná rī. Achí yá.

Jnūhun yátá síquī tēe jéte trigo

(Mr. 4.1-9; Lc. 8.4-8)

13

¹ Te quivī un ní quenda Jesús vehe cuahān yā, te ni jinū yā ni cucōo ya yumar. ² Te ni cutútú cuéhē ndasí ñayuu nuū yā. Te ni quiví ya ini ñn barco, ni cucōo ya. Te tāca ñáyuu un cáyūcú i yumar. ³ Te jíin jnūhun yátá ni cahān yā cuehē jnūhun nuū i, te súcuan ni cahān yā:

ñn tēe cate trigo, ni quenda de jeē cate de. ⁴ Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayeji tī. ⁵ Te jecu gā trigo ni jitē nuū ñūhun yuū, nuū tú cuehē ñūhun. Te yachí-ni ni cane, chí tu cóquin ñūhun. ⁶ Te nuū ní cane niāndii, te ni ichī-ni, te ni casun, chí tu ní níhín nuū quihín yoho. ⁷ Te jecu gā trigo ni jitē nuū náne iñu. Te ni jehnu iñu ún, te ni jesi nuū. ⁸ Te jecu ni jitē nuū ñūhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī. ⁹ Tāca róhó jéē jíni sōho, na chúsóhó ró. Achí yá.

Najehē cahán yā máni jnūhun yátá

(Mr. 4.10-12; Lc. 8.9-10)

¹⁰ Yūcuán na te tēe cáscuáha jíin yá un ní quecoo de nde nuū yā, te ni cacajñūhún de ya:

¿Najehē cúu jeē máni jnūhun yátá cáhán ni jíin ñáyuu? achí de.

¹¹ Te ni cahán yā jíin de:

Róhó jíjnáhan ró chi sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cá candíje, chi ma jécūhun ni i. ¹² Chi ñayuu je jécūhun ni, chi stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíin i ún. ¹³ Jeē yúcuan cáhán rī jnūhun yátá jíin i. Chi vēsú cájito i, te quendō i nájnūhun jeē tú na vé ni cájito i. Te vēsú cájini sōho i, te ma jécūhun ni i, te quendō i nájnūhun jeē tú na vé ni cájini i. ¹⁴ Ñayuu yāhá chi squícu siquī i jnūhun ni cahán Yaā Dios jeē ní nacani Isaías, tēe ni nacani jnūhun nde jenahán:

Vēsú cuni nahín ró, te ma jécūhun ni rō,

te vēsú coto ró, te ma nácuni rō.

¹⁵ Chi ñayuu yáha yōhyo ni ndunīhni ni i,

te yōhyo uhū chusóhó i,

te nájnūhun cájesi i tinūú i,

návāha coo nájnūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī

jeē nasávāha rī anuá i nuū cuéchi i.

Achí Yaā Dios, achí tutu.

¹⁶ Te máá ró jíjnáhan ró, yōhyo ndetū rō, chi cájito ró jíin tñūu ró, te cájini nahín ró jíin sóho ró. ¹⁷ Chi jendaá cahán rī jíin ró jeē cuehē tēe ni canacani jnūhun Yaā Dios jíin cuéhē tēe ndaā, ni cacuni de coto de jeē cájito máá ró,

te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jeē ní castūhun cájí yá jnūhun yátá tée jéte trigo
(Mr. 4.13-20; Lc. 8.11-15)*

¹⁸ Núu súcuan te cuni nahín jíjnáhan ró na vé cuní cahān jnūhun yátá tée jéte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jítē yuhíchi. Yūcuán na te quíji jexeén te quénde-ni jnūhun ini anuá i. ²⁰ Te trigo jeē ni jítē nuū ñúhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jíín. ²¹ Te tu cúcutú jnúhun ún ini anuá i, te jecu-ni quivī cájetáhú i. Te núu ni quejéé jnúndóho, chí jíto xeēn ñayuu i siquī jnúhun ún, te quejéé nácani yátá ni i. ²² Te jeē ni jítē nuū náne iñu cúu ñayuu cájini nahín jnúhun, te cándihvī ni i siquī jeē iyó ini ñayivī yáha, te cúní i cucúcá i, te stáhú un i cujnēñu i jíín. Te ndíhi jeē yáha jési nuū jnúhun ya, te tu íje i jíín jnúhun ya. ²³ Te trigo jeē ni jítē nuū ñúhun váha cúu nájnūhun ñayuu cájini nahín jnúhun, te cájecūhun ni i, te cáhije i jíín jnúhun ya. Te sava i cúu nájnūhun nunī jeē jéhe ciento jeē ñin ñin, te sava ga i jéhe unī xico, te sava ga i jéhe ocō uxī. Achí yá.

Jnūhun yátá síquī ite lasú

²⁴ Te ni cahān yā inga jnūhun yátá jíín de:

Jeē ndácu Yaā andiví jniñu cúu nájnūhun ñin tēe jeē ní jete de trigo váha nuū ñúhun de. ²⁵ Te iyó ñin tēe jíto uhū de tēe chíí trigo. Te náa cáquixī tēe chíí trigo jíín táca jnáhan de, te ni jehēn ni jete ndiquin lású nuū trigo de, te cuahān. ²⁶ Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahān i jíín patrón i: ¿A násūu trigo váha ní

jéte ní núū ñūhun ní? ¿Te ndese cúu jeē ní canecoo ite lasú nuū? ²⁸ Te ni cahān de jíin i: ñin tēe jíto uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúni ni jéē na quíngoo ná te jnuhun ná? áchí i. ²⁹ Te ni cahān de: Tuú, chi núu jnuhun ró lású un te sanaa te jnuhun ró ndé jíin trigo. ³⁰ Vāha ga na cuéhnu máá ndé quiivī tahndé. Te quiivī un cáhān rī jíin tēe cahnde jeē xihna gā ite lasú cahnde de, te chucú tútú de návāha cahmu yó. Yūcuán na te trigo chi cahnde de ndīvi ini yacā rī, achí de. Áchí yá.

Jnūhun yátá síquī ndiquin mostaza

(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájñūhun jéhnū ñin ndiquin mostaza jeē ní jequin ñin tēe nuū ñūhun de. ³² Te jendaá jeē ñin ndiquin lúli gá cúu vésú tāca gá ndiquin. Te núu ni jehnu, te cúu cáhnu ga vésú tāca gá yucū, chi ndúu nájñūhun ñin yujnu. Te quíjicoo saa, te casáha ti tacā tī chíji ndaha ún. Achí yá.

Jnūhun yátá síquī levadura

(Lc. 13.20-21)

³³ Te inga jnūhun yátá ní cahān yā jíin de:

Jeē ndácu Yaā andiví jniñu nuū ñáyuu cúu nájñūhun levadura jeē ní quihin ñin ñahan. Te ni saca ña jíin úní kilo harina, nde ni ndaa ndihí ñujen ni sáha. Achí yá.

Jeē máni jnūhun yátá cáhān yā jíin i

(Mr. 4.33-34)

³⁴ Tāca jnúhun yáha ní cahān Jesús jíin ñáyuu cuehē ún. Te tāca jéē ni stéén yā, máni jnūhun yátá ní cahān yā jíin i. ³⁵ Súcuan ni sáha ya návāha squícu jnūhun ni cahān tēe ni nacani jnúhun Yaā Dios nde jenahán: Cahān rī tāca jnúhun yátá jíin ñáyuu,

te cachi rī tāca jnūhun yísāhí ndé quivī ní jecōo ñayīví.
Achí tutu, áchí yá.

Jeē ní castūhun cájí yá jnūhun ite lasú

³⁶ Yūcuán na te ni nacuatáhu Jesús nuū ñáyuu. Te ni ndīví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cájí ní jnūhun yátá ite lasú nuū ná, áchí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. ³⁸ Te ñuhun un cúu ñayīví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹ Te tēe jíto uhū jeē ní jete lasú un cúu máá jexeén. Te quivī tahndé cúu quivī jínu ñayīví. Te tēe cahnde un cácuu ndajéhé Yaā Dios. ⁴⁰ Te nájnūhun tahndē ite lasú te cayū nuū ñuhún, súcuan coo quivī jínu ñayīví. ⁴¹ Chi máá rí, Yaā ní nduu tēe, tajj rí ndajéhé rī quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū. ⁴² Te jnaa ya i cayū i nuū ñuhún. Te yūcuan ndáhyū i te nacayīhí yuhu i jeē ndoho xeēn i. ⁴³ Yūcuán na te ñayuu squícu nuū yā chi ndindēé i nájnūhun niāndii, te coyūcú i nuū ndácu máá Tátá i jniñu. Tāca róhó jeē jíni sōho, na chúsóhó ró.

Jnūhun yátá síquī yejnū xūhún jeē yísāhí

⁴⁴ Te jeē ndácu Yaā andíví jniñu nuū ñáyuu, suni cúu nájnūhun ñin yejnū xūhún jeē yísāhí chíji ñin ñuhun. Te ni nanihñ ñin tēe, te ni nacasi tucu de síquī. Te jeē cúsiñ ni de jíin, te ni jehēn de ni xícó ndīhí de jeē névāha de, te ni jeen de ñuhun ún.

Jnūhun yátá síquī perla jeē ndeé yahu

⁴⁵ 'Te jeē ndácu Yaā andiví jniñu nuū ñáyuu, suni cúu nájñūhun ñin tēe jéen xíco, te ndúcú de perla váha. ⁴⁶ Te ni jini de ñin perla jeē yáhu ndasí, te ni jehēn de ni xíco ndiñi de jeē névāha de, te ni jeen de perla un.

Jñūhun yátá síquī ñunu jñí chācá

⁴⁷ 'Te jeē ndácu Yaā andiví jniñu nuū ñáyuu, suni cúu nájñūhun ñin ñunu jeē cásingava de ini mar, te quívicoo ndinuū chācá. ⁴⁸ Te núu ni chitú ñunu ún, te cánatava de yundúte. Te cáucūo de cánacāji de chācá. Te chācá váha cájnaa de ini jica, te chācá tú vāha cáscáne de. ⁴⁹ Te suni súcuan coo quíví jínu ñayiví. Chi quijicoo ndajéhé yā, te sásñin ya ñayuu casáha jniñu néé méhñu ñáyuu casáha jniñu váha. ⁵⁰ Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jñūhun yátá síquī ndajniñu ndéé yahu

⁵¹ Te ni cajñūhun yá de jijnáhan de:

¿A ní cajecūhun ni rō tāca jnúhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

⁵² Te ni cahān yā jíin de:

Iyó váha núu súcuan. Te ñin tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun síquī ún. Chi cúu de nájñūhun ñin tēe chíí vehe. Te ini yejnū de táva de ndajniñu ndéé yahu, sava jeē jeé jíin sava jeē je ni cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndiñi ni cahān Jesús tāca jnúhun yátá yáha, te ni quenda ya yūcuan cuáhān yā. ⁵⁴ Te ni najinū yā ñuu yā Nazaret. Te ni steén yā jnúhun ini vehe ñi sinagoga

yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnúhun ndíchí? ¿Te ndese cúu sáha de tācá jniñu jéhnú yāhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶ Te suni cáyūcu cuáha de jíin yó yāhá. ¿Te ndese jíin de tāca jnúhun yáha núu súcuan? Achí ñayuu.

⁵⁷ Te súcuan ni cacujēē ni i nuū Jesús. Te ni cahān yā jíin i:

Tāca tēe nácani jnúhun Yaā Dios, íyó yíñúhún ñayuu jíin de, te máni ñayuu ñuu maá de jíin ñáyuu vehe máá de cúu jeē tu íyó yíñúhún jíin de. Achí yá.

⁵⁸ Te tu ní sáha ya cuehē jniñu jéhnú yūcuán, chi tu cácandíje i ya.

*Jeē ni jíihī Juan tēe scuándute
(Mr. 6.14-29; Lc. 9.7-9)*

14

¹ Te tiempo yúcuan te Herodes, tēe ndácu jniñu región Galilea, ni jini jnúhun de jnúhun Jesús. ² Te ni cahān de jíin ñáyuu cáhiin jíin de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhnú. Achí de.

³ Chi Herodes, je ni ndacu de jniñu jeē na quívī Juan vecāa, jíin jēē na cónuhnī de jíin cadena. Súcuan ni sáha de jeē siquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu íyó ley condeca ró ña, áchí de.

⁵ Te jeē yúcuan ní cuni Herodes cahni de Juan. Te yúhú de jeē quitī ni ñayuu, chi ndihī i jéni ndije ni i jeē ñin tēe nácani jnúhun Yaā Dios cúu Juan. ⁶ Te ñin quivī ni sáha Herodes ñin vico quivī ní cacu de. Te sēhe sñhí Herodías ni

quīvi i ni jita jéhé i nuū ñáyuu ní cana de ún. Te ni cusī ni Herodes ni sáha i. ⁷ Te ni jejnūhun téyí de jeē cuáha de núu na vé cacān i nuū de. ⁸ Te ni jehēn i ni cajnūhún i náná i na vé cacān i. Te ni ndīvi i nuū Herodes, te ni cahān i:

Cuāha ní xínī Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuíhyá ni de. Te siquē jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuán ní ndacu de jniñu jeē na cuáha nuū i. ¹⁰ Te ni tají de soldado jeē na quícahnde xini Juan ini vecāa. ¹¹ Te ni quee soldado un jíin xini Juan, íne nuū ñn cohō, te ni jēhe nuū súchi sñhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jnūhun, te ni cujiyo ya yūcuán cuáhān yā jíin barco, jeē cóne sñn ya ñn lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhé i, cuajnahān i ya. ¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñu jeē véjicoo i jíin. ¹⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuán te tají ní ñayuu na quíngoo i tācá ñuu, te cuaan i jeē cáji i.

¹⁶ Te ni cahān Jesús jíin de:

Tu jíini ñúhún quíngoo i, chi cuāha máá ró jeē cáji i, achí yá.

¹⁷ Te ni cacahān de jíin yá:

Tú na vé cánevāha ná yáha, chi uhūn-ni staā jíin úū-ni chācá, áchí de.

¹⁸ Te ni cahān yā jíin de:

Cuāha na quíji, áchí yá.

¹⁹ Te ni cahān yā jíin ñáyuu un jéē na cúcōo i nuū íte. Te ni quihin ya ndihúhún staā jíin úū chācá un. Te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū téē cáscuáha jíin yá. Te máá de ni casaja de nuū ñáyuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxí uū jica. ²¹ Te tēe ni cayeji un cúu nájñuhun uhūn mil, te sñin ga cúu ñahan jíin súchi lúlí.

Jeē ní jica jéhé yá nuū mar

(Mr. 6.45-52; Jn. 6.16-21)

²² Yūcuán na te ni cahān-ni Jesús jíin téē cáscuáha jíin yá jeē na quívicoo de barco, te cosnūú de quingoo de nde inga lado mar, níní jéē nátají yá ñayuu un quínungoo i. ²³ Te nuū ní cuu ni nacuatáhú yá nuū i, te máñuhún-ni ya ni caa ya yucu, cuacacān tahu yā. Te ni cuaa, te íne máñuhún yá yūcuán. ²⁴ Te barco un, je ni cuu sava nuū mar cuahān. Te ndute mar un nátundahá níhin barco, chí vēji tachí ichi núú de. ²⁵ Te jeē yínee gā ni quee Jesús nuū de, jica jéhé yá nuū mar. ²⁶ Te tēe cáscuáha ún, ni cajito de ya jeē jica ya nuū mar. Te ni candondava de, te ni cacana cóhó de jeē cáyuhú de.

Jíhná cúu, áchí de.

²⁷ Te ni cahān-ni Jesús jíin de:

Ndeyí coo ni rō, te ma yūhu ró, chí máá rí cúu, áchí yá.

²⁸ Yūcuán na te ni cahān Pedro jíin yá:

Núu máá ní cúu, te cahān ni jíin ná jéē na cáca jéhé ná nuū mar te jeē na núu ní, áchí de.

²⁹ Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. ³⁰ Te nuū ní jini de jeē níhin yǎhi tachī, te ni yūhú de. Te ni quejéé de quée de chíji ndute. Te ni cana cóhó de:

Jnama ní sáña, áchí de.

³¹ Te Jesús ni jniñ-ni ya ndaha de. Te ni cahān yā jíin de:

Tēe tu cándíje níhin cúu ró. ¿Naun ni nayūhu ró? Achí yá.

³² Te ni quǎvi ya ini barco un jíin de, te ni jecuiñī-ni tachī. ³³ Yūcuán na te tēe cáhiin ini barco un, ni cajecuiñī yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuñi región Genesaret

(Mr. 6.53-56)

³⁴ Te ni quenda jíyo ya jíin de nuū mar un, ní jinū yā región Genesaret. ³⁵ Te ñayuu yūcuán ní canacuni i ya. Te ni cascáca i jñuhun tācá ndañúu yūcuán jeē ni jíin yā. Te ñayuu ni caquindeca i ñayuu cácuñi nuū yā. ³⁶ Te ni cacahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha i.

Siquī ndese cújnehén ñáyuu

(Mr. 7.1-23)

15

¹ Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

² Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

³ Te Jesús ni cajñuhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre maá ró cúu jeē

casquícu ró. ⁴ Chi ni cahān Yaā Dios: Coó yíñúhún ró jíin tátá rō jíin náná rō. Te núu ndé ñin cahān síquī tatá chí síquī naná, na cúu nahín, áchí Yaā Dios. ⁵ Te máá ró chí cácahān rō jeē cuu cahān ñin tēe jíin tátá de jíin náná de: Ma cúu chindéé ñáhán ná níhín cuáha na jēe cáji ni jēe cúhun ní, chí ndíhi jeē névāha ná, je ni socō na núu Yaā Dios. ⁶ Te tēe cahān súcuan, tuá cánuú chindéé ñáhán de tátá de náná de, áchí ró jíjnáhan ró. Te súcuan cástívi ró jniñu ní ndacu Yaā Dios, jeē síquí costumbre ni cajequin máá ró. ⁷ Tēe stáhú-ni cácuu ró. Ndaā ni nacani Isaías jñūhun síquī rō nde jenahán, yósó núu tútu ñi jeē ni cáhān Yaā Dios:

⁸ Ñayuu yáha chí máá yuhu-ni i cájetáhú i ruhū,
te nasūu ndé jíin ini jíin ánuá i.

⁹ Te cáchiñúhún sáá-ni i ruhū,
chí jñūhun cástéén i cúu jniñu ní candacu tēe,
te nasūu jēe ní ndacu máá rí cúu.

Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jíin i:

Cuni sōho vāha jíjnáhan ró, te chuhun ni rō: ¹¹ Nasūu jēe quívī ini yuhu ñayuu cujnéhén i sáha. Chí jñūhun jeē quénda yuhu i, yūcuan cúu jeē cujnéhén i sáha, áchí yá.

¹² Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíiní ni jēe ní caquitī ni tēe fariseo jeē ní cajini sōho de jñūhun ni cahān ní? áchí de.

¹³ Te ni cahān máá yá:

Cácuu de nájnūhun yujnu jeē tu ní náchuhun Tátá rī, Yaā ndéé andívī, te ñin quívī te jñuhun ya quihīn. ¹⁴ Na quíngoo máá de. Chí cácuu de nájnūhun tēe cuáá cástéén ichi nuū ñnga tēe cuáá. Chí núu ñin tēe cuáá stéén de ichi nuū ñnga tēe cuáá, te ndíndúú de ñinga de xehvā. Achí yá.

¹⁵ Te ni cahān Pedro jíin yá:

Castūhun cájı ní jnúhun yátá yáha nuū na jíjnáhan ná, áchı de.

¹⁶ Te ni cahān Jesús:

¿Te á suni máá ró ná tu jecūhun ni rō chí naún? ¹⁷ ¿A tu cájecūhun ni rō jeē tāca jéē yéji ñayuu, chi quívi chíji i, te quénda-ni cuahān? ¹⁸ Te jnūhun jeē quénda yuhu ñayuu, chi nde ini anuá i vēji, te yūcuan cúu jeē cujnéhén i sáha. ¹⁹ Chi nde ini anuá ñayuu quénda jeē jéni néé ni, jeē jéhni ndīyi, jeē casíquí ndéē jnáhan, jeē jíca jnéni, jeē sacuíhná, jeē cahán jnūhun stáhú, jeē cahán yā síquī jnáhan. ²⁰ Tāca jéē yáha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achı yá.

Ñahan inga nación jeē ní candíje nihin

(Mr. 7.24-30)

²¹ Te ni quenda Jesús yūcuan cuáhān yā región Tiro jíin Sidón. ²² Te ĩn ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhı ná, ñúhun tachı ini i, te yōhyo xeē ndóho i, áchı ña jíin yá.

²³ Te tu ní cáhán cuiıi yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhın ña, chi cána jee ña vēji ña yatā yō, achı de.

²⁴ Te ni cahān yā jíin ña:

Nuū maá-ni ñayuu nación Israel ni tajı Yaā Dios sáña véji ná, chi cácuu i nájnūhun lanchi, quiıi ní sana.

²⁵ Te ñahan ún chi ni quee ña, te ni jecuiñı yıtı ña nuū yā, te ni cahān ña:

Tátā, chindéé ñáhán ní sáña víi, achı ña.

²⁶ Te ni cahān yatá yá jíin ña:

Tu íyó váha jeē quēnde yō staā sēhe, te cuāha yó núū ina, achí yá.

²⁷ Te ni cahān ña:

Jendaá cahán ni Tátā, te chindéé ñáhán ní sáña vēsú cúu ná nájnūhun ina. Chi suni máá tí cánihin nahín tí pedazo staā cuechí jeē cóyo chiji mesa jitoho tī cáyeji tī, achí ña jíín yá.

²⁸ Yūcuán na te ni cahān Jesús:

Yōhyo vāha jeē cándíje nihin ní súcuan, nánā. Te na sáha ná jeē cuní ni, achí yá.

Te máá hora un ní nduvāha-ni sēhe sñhí ña.

Jeē ní nasávāha ya cuehē ñayuu cácuñū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya iin yucu, te yūcuán ní cucōo ya. ³⁰ Te cuehē ñayuu ni quecoo i nuū yā, te cándeca i tāca jeē cájica chácuá, jeē cuaá, jeē ñihín, jeē cacúhndú, jíín cuehē gā ñayuu cácuñū. Te ni cajequin i nuū jehé Jesús. Te ni nasávāha ya i jíínáhan i. ³¹ Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinūu ñayuu cuaá. Te ni cacahān i jeē yóhyo vāha Yaā cúu Yaā Dios ñuu i Israel.

Jeē ni scáji yā cuñ mil tēe

(Mr. 8.1-10)

³² Yūcuán na te ni cana Jesús tēe cáscuáha jíín yá, te ni cahān yā jíín de:

Cúndáhú ni rī ñayuu cuehē yāhá, chi je ni cuu unī quivī cáyūcú i jíín rí, te tuá na vé caji i. Te tu cúní rī natají rí i nuhun ndite i, chi núu súcuan te sava ichi te cuñta fí i. Achí yá.

³³ Te ni cacahān tēe cáscuáha jíín yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

³⁴ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, áchí de.

³⁵ Yūcuán na te ni cahān yā jíin ñáyuu cuehē un jēē na cūcōo i. ³⁶ Te ni quihin ya ndihúxá staā jíin cháca ún, te ni nacuatáhu yá nuū Yaā Dios. Te ni tahu cuéchi yá, te ni jēhe ya nuū tēe cáscuáha jíin yá, te máá de ni casaja nuū ñáyuu. ³⁷ Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca. ³⁸ Te tēe ni cayeji ún, nde cuūn mil de cúu, te sīn ga cúu ñahan jíin súchi lúli. ³⁹ Yūcuán na te ni nacuatáhu yá nuū ñáyuu ún, te cuanungoo i. Te ni ndīvi ya ini barco, te cuahān yā región Magdala.

Jeē cájicān de ñin jniñu jéhnú nuū yā
(Mr. 8.11-13; Lc. 12.54-56)

16

¹ Te ni quecoo tēe grupo fariseo jíin tēe grupo saduceo nuū yā. Chi cácuni de coto ndee de ya, te ni cajicān de jeē na sáha ya ñin jniñu jéhnú jeē coo ñin seña ichi ándiví. ² Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí ró. ³ Te jenéhen chi cácahān rō: Vijna te cuun saū, chi ni nasácuéhé i andiví, áchí ró. Tēe stáhu-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhnú sáha ri tiempo yáha. ⁴ Ñáyuu yáha jeē casáha jniñu néé, tu cájetáhu cuiti i Yaā Dios. Te cájicān i jeē sáha ri ñin jniñu jéhnú jeē coo ñin seña andiví. Te tuá na inga jniñu jéhnú stéén rī nuū i, chi máá-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíjnáhan de, te cuahān yā.

*Jnūhun levadura tē fariseo**(Mr. 8.14-21)*

⁵ Te tē cáscuáha jíin yá ni canaa ni de condiso de staā náa cuango de jíin barco inga lado mar. ⁶ Te ni cahān Jesús jíin de:

Coto má candíje ró levadura tē grupo fariseo jíin tē grupo saduceo, achí yá.

⁷ Te tē cáscuáha un ní cacahān maá de:

Va siquī jeē tú na staā ndíso yó, jeē yúcuan cáhán yā súcuan, achí de.

⁸ Te ni jini Jesús, te ni cahān yā:

¿Najehē cácahān rō jeē ni cáhān rī súcuan siquī jeē tú na staā cándiso ró? Tē tu cándíje nihin cácuu ró. ⁹ ¿A ná tu jecūhun ni rō jeē tu ní cáhān rī súcuan siquī jeē tu ndíso ró stāā? ¿A tu cánucūhun ni rō jeē ní tahu cuéchi rí uhūn staā ni cayejí uhūn mil tē, te nasaa jīca ni canastútú ró jeē ni quéndō? ¹⁰ ¿Te á tu cánucūhun ni rō jeē ní tahu cuéchi rí uxā staā ni cayejí cuūn mil tē, te nasaa jīca ni canastútú tucu ró? ¹¹ ¿Te najehē tu cájecūhun ni rō jeē násūu síquī staā ni cahān rī jíin ró jeē ni cáhān rī jeē coto má candíje ró levadura tē fariseo jíin tē saduceo? Achí yá jíin de.

¹² Yūcuán na te ni cajecūhun ni de jeē tu ní cáhán yā jeē coto de jeē ma cáji de pan jeē yíhi levadura, chi sa suhva ni cahān yatá yá jeē ma cándíje de jnūhun stáhú cástéén tē fariseo jíin tē saduceo.

*Jeē ni cáhān Pedro jeē Jesús cúu Cristo**(Mr. 8.27-30; Lc. 9.18-21)*

¹³ Te nuū ni jínū Jesús región Cesarea Filipo jíin tē cáscuáha jíin yá, te ni cajnūhun yá de:

Ruhū, Yaā ní nduu tē, ¿ndé ñn cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

¹⁵ Te ni cahān yā jíin de:

Te máá ró, ¿ndé ñin cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, achí de.

¹⁷ Te ni cahān Jesús:

Yōhyo ndetū rō, Simón sēhe Jonás, chi nasūú ñin ñayuu ni steén jnūhun yáha nuū rō, chi sa suhva máá Tátá rī, Yaā ndeé andiví, ní steén yā nuū rō. ¹⁸ Te ruhū suni cáhán rī jíin ró jeē maá ró cúu Pedro, jeē cuní cahān: yuū. Te jnūhun ndaā jeē ni cáhán rō jeē maá rí cúu Cristo, suu cúu nájnūhun ñin yuū cáhnu. Te siquī yuū cáhnu yáha sáha ri jeē quítuu vehe, te vehe un cúu ñayuu cácañdije ruhū. Te tu ndé vé cundeyí cuíti siquī i, ni jnūhun xeēn jeē cájihī i, tuá na vé cúu sáha jíin ánuá i. ¹⁹ Te máá ró condiso jniñu ró sáha ró jéé quívicoo ñayuu ndaha Yaā andiví jeē ndacu ya jniñu nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéé cuáha ró jnúhun sáha i ini ñayiví yáha, suni jeē cáyūcú nde andiví cuáha jnūhun. Achí yá.

²⁰ Yūcuán na te ni ndacu ya jniñu nuū tée cáscuáha jíin yá, jeē ma cáchi de nuū ní ñin ñayuu jeē cúu ya Cristo.

Jeē ní castūhún Jesús jeē cúu yā

(Mr. 8.31-9.1; Lc. 9.22-27)

²¹ Te nde saá ní quejéé Jesús cástūhun cájí yá nuū tée cáscuáha jíin yá jeē jíni ñúhún quihñn yā ñnuu Jerusalén. Te tāca tée jéñnu jíin sūtū cácujeñnu jíin tée cástéén tutu ley, stóho ndasí de ya. Te cahni de ya, te nuū uní quiví

te natecu yā, achí yá. ²² Yūcuán na te Pedro, ni cana máñuhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíni ñúhún cuiṭi ndoho ní jnúndóho yáha, achí de.

²³ Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēe ndúcú stívī rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

²⁴ Yūcuán na te ni cahān yā jíin tēe cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnūhun ndoho i jnúndóho jeē siquí rī, vēsú na cúu i. ²⁵ Chi núu ndé ñáyuu cuní i cācu i nuū jnúndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni. ²⁶ ¿Chi ndé cuajníñu vēsú na cúndeyí ñáyuu nihīn i ní ñáyiví, te núu quiví i nuū jnahnú ndetū i? Chi tú na jíin cuiṭi chunaa ñayuu jeē cácu ánuá i. ²⁷ Chi ruhū, Yaā ní nduu tēe, ndiji ri jíin táca ndajéhé rī, te yōhoyo luu cujéhnū ri nájnūhun cújéhnū Tátá rī. Yūcuán na te cuāha ri tahū nuū ññ ñayuu núu ndese jniñu ni casáha i. ²⁸ Te jendaá cahán rī jíin ró jeē sava tēe cáhīn yāhá, ma cúu de chi nde cuni de jeē maá rí, Yaā ní nduu tēe, ndácu ri jniñu jíin poder rī.

Jeē tucu ni nduu ya

(Mr. 9.2-13; Lc. 9.28-36)

17

¹ Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahān sñn ya jíin de ññ yucu súcún. ² Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahma ya

ni nducujín quiyi ndasí, nájnūhun nduva luz. ³ Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. ⁴ Te ni cahān Pedro jíin yá:

Nacā jeē váha jeē cáhīin ná yáha. Te núu cúní ni te na sáha ná únī vehe ramada, ìin cuu máá ní, inga cuu Moisés, te inga cuu Elías, achí de.

⁵ Te níní cáhán gā de, te ni quiji vicō nūhun jéē yaa ndasí, ni jesi-ni nuū de. Te nuū vicó un ní cahān ìin jnūhun:

Yáha cúu Sēhe ri jeē maní ndasí rí jíin, te cúsiñ ni rī jíin. Na cúní nahín ró jnūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de. ⁷ Yūcuán na te ni quee Jesús, te ni soó yá ndaha ya siquī de. Te ni cahān yā:

Ndocuññi, te ma yūhu ró jijnáhan ró, áchí yá.

⁸ Te ni candacoto de, te tuá tēe un ní cajito de, chi máá ìin na Jesús.

⁹ Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ìin jeē súcuan ni cajito ró, chi nde na nátecu maá rí, Yaā ní nduu tēe, áchí yá.

¹⁰ Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yaā Dios, ¿najehe cácahān de jeē cánuu ndiji Elías xihna gā, te sáa te quiji Yaā cúu Cristo? achí de.

¹¹ Te ni cahān Jesús jíin de:

Jendaá cúu jeē xihna gā quiji ìin tēe cuu nájnūhun Elías, te sátūhva de ndihí, áchí tutu. ¹² Te cáhán rī jíin ró jeē jé ni quiji tēe ni cuu nájnūhun Elías, te tu ní jíní ñayuu jeē suu de cúu. Te ni casáha ndevāha ñayuu jíin de ndihí jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

¹³ Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájñūhun Elías.

Jeē ní nasávāha ya ñin sūchi jíhí yīhí

(Mr. 9.14-29; Lc. 9.37-43)

¹⁴ Te ni najinū yā jíin de nuū ñáyuu cuehē ún. Te ni quee ñin tēe, ni jecuiñī yití de nuū yā, te ni cahān de:

¹⁵ Cundáhú ni ni séhe yíí ná, chi yōhyo xeēn ndóho i cuehyī jíhí yīhí. Te je ni cuu cuehē jínu cótúú i nuū ñuhún jíin núū ndúte. ¹⁶ Te ni quindeca ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñayuu yōhyo ñihni ni cácuu ró chi tu cácandíje ró jēe cuu nduvāha i. ¿Nasaa ga quivī condee rī jíin ró? ¿Te nasaa ga quivī cuandeyí ni rī jíin ró? Cuáquihin sūchí un na quíji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajñūhun sñin de ya:

¿Najehē tu ní cúu quenehen ná tachī un jíjnáhan ná? achí de.

²⁰ Te ni cahān yā:

Siquī jeē tu cácandíje ñihin ró jēe cuu sáha ró. Chi jendaá cahán rī jíin ró, jeē núu candíje ró vēsú ñin tñhí-ni, cūhva nájñūhun ñin ndiquin mostaza, te cuu sáha ró táca-ni jniñu yíí. Chi cuu cahān rō jeē na cújiyo yucu yáha quihñin inga lado, te cujiyo-ni. Te tācá-ni jniñu chi cuu sáha ró, te núu candíje ñihin ró jēe cúu. ²¹ Te ñin tachī súcuan chi ma quénda cuiñi quihñin, te núu tu cacān tahu rō te coo ndite ni rō. Achí yá.

Jeē ni cáhān tucu ya jeē cúu yā

(Mr. 9.30-32; Lc. 9.43-45)

SAN MATEO 17:2262SAN MATEO 17:27

²² Te jíca cuu Jesús jíin de jíjnáhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū tāca tée xeēn.

²³ Te cahni de ruhū, te nuū uní quívi te natecu rí, achí yá.

Te ni canducuíhyá ndasí ni de jeē ni cáhān yā jnūhun yáha.

Siquī xūhun cuajníñu ini templo

²⁴ Te ni jinū yā ñuu Capernaum jíin tée cáscuáha jíin yá. Te tēe cástútú xūhun templo ni quecoo de, te ni cacajñūhún de Pedro:

Te maestro maá ró jijnáhan ró, ¿á tú cuāha de xūhún cuajníñu ini templo, chí naún? áchí de.

²⁵ Te ni cahān Pedro:

Cuu, áchí de.

Te ná ni quívi de ini vehe, te xīhna gā Jesús ni cahān yā jíin de:

¿Ndese jéni ni rō, Simón? Tāca tée cácuu rey ini ñayívi yáha, ¿ndé núū cájicān de xūhun renta jíin xūhun cuajníñu ñuu? ¿A núū séhe de chí núū ñáyuu sīn vehe? áchí yá.

²⁶ Te ni cahān Pedro:

Nuū ñáyuu sīn vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacán xūhún un núū i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

²⁷ Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jní chācá, te tava rō chācá jéē jní xīhna gā. Te ndica rō yuhu tí, te yūcuan níhīn rō ñn xūhun jéē cánda chunaa rō jeē cájicān de. Te quindēca ró núū de jeē cúu ruhū jíin rōhó. Achí yá.

*Ndé ñáyuu cúu jeē cújéhnu ga
(Mr. 9.33-37; Lc. 9.46-48)*

18

¹ Te suni quiṽi un ní quecoo tēe cáscuáha un núū yā, te ni cacajñūhún de ya:

¿Ndé ñin cújéhnu ga nuū ñáyuu jeē ndácu Yaā andiví jniñu nuū? achí de.

² Te ni cana ya ñin sūchi lúlí, te ni jeni ya i mēhñú de.

³ Te ni cahān yā:

Jendaá cahān rī jín ró, núu tú nandió cóo ni rō te cani ni rō nájnūhun ñin sūchi lúlí, ma quiṽi cuiṽi rō ndaha Yaā andiví jēē ndacu ya jniñu nuū rō. ⁴ Núu súcuan te ñayuu jeē jéni ni i jeē tu cújéhnu i, nájnūhun jéni ni sūchi lúlí yáha, suu i cújéhnu ga nuū ñáyuu jeē ndácu Yaā andiví jniñu nuū. ⁵ Te na-ni ñayuu núu jeē siquí ruhū jetáhú i ñin sūchi lúlí nájnūhun sūchi yáha, te ruhū jetáhú i. Achí yá.

*Xeēn coo siquí ñáyuu quiṽi nuū cuéchi
(Mr. 9.42-48; Lc. 17.1-2)*

⁶ Te núu ñin sūchi lúlí yáha cándíje i ruhū, te núu quiṽi i cuéchi sáha na-ni ñayuu, te vāha ga núu ni conuhñi ñin yōso cáhnu sucūn ñayuu ún, te quēe i chíji ndute mar nuú.

⁷ Nacā xeēn cúu jín ñáyuu ñayiví, chí máni íyó jēē nducú squívi ñayuu nuū cuéchi. Te máni súcuan coo ini ñayiví. Te nacā xeēn ndoho ñayuu jeē squívi jnāhan nuū cuéchi.

⁸ Núu súcuan te núu ndaha ró chí jéhē rō sáha jeē quiṽi ró cuéchi, vāha ga cahnde rō te scāne ró na quihín, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quiṽi ró núū cotecu rō ñí cáni, vēsú jeē cóndee ndindúú ndaha ró jéhē rō te quiṽi ró núū ñuhún jeē cayú ñí cáni. ⁹ Te núu tinūu ró sáha jeē quiṽi ró cuéchi, vāha ga tava rō te scāne ró na quihín, návāha tuá sáha ró cuéchi. Chí vāha ga jeē coo ñin-ni tinūu ró te quiṽi ró núū

cotecu rō ñí cáni, vēsú jeē cóndee ndindúú tinūu ró te quīvi ró núu ñuhún infierno.

Jnūhun yátá síquī lanchi jeē ní sana

(Lc. 15.3-7)

¹⁰ 'Coto ma sájéē ni rō nuū ní ñin sūchi lúlí yáha. Chi cáhán rī jíin ró jeē tācá ndajéhé andiví jéē ndíto ya i, níni cáhiin ya nuū maá Tátá rī andiví. ¹¹ Chi ruhū, Yaā ní nduu tēe, vēji ri jeē jnáma ri ñayuu jeē ní sana i nuū Yaā Dios.

¹² '¿Te ndese cájeni ni rō? Núu ñin tēe ndéca de ñin ciento lanchi, te núu sana ñin tí, ¿á tu stóo de cuūn xico xahūn cuūn gā tī yucu, te ndicó de quinanducú de quití ní sana ún? ¹³ Te núu ni nanihín de tí, te ndaā jeē yóhyo ga cúsi ni de jíin quití ún vēsú jíin cúūn xico xahūn cuūn gā quití jeē tu ní sana. ¹⁴ Te suni súcuan máá Tátá rō, Yaā ndeé andiví, tu cúní yā jeē jnahnú ndetū ni ñin sūchi lúlí yáha.

Síquī jeē cóne cáhnu ni yō nuū jnáhan yó

(Lc. 17.3)

¹⁵ 'Te núu jnáhan ró ní sáha de cuēchi síquī rō, núu súcuan te castūhun ró nuū mañuhún-ni de jeē ni sáha de cuēchi síquī rō. Te núu ni jetáhú de jnūhun ni cahán rō jíin de, núu súcuan te je ni ndumaní de jíin ró ni sáha ró.

¹⁶ Te núu tu ní jétáhú de jnūhun cáhán rō, te quicāna ró ñin chí úū gā ñayuu quihín rō jíin núū de, cuu i testigo jíin ró, te cundaā cuēchi de te ndumaní de jíin ró. ¹⁷ Te núu tu ní jétáhú tucu de jnūhun cácahán tēe ún, yūcuán na te castūhun ró nuū ñayuu cácandíje. Te núu tu ní jétáhú tucu de jnūhun cahán ñayuu cácandíje ún, te siáá rō de na cóo de nájnūhun ñin tēe tu cándíje nuū Yaā Dios chí tēe stútú xúhun renta.

¹⁸ 'Jendaá cahán rī jíin ró jéē tāca jéē cási rō jeē ma sáha ñayuu ini ñayivi yáha, suni casi jeē cáyucú nde andiví. Te

tāca jēē cuāha ró jnúhun sáha i ini ñayīvi yáha, suni jeē cáyūcú nde andiví cuāha jnūhun.

¹⁹ Te suni cáhán rī jín ró, núu uū jnáhan ró ini ñayīvi yáha, inuú cani ni rō síquī ñn jeē cacán tahú rō, núu súcuan te máá Tátá rī andiví cuāha ya jeē cájicān rō. ²⁰ Chi núu ndé mí ndútútú úū chí únī ñayuu jeē cáchiñúhún i ruhū, te yūcuan íne ri jín i, áchí yá.

²¹ Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núū jnáhan ná jēē sáha de cuēchi síquī ná? ¿A ndé uxā jínu chí naún? áchí de.

²² Te ni cahān Jesús:

Tu cáhán rī jín ró jeē maá úxā jínu, chi nde uxā jínu jeē uní xico uxī.

Jnūhun yátá síquī mozo jeē tu ní íne cáhnu ni

²³ Núu súcuan te Yaā ndeé andiví, suhva cúu jeē íne cáhnu ni yā nuū ñáyuu ndácu ya jniñu nuū: Cúu nájñūhun ñn rey jeē cuní de sándaā de jín mozo de jeē cátaū nuū de. ²⁴ Te ni quejéé de sándaā de jín i. Te ni caquindecia i ñn mozo jeē taú tijní millón peso nuū de. ²⁵ Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jín ñasihí jín séhe jín táca ndajniñu, te nucūnaa xūhun taú. ²⁶ Yūcuán na te ni jecuiñī yití mozo un, te ni cahān ndahú de jín patrón de ún: Condetu ní, te na chúnaa ndihí ná xūhun ní, áchí de. ²⁷ Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. ²⁸ Te ni quenda mozo un cuáhān de, te ni najnáhan-ni de jín ñn jnáhan mozo de jeē taú jecu peso nuū de. Te ni jniñ de tēe ún, te ni quitu de sucūn, te ni cahān de: Chunaa jeē taú rō nuū rī, achí de. ²⁹ Te jnáhan mozo de un ní jecuiñī yití núū de, te ni cahān ndahú jín de: Condetu te na chúnaa ndihí ri xūhun ró, achí. ³⁰ Te máá de tu ní cuní de, chi ni chune

de tēe un vecāa nde quivī nachunaa jeē taú nuū de. ³¹ Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndíhi ndese ni cuu. ³² Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndíhi jeē taú rō nuū rī, chi ni cahān ndahú ró jíin rí. ³³ Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, áchí de. ³⁴ Te ni quitī ndasí ni patrón, te ni ndacu de jniñu jeē na quiví vecāa nde nachunaa ndíhi jeē taú nuū de.

³⁵ Te ni jīnu ni cahān yā, te áchí yá:

Nájñūhun ni sáha rey un jíin mozo de, suni súcuan sáha máá Tátá rī andiví jíin táca róhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíinánhan de.

Siquī jeē ma stóo jnáhan tēe jíin ñahan
(Mr. 10.1-12; Lc. 16.18)

19

¹ Te nuū ní ndíhi ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. ² Te cuehē ñayuu ni candiquīn i ya, te yūcuan ní nasávāha ya ñayuu cácuñū.

³ Yūcuán na te ni quecoo jecu tēe grupo fariseo nuū yā, chi cácuñi de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusín in tēe jíin ñasihí de núu na-ni siquī cúu, chí naún? áchí de.

⁴ Te ni cahān yā:

¿A tu ní cácahu ró tutu iī ndese ni sáha Yaā Dios ñayuu nde xīhna ñúhún? Chi tēe jíin ñahan ni sáha ya, achí. ⁵ Te

suní ni cahān Yaā Dios: Jeē yúcuān cúu jeē stóo tēe tátá de náná de, te quijnáhan de jín ñasihí de, te ìn na cuu ndindúú de, áchí Yaā Dios, achí tutu. ⁶ Núu súdean te tuá cúu uú jnáhan de, chí ìn na cúu. Jeē yúcuān tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

⁷ Te ni cacajnuhún de ya:

Núu súdean ¿te naun ni ndacu Moisés jniñu jenahán jeē núu stóo ìn tēe ñasihí de, te na cúvāha acta jeē ndusín de jín ña? áchí de.

⁸ Te ni cahān yā jín de:

Siquí jeē níhni ni rō jijnáhan ró, jeē yúcuān ní jēhe Moisés jnuhun jeē stóo ró ñasihí ró. Te nde xihna ñúhún chí nasūu súdean ní cuu. ⁹ Te ruhū chí cáhán rī jín ró, núu ìn tēe stóo de ñasihí de, te núu nasūu jéé tíjni ni ña, te quijnáhan de jín inga ñahan, núu súdean te cásiquí ndé de ña. Te núu ìn tēe condeca de ñahan ní ndusín, suní cásiquí ndé de ña, áchí yá.

¹⁰ Yúcuān na te ni cacahān tēe cáscuáha jín yá:

Te núu ma cúu stóo tēe ñasihí de, núu súdean te vāha ga ma condeca de ñahan, áchí de.

¹¹ Te ni cahān yā jín de:

Jnuhun ni cahān rō yāhá, tu níhín jniñu nuū ndíhi tēe, chí máá nene tēe jeē ni sáha Yaā Dios jeē níhín jniñu nuū.

¹² Chí íyó tíjni siquí jeē jési jeē ma condeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma condeca de ñahan siquí jeē ndíhví ni de jín jniñu jeē ndácu Yaā andiví nuū de. Tēe jeē cúu cuatáhú jnuhun jeē ma condeca de ñahan, na cuatáhú de núu súdean. Achí yá.

*Jeē ni jícān tahu Jesús jehē sūchi lúlí
(Mr. 10.13-16; Lc. 18.15-17)*

¹³ Yūcuán na te ni quecoo ñayuu jíin súchi lúli, jēē na sóo yá ndaha ya xinī i te cacān tahu yā jehē i. Te tēē cáscuáha jíin yá, ni cacahān de nuū ñáyuu vējicoo jíin i.

¹⁴ Te ni cahān Jesús:

Cuāha jnūhun na quǎjicoo sūchi lúli jíinā nuū rī, te ma cási rō jeē quǎjicoo i. Chi ñayuu jeē ndió cóo ni i cani ni i nájnūhun sūchi yáha, suu i quǎvi ndaha Yaā andiví jēē ndacu ya jniñu nuū i, áchí yá.

¹⁵ Te ni sóo yá ndaha ya xinī i jíināhan i. Te ni quenda ya yūcuan cuáhān yā.

Jnūhun tēē cúca

(Mr. 10.17-31; Lc. 18.18-30)

¹⁶ Te ñin tēē suchí ní quee de nuū Jesús, te ni cajnūhún de ya:

Tēē vāha cúu ní Maestro. Te cachi ní, ¿na jniñu vāha sáha ná te nihīn tahu na cotecu na ní cáni andiví? áchí de.

¹⁷ Te ni cahān yā jíin de:

¿Naun cáhān rō jeē tēē vāha cúu ri? Tú ni ñin tēē vāha íyó, chi máa ñin-ni Yaā Dios. Te núu cúní rō cotecu rō ní cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndēē jnāhan ró. Ma sacuíhná ró. Ma sajnūhún ró. ¹⁹ Cuatáhú ró nuū tatá rō nuū naná rō. Te cundáhú ni rō jnāhan ró nájnūhun cundáhú ni rō maá ró, achí yá.

²⁰ Te ni cahān tēē suchí un:

Tācá jniñu yáha je ni squícu ná ndé ná lulí ná. ¿Te na vé cúmaní gā sáha ná núu súcuan?

²¹ Te ni cahān Jesús:

Núu cúní rō squícu ndíhi ró, cuáhán te xīco ró ndíhi jeē névāha ró, te cuāha ró núu ñáyuu ndahú. Te nde andívi cuáha ya jeē ndetū ndasí coo ró. Yūcuán na te quiji ró condiquín rō ruhū quihīn yō, achí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chi cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chi yōhyo yí quívicoo de ndaha Yaā andívi jēē ndacu ya jniñu nuū de. ²⁴ Te cáhán tucu ri jíin ró jeē yachī gā yāha ñin camello yaū yutícuí, vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, achí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajnūhun jnáhan de:

¿Ndé ñáyuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chi ma cúu squívi i máa i ndaha Yaā Dios, te máa yá chí ndíhi-ni cuu sáha ya, achí yá.

²⁷ Yūcuán na te ni cahān Pedro:

Sāña jíjnáhan ná ní castóo ná ndíhi jeē cánevāha ná, te cándiquín na níhín. ¿Te na vé nihín na núu súcuan? achí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíjnáhan ró jēē ñin quívī conene rī mesa ndacu ri jniñu, te yōhyo luu kujéhnū ri ini ñayívi jéé. Te quívī ún te máa ró jeē ní cacondiquín rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndíhúxí uū yucūn ñayuu Israel. ²⁹ Te tāca ñáyuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, síquī jeē cóndiquín i ruhū, te nanihīn i ñin ciento gā jeē súcuan. Te suni nihīn tahú i cotecu i ní cáni. ³⁰ Te

cuehē ñayuu jeē vijna cácuu i nuū, nduu i sandīhí. Te ñayuu jeē vijna cácuu i sandīhí, nduu i nuū. Achí yá.

Jnūhun yátá síquī tēe cásájniñu

20

¹ Te suhva cúu jeē ndácu Yaā andíví jniñu nuū ñáyuu: Cúu nájñūhun ñn tēe chíí ñuhun. Te ñn nehen ni quenda de, ndúcú de tijni mozo jeē taxín ndéhē uva de. ² Te ni sándaā de jíin mozo un jéē chúnaa de ñn denario jeē quiví. Te ni tají de tēe un cuángoo jeē taxín uva de. ³ Yūcuán na te ni quenda tucu de nájñūhun cahīñ. Te ni jito de nuū sava ga tēe cáyūcu sáá-ni de nuū yáhu. ⁴ Te ni cahān de jíin: Róhó jíináhan ró, cuángoo taxín ró uva rī, te chunaa vāha ri yáhu ró, áchí de. Te tēe un cuángoo de. ⁵ Te ni quenda tucu de jeē cuácuu cahuxī uū jíin jéē cuácuu cahunī, te suni súcuan ni nihīn tucu de mozo. ⁶ Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáá-ni nuū yáhu. Te ni cahān de jíin: ¿Najehē cáhiin sáá-ni ró yáha ní ndiáca? áchí de. ⁷ Te ni cacahān tēe ún: Síquī jeē tú ni ñn ní cána sāña jéē sájniñu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rī, chi chunaa vāha ri yáhu ró, áchí de. ⁸ Te nuū ní ini, te tēe chíí ñuhun ni cahān de jíin tēe cújéñu nuū mozo de: Cana xinī tēe cásájniñu te chunaa rō yáhu de, te xīhna gā tēe ni quívicoo sandīhí, te sáá te tēe ni quívicoo xīhna ñúhún, áchí de. ⁹ Te ni quecoo tēe jeē ni quívicoo cahuhūn. Te ñn denario ni caquihin ñn ñn de. ¹⁰ Yūcuán na te ni quecoo tēe jeē ni quívicoo xīhna ñúhún. Te cájeni ni de jeē cuehē gā quiyáhu de. Te ñn-ni denario ni caquihin ñn ñn de. ¹¹ Te nuū ní caquihin de, te ni caquejéé de cácahān sōo de síquī tēe chíí ñuhun, áchí de: ¹² Máá ná jíináhan ná, ndiáca ni casájniñu ná, te ni candoho ná jéē jihní. Te tēe yáha jéē ni quívicoo

sandīhí, chi máá ñin hora-ni ni casájniñu de. Te ñnuú-ni ni chiyāhu ní sáña jíin de, áchí de. ¹³ Te tēe chíí ñuhun ni cahān jíin ñin de: Amigo, nasūu jēē tú vāha sáha ri jíin ró. ¿A tu ní sándaā yō jēē ñin denario quiyāhu ró, chí naún? ¹⁴ Núu súcuan te quihin yāhu ró te quinhun rō. Chi cúní rī jēē tēe ni quīvicoo sandīhi yáha, ñnuú quiyāhu de jíin máá ró. ¹⁵ ¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jēē ní chiyāhu vāha ri de jíināhan de síquī jēē vāha ni rī? áchí de. ¹⁶ Te nájnūhun ni sáha tēe chíí ñuhun, suni súcuan sáha Yaā Dios. Chi ñayuu cácuu sandīhí, nduu i nuū. Te ñayuu cácuu nuū, nduu i sandīhí. Chi cuehē ñayuu cána ya jēē candíje i ya. Te jecu-ni i cándíje, te nácāji ya maá i jēē ndúu i sēhe ya. Achí yá.

Jeē ni cahān tucu Jesús jēē cúu yā

(Mr. 10.32-34; Lc. 18.31-34)

¹⁷ Yūcuán na te ná ni quihin Jesús ichi cuahān yā ñnuu Jerusalén, te ni cana sñin ya ndihúxí uū tēe cáscuáha jíin yá. Te ni cahān yā jíin de:

¹⁸ Cuni sōho ró, chi je cuángoo yó ñnuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de síquī rī jēē cúu rī. ¹⁹ Te squívi de ruhū nuū tēe nación Roma jēē cáyūcú Jerusalén cándacu jniñu. Te tāca tēe un sácatā de nuū rī. Te cani de ruhū, te sáá te cahni de ruhū jicā cruz. Te nuū uní quívī te natecu rī. Achí yá.

Jeē ni jícān naná Jacobo jíin Juan ñin favor nuū yā

(Mr. 10.35-45)

²⁰ Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñī yití ña nuū yā, jícān ña ñin favor nuū yā. ²¹ Te ni cajnūhun yá ña:

¿Na vé cuní rō?

Te ni cahān ña:

Cuāha ní jnúhun jeē quivī ndácu ní jniñu te conēne ndindúú séhe ná yáha xiin ní, ñin i lado váha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájñūhun jeē quíji siquī rī? ¿Te á canda ró ndoho xeēn rō nájñūhun ndoho ri? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho ró jnúndóho nájñūhun jeē quíji siquī rī, te ndoho xeēn rō nájñūhun ndoho ri. Te jeē cónēne ró lado váha ri jíin lado jecó rí, nasūu rúhū cúu jeē cuáha jñūhun. Chi je íyó túhva cuu tāca tée jeē ní nacāji Tátá rī, te tēe un níhīn. Achí yá.

²⁴ Te uxī gā tēe cáscuáha jíin yá ní cajini de jñūhun yáha. Te ni caquitī ni de nuū uú ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhin de jniñu nuū i, te máá de cáchí ndese coo. ²⁶ Te máá ró jijnáhan ró, chi ma sáha ró súcuan. Chi núu ndé ñin ró cúní cujuhnu, sa suhva cuajníñu ró núu jnáhan ró. ²⁷ Te núu ndé ñin ró cúní cuu nuū, sa suhva sáha ró máá ró mozo nuū jnáhan ró. ²⁸ Chi suni súcuan sáha ruhū, Yaā ní nduu tēe, chi nasūu jéē véji ri jeē cuajníñu ñayuu nuū rī, chi sa suhva véji ri jeē cuajníñu ri nuū ñáyuu. Te cuāha ri maá rí cuu rī návaha jnama ri cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquīn i ya. ³⁰ Te yuhíchi un cáyūcu úu

tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, áchí de.

³¹ Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³² Te ni jecuiñī Jesús, te ni cana ya ndindúú tée cuáá un, te ni cajnūhun yá de:

¿Na vé sáha ri jíin ró cáconi rō?

³³ Te ni cacahān de jíin yá:

Jeē na ndúndijin tinūu ná cáconi ná, áchí de.

³⁴ Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquin de ya cuangoo de jíin yá.

Jeē ni quívi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21

¹ Te nuū cuácuyajni ya ñuu Jerusalén, te ni jinū yā jíin tée cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ² Te áchí yá jíin de:

Cuáhán ñuu lulí íne ichi núú. Te yūcuan níhīn rō ñin burra, núhni tī jíin ñin burro lulí. Te ndají ró tī, quijicoo ró jíin tí nuū rī. ³ Te núu ndé ñin cahān jíin ró, te cachi rō nuū: Máá Jítoho yō jíni ñúhún yá tī, achi rō. Yūcuán na te siáá-ni i tī, quiji ró jíin tí, achí yá.

⁴ Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó núu tútu:

⁵ Cachi rō nuū ñáyuu ñuu Jerusalén jeē naní ñuu Sión:

Yāhá condēhe ró jeē véji Rey rō.

Tu sájéhnū ya maá yá, chi máá burra-ni yósó yá,
jín burrito, sēhe quiti ndíso.

Achí tutu.

⁶ Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñu nuū de. ⁷ Te ndéca de burra jín séhe tī, ni ndeco de nuū yā. Te ni casoó de sahma de siquī tī, te ni jecosō yā tī. ⁸ Te cáhīn cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. ⁹ Te ñayuu cuangoo ichi núú jín ñáyuu cuangoo ichi yátá, cácana jee i:

Yōhyo cújéhnū Yaā cúu Sēhe yucūn rey David. Yōhyo vāha Yaā cúu Yaā jeē véji jín jniñu máá Jítóho yō Yaā Dios. Te yōhyo cújéhnū máá Yaā Dios. Achí i.

¹⁰ Te nuū ni quívi ya ñuu Jerusalén, te ndihi ñayuu ñuu un ní cacuvaā i, te cuehē i cájnūhun jnáhan:

¿Ndé tée cúu tēe yáha? áchí i.

¹¹ Te ni cacahān ñayuu vējicoo jín yá:

Yāha cúu Jesús jeē nácani jñūhun Yaā Dios, jeē véji nde ñuu Nazaret ndañúú Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹² Yūcuán na te ni quívi Jesús ini templo cáhnu Yaā Dios. Te ni quenehen ya tāca ñáyuu cájeen quiti te cánaxico núú ñáyuu jeē socō i. Te ni scotúú ndeyi ya tāca mesa tēe cástáyí xūhún, jín silla tēe cáxícó paloma. ¹³ Te áchí yá jín i:

Yósó núú tútu i jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chi nájñūhun yaū cava ñacuīhná ni canasáha ró. Achí yá.

¹⁴ Yūcuán na te sava ñayuu cuaá jíin ñayuu chacuá ni quecoo i nuū yā ini templo un. Te ni nasávāha ya i. ¹⁵ Te sutū cácujuhnu jíin tée cástéén tutu ley Yaā Dios, ni cajito de tācá jniñu jéhnū sáha ya, te ni cajini de jeē cácana jee sūchi lúlí ini templo: Yōhōyó cújuhnu Yaā cúu Sēhe yucūn rey David, achí i. Te ni caquitī ni de. ¹⁶ Te ni cacahān de jíin yá:

¿A tu jíini ró jéē súcuan cácahān sūchi yáha? achí de.

Te ni cahān Jesús jíin de:

Jíini ri. ¿Te á ná tu cahu ró jéē yosó núū tútu ii jeē suhva cáhān ñin tēe jíin Yaā Dios?

Sáha ní jéē tāca súchi lúlí jíin súchi cájexin,
vāha ndasí cáhān i jeē Yaā cujuhnu cúu Cristo.

Achí.

¹⁷ Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuāá ún.

Jeē ni cáhān yā nuū yújnu higo

(Mr. 11.12-14, 20-26)

¹⁸ Te jenéhen inga quivī cuanuhun yā ñuu Jerusalén, te jíi yā sōco. ¹⁹ Te ni jito ya ñin nundēhe higo, íin yuhíchi. Te ni jehēn yā jehē. Te tú na ndehē ni níhín yā, chi máá ndaha-ni íin. Te ni cahān yā jíin:

Vijna te ma cúun cuiṭi gā ndehē xinī rō, achí yá.

Te ni ichī-ni yujnu higo ún. ²⁰ Te tēe cáscuáha jíin yá, ni canaa ni de cájito de. Te ni cacajñuhún de ya:

¿Ndese ni sáha ní jéē yachí-ni ni ichī yujnu higo? achí de.

²¹ Te ni cahān yā jíin de:

Jendaá cahān rī jíin ró, núu candíje ró te tú cani siquí ni rō, te cuu sáha ró jniñu jéhnū nájnūhun ni sáha ri jíin yujnu higo. Te nde jniñu jéhnū ga cuu sáha ró, chi nde cuu cahān rō jeē cújiyo yucu yáha, quihīn nuū mar, te sáha

nájñūhun cahān rō. ²² Te tāca jēē cacán tahu rō jijnáhan rō, te núu candíje ró jēē nihín rō, te nihīn rō. Achí yá.

Siquī jeē ndíso jniñu Jesús

(Mr. 11.27-33; Lc. 20.1-8)

²³ Te ni quīvi tucu ya ini templo cáhnu. Te níni stéén yā jñūhun, te sutū cácujeñnu jíin táca téé jéñnu jeē cándacu jniñu nuū ñáyuu hebreo, ni quecoo de nuū yā. Te ni cacajnūhún de ya:

¿Ndé ní nihīn jniñu ró jēē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

²⁴ Te ni cahān Jesús:

Suni ruhū, cajñūhun rí rohó ñin jñūhun jíjnáhan ró, te núu cuu stío cuñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha. ²⁵ ¿Ndé ñin ni tee jniñu siquī Juan jeē ni scuándute de? ¿A Yaā Dios chí táca téé? áchí yá jíin de.

Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cáccandíje ró de? ²⁶ Te núu cahān yō jeē ñáyuu ni catee jniñu un síquī de, te cáyūhu yó ñayuu, chi ndívii i cáccandíje i jeē téé ni nacani jñūhun Yaā Dios ni cuu ndije Juan. Achí de cácahān maá de.

²⁷ Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ñin ni tee jniñu siquī rī sáha ri jniñu yáha, áchí yá.

Jñūhun yátá síquī uú sēhe yí

²⁸ Te ni cahān gā yā jíin de:

Cuni nahín ró jñūhun yátá yáha: ñin tēe ni iyo uū sēhe yí de. Te ni cahān de jíin ñin i: Séhē, quihīn rō taxín ró

ndehē uva rī vijna, áchí de. ²⁹ Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. ³⁰ Te tēe un ní jehēn de nuū ínga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, áchí i. Te tu ní jéhén i. ³¹ ¿Te ndese cájeni ni rō? Jeē ndindúú i, ¿ndé ñin i ni squícu jniñu cúní tatá i? áchí yá.

Te ni cacahān de:

Sūchi jēe ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xúhun renta jíin ñahan cájica jnéni, yachī cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chi ma quívi ró. ³² Chi ni quiji Juan, ni steén de ndese condiquin rō jnūhun ndaā, te tu ní cácanđije ró jnúhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jnūhun ni cahān de. Te máá ró, vésú ni cajito ró jēe ní cacandíje i, te tu ní cánacani cuiti ni rō jeē candíje ró. Achí yá.

Jnūhun yátá síquī tēe née cásájniñu nuū uva

(Mr. 12.1-12; Lc. 20.9-19)

³³ Cuni sōho ínga jnūhun yátá jíijnáhan ró: Ni íyo ñin tēe chíí ñuhun. Te ni nachuhun de cuehē ndehē uva. Te ni jesi de corral, te ni sáha de ñin nuū cúhun ndehē un táxín. Te ni jeni de ñin vehe súcún návāha cuu coto de níí cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. ³⁴ Te máá tiempo ndutútú uva, te ni tají de jecu mozo cuanuquihin sava uva nuū tēe cásájniñu ún. ³⁵ Te tēe un ní cajñi de mozo un. Te ñin i ni cacani de, te ínga i ni cajehni de, te ínga i ni cajēhe de yuū xinī. ³⁶ Te tēe chíí uva ni tají tucu

de jecu gā mozo cuango, cuehē gā vēsú jeē xíhna ñúhún. Te suni súcuan ni casáha tēe un jíin ndíhi mozo un.

³⁷ Te jeē sándíhi na te ni tají de sēhe de cuahān. Te jéni ni de: Tēe ún chi cuatáhú de jíjnáhan de nuū séhe ri. ³⁸ Te tēe cásájniñu ún, núu ní cajito de nuū séhe tēe chíi uva, te ni cacahān maá: Tēe chíi táhū cúu jeē yáha. Na cáhni yō de, te ndōo tahū de cuu yó, áchí. ³⁹ Te ni cajni de i, te ni caquenehen de i inga lado, te ni cajehni de i. Achí yá.

⁴⁰ Yūcuán na te ni cajnūhun yá de:

Núu súcuan te núu na quíji tēe chíi uva un, ¿te ndese sáha de jíin tēe cásájniñu ún? áchí yá.

⁴¹ Te ni cacahān de jíin yá:

Ma cundáhú cuíti ni de tāca tēe cásáha jniñu néé un, chi cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tēe chíi uva. Achí de.

⁴² Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu i, jeē ruhū cúu nájnūhun ñn yuū? Chi áchí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Máá Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu. ⁴³ Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúní yā. ⁴⁴ Te ñayuu tu cá candíje, ndoho i nájnūhun ndóho ñayuu jeē cotúú siquī yuú te jnáhnú i. Te quivī sándaā Yaā Dios cuēchi, te ñayuu tu cá candíje, ndoho i nájnūhun ndóho ñayuu jeē nínga yuū siquī i te cundihí i sáha. Achí yá.

⁴⁵ Te sutū cácujuhnu jíin tée grupo fariseo ni cajini sōho de tāca jnūhun yátá ní cahān yā. Te ni cajecūhun ni de jeē siquī maá de cúu jnūhun yátá ní cahān yā siquī tée cásájniñu nuū uva jíin tée cájeni vehe. ⁴⁶ Te ni canducú de modo jñi de ya. Te cáyūhú de jeē quitī ni ñayuu, chi cájeni ni i jeē tée nácani jnūhun Yaā Dios cúu ya.

Jnūhun yátá siquī vico nándāha

22

¹ Yūcuán na te ni cahān tucu Jesús inga jnūhun yátá jíin de jíináhan de:

² Súcuan cúu jeē ndácu Yaā andiví jniñu nuū ñáyuu: Cúu nájñūhun ñin rey jeē sáha de ñin vico jeē nándāha sēhe yí de. ³ Te ni tají de tāca mozo de cuacana ñayuu jeē ni cáhān de jíin jéé quíjicoo. Te ñayuu ún tu ní cáconi i quijicoo i. ⁴ Te ni tají tucu de jecu gā mozo quingoo, te áchí de jíin: Cahān jíin ñáyuu ní cana ri un jéé iyó túhva ndeyu. Chi je ni jehni rī stiquī rī jíin táca gá quitī ní nduu, te ndiñi je iyó túhva. Nehen jijnáhan ró vico nándāha. Achi rō jíin i. Achí de. ⁵ Te ñayuu ní cana de ún tu ní cásáha i cuenta. Chi ñin i cuahān nuū ítu i, te inga i cuahān nuū jniñu sáha i. ⁶ Te sava ga i ni cajñi i tāca mozo rey, te ni casácatā i nuū, te ni cajehni i. ⁷ Yūcuán na te yōhyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndīyi ún, te ni cajehmu de ñuu i. ⁸ Yūcuán na te ni cahān de jíin sava ga mozo de: Ndiñi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chi nasūu ñáyuu vāha cácuu i. ⁹ Núu súcuan te cuáhán jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo tācá ichi. Te ni castútú de ndiñi ñayuu ní canihīn de, cúu ñayuu cunéé,

cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹ Te ni quīvi rey ini vehe jeē cahán de jíin ñáyuu ni cutútú. Te ni jito de nuū ñin tēe jeē tu ñúhun sahma jeē ni jéhe de cuhun ñayuu quijicoo vico nándāha. ¹² Te ni cahán de jíin tēe ún: Amigo, ¿ndese ni quīvi ró yáha jéē tu ñúhun ró sahma vico nándāha? áchí de. Te máá tēe ún tu ní cáhán cuiti de. ¹³ Yūcuán na te ni cahán rey jíin tēe cájeni cohō: Jñi de te cuhni rō ndaha de jehē de, te quenehen ró de na quíhín de nuū quéhe nuū néē. Te yūcuán ndáhyū de te nacayíhí yuhu de jeē ndóho xeēn de. Achí rey. ¹⁴ Chi cána Yaā Dios cuehē ñayuu jeē na cándíje i. Te jecu-ni i candíje, te máá i nácāji ya jeē ndúu i sēhe ya. Achí Jesús.

Siquī xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návāha cahán yā ñin jñūhun jeē nihín de cuēchi siquī yā. ¹⁶ Te ni catají de jecu tēe cáscuáha jíin máá de jíin tēe grupo Herodes cuangoo de. Te ni cacahán de jíin yá:

Maestro, cájini na jéē tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñin ñayuu siquī ní, chi tu sáha ní cuenta ndese cúu ñin ñin i, chi inuú-ni sáha ní jíin i. ¹⁷ Núu súcuan te cahán ní ndese jéni ni ní: ¿A iyó váha jeē chúnaa yō renta nuū rey nación Roma jeē jñí nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahán yā jíin de:

Tēe stáhú-ni cácuu ró. ¿Najehē cájito ndee rō ruhū?

¹⁹ Stéén xūhun jéé jéconaā renta na cóto ri, achí yá.

Te ni castéén de ñin denario nuū yā. ²⁰ Te ni jito ya, te ni cajnūhun yá de:

¿Ndé ñin nuū cúu jeē ndeé nuū xúhun yáha, te ndé síhví cúu jeē ndeé yāhá?

²¹ Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núū rey un jéē yíhi cuenta nuū de, te nacuāha ró núū Yaā Dios tāca jéē yíhi cuenta nuū maá yá, achí yá.

²² Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuangoo de.

Jeē ní cacajñūhún de síquī jeē nátecu ndīyi

(Mr. 12.18-27; Lc. 20.27-40)

²³ Te suni quivī un ní quecoo jecu tēe grupo saduceo nuū yā. Te tēe un cacahān jeē tu nátecu cuiti ndīyi. Te ni cacahān de jíin yá síquī ñin jnūhun, áchí de:

²⁴ Maestro, Moisés ni cahān de jeē núu ñin tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuññi nuū ndīyi ñani de. Achí Moisés. ²⁵ Te ñuu na ní íyo uxā ñani. Te tēe núu ní quijnáhan de jíin ñahan. Te ni jihī de. Te jeē tú sēhe de ní íyo, te ni ndōo ñasihí de nuū ñáni de. ²⁶ Te tēe ún suni ni jihī de, te tú na sēhe de ní íyo tucu. Te suni súcuan tēe unī, nde jíin ndihúxá de. ²⁷ Te nuū ní ndihi de ni cajihī, te suni ni jihī ñahan ún. ²⁸ Núu súcuan te quivī nátecu ndīyi, ¿ndé ñin de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahān yā jíin de:

Yōhyo cástívi ró jnūhun síquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi. ³⁰ Chi quivī nátecu ndīyi, te tuá na jnūhun quijnáhan tēe jíin ñahan coo. Chi coo i nájñūhun ndajéhé Yaā Dios andiví. ³¹ Te síquī jeē nátecu ndīyi, ¿á tu

ní cácahu ró tutu jnūhun jeē cahán Yaā Dios jíin ró? ³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihī de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

³³ Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios

(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesí tēe saduceo yuhu de ni sáha ya. Te ni candutútú de nuū yā.

³⁵ Te ñin de jeē cúu tēe stéén tutu ley Yaā Dios, ni cajnūhún de ya, chi coto ndee de ya cuní de:

³⁶ Maestro, ¿ndé ñin cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndíhi jeē cúsiñ ni yā, nde jíin ini jíin ánuá rō, jíin ní jēē níjnūnī rō, achí tutu. ³⁸ Yāha cúu jniñu ndácu ya jeē kujéñu ga te cánuú ndasí gá. ³⁹ Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō maá ró. ⁴⁰ Te chíji ndíndúú jnūhun yáha ní quenda ndíhi ley jeē ní tee Moisés, jíin ndíhi jeē ní castéén tēe ni canacani jnūhun Yaā Dios, achí yá.

Siquī jeē cúu Cristo sēhe yucūn David

(Mr. 12.35-37; Lc. 20.41-44)

⁴¹ Te níni cáyūcu tútú gá tēe fariseo un, te Jesús ni cajnūhun yá de:

⁴² ¿Ndese cájeni ni rō siquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Núu súcuan ¿te ndese cúu jeē David ni cahān de Jitoho de ya, ni sáha Espíritu Santo nde jenahán? Chi ni cahān de:

⁴⁴ Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū cujéhnú ró,
te na sáha ri jeē quende rō poder tāca jéē cájito uhū rohó.
Achí Yaā Dios. Achí David. ⁴⁵ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

⁴⁶ Te ni ĩn de tu ní cúu stió cuíñí cuiti de jnūhun nuū yā.
Te nde quivī ún tuá ni ĩn de ní chūndeyí ni de cajnūhún de ya.

*Jeē ni cáhān yā jeē iyó cuéchi de jíjnáhan de
(Mr. 12.38-40; Lc. 11.37-54; 20.45-47)*

23

¹ Yūcuán na te ni cahān Jesús jíin ñáyuu jíin tée cás-cuáha jíin yá:

² Tēe cástéén tutu ley Yaā Dios jíin tée grupo fariseo, cájeni ni de jeē ndíso jníñu de jeē steén de ley jeē ni jéhe ya nuū Moisés. ³ Núu súcuan te cuatáhú ró te squícu ró táca jéē cándacu de nuū rō. Te ma sáha ró nájñūhun cásáha máá de. Chi cácahān-ni de, te tu cásquícu de. ⁴ Chi suni cástéén de tāca ley ni catava maá de jeē yíí sáha, te cátee de siquī ñáyuu, te tu cécundeyí i squícu i. Te máá de jíjnáhan de, chi ni ĩn xinī ndáha de tu cáscánda de jeē squícu de. ⁵ Te máni siquī jeē na cuájñūhún ñáyuu de cúu ndíhi jeē casáha de. Chi cánujnahan ni de cuhni de cuehē jnūhun tutu ĩ jneē de jíin ndaha de. Te suni cásácáni ga de yuhvā yusáhma de jeē steén jeē cécujéhnú ga de vēsú inga ñáyuu. ⁶ Te cánujnahan ni de cucōo de nuū silla yíñūhún

gá nuū cáyeji ñayuu vico, jíin silla yíñúhún gá ini vehe íi sinagoga. ⁷ Te suni cánujnahan ni de jeē cahán yíñúhún ñáyuu jíin de nuū calle, jíin jéē cahán i maestro jíin de.

⁸ Te máá ró jijnáhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndíhi ró jéē cácuu ró hermano, te íyó ñn-ni Maestro rō jeē cúu ruhū, Cristo.

⁹ Te ma chiñúhún ró ni ñn tēe ñayivi yáha jeē cahán rō padre jíin de. Chi íyó ñn-ni Tátá rō jijnáhan ró, Yaā ndeé andiví. ¹⁰ Te suni ma cuáha ró jnúhun jeē cahán i jitoho jíin ró. Chi íyó ñn-ni Jitoho rō, te suu cúu ruhū, Cristo.

¹¹ Te tēe mēhñu ró jijnáhan ró jeē jejnínū nuū jnáhan, suu de cúu jeē kujéhnū ga. ¹² Chi tēe jeē sajhéhnū de máá de, sa ndululí de. Te tēe jeē sálulí de máá de, sa ndujéhnū de.

¹³ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cájesi rō jeē quívi ñayuu ndaha Yaā andiví jéē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

¹⁴ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yúcuán xeēn gā ndoho ró castigo.

¹⁵ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi ní ñuhun íchi jíin ní mar cájica cuu ró cánducú ró ñn ñayuu scandíje ró sáhān maá ró. Te núu ni candíje i, te casáha ró jéē vihyá gā cúu cuēchi i jeē quihín i infierno vēsú maá ró.

¹⁶ 'Nacā xeēn ndoho ró, chi cácuu ró nájnūhun tēe cuáá jéē steén ichi nuū ñáyuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí

oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁷ Tēe cánéé tēe cuáá cácuu ró jēē castívi ró jnūhun cácahān rō. ¿Ndé ñn cúu jeē kujénu ga, á oro un chí Yaā Dios jeē ndeé ini templo jeē sáhií oro un? ¹⁸ Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajníñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁹ Tēe cánéé tēe cuáá cácuu ró jēē castívi ró jnūhun cácahān rō. ¿Ndé ñn cúu jeē kujénu ga, á ndajníñu yúcu nuū altar, chí Yaā Dios jeē sáhií yā ndajníñu ún? ²⁰ Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jíin ndajníñu yúcu nuū altar ndácunehen de. ²¹ Te tēe jeē jéjnūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. ²² Te tēe jéjnūhun téyí, te núu ndácunehen de andiví, núu súcuan te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

²³ 'Nacā xeēn ndoho róhó tēe cástéén tutu ley jíin róhó tēe fariseo, chí tēe stáhú-ni cácuu ró. Chí cásáha ró úxī uxī nuhnī tamínú jíin yucū anís jíin yucū comino, te cásocō rō ñn ñn siquī tāca úxī un núu Yaā Dios. Te cástóo ró jnūhun cánuú ndasí gá nuū ley, suu jeē cáca ndaā rō, jíin jēē cundáhú ni rō jnáhan ró, jíin jēē candíje ró. Tāca jēē yáha cánuú sáha ró núu, te suni ma stóo ró jēē socó rō tāca yúcū ún. ²⁴ Cácuu ró nájnūhun tēe cuáá jēē steén ichi nuū ñayuu. Chí cásquícu ró ñn jeē lulí gá un, te cástóo ró jēē cánuú gá. Te suu cúu nájnūhun jeē cātava rō chūcún ndíhī jeē ñūhun nuū ndúxi, te cásocó ró ñn quití cáhnu jeē naní camello.

²⁵ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi nájnūhun jeē cánacate ró yátā vaso jíin yátā cohó. Te ichi íni rō chi ñúhun máni máá jnúhun cuíhná jíin jnúhun ndíyo ni.

²⁶ Tēe cuáá cácuu ró, fariseo. Xihna gā sáha ró jéē coo ndoo ini anuá rō, te yūcuán na te suni coo ndoo tāca jéē casáha ró jéē cájito ñayuu nuū.

²⁷ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi cándāa ró nájnūhun vehe ndíyi nuū panteón jeē cáyaa. Chi ichi yátá jíto luu, te ichi íni ñúhun chitú yiqui ndíyi jíin táca jéē tehýú. ²⁸ Te súcuán cácuu máá ró, chi ichi yátá rō casáha ró jeē tēe ndaā cácuu ró núū ñayuu. Te ichi íni rō ñúhun chitú jnúhun stáhú-ni jíin jnúhun néé.

²⁹ 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi casáha ró vehe siquī nuū yíndūji ndíyi jíi rō, tēe ni canacani jnúhun Yaā Dios nde jenahán. Te casáha luu ró vehe siquī nuū yíndūji tāca tēe ni iyo ndaā. ³⁰ Te cácahān rō: Núu jeē suni yúcu yó tiempo jeē ní cotecu ndíyi jíi yō, te ma squívi nduu yō jíin de jeē cáhni yō tēe ni canacani jnúhun Yaā Dios, achí rō. ³¹ Te súcuán cácahān ndaā rō jeē maá ró cácuu yucūn ñayuu ni cajehni tēe ni canacani jnúhun ya. ³² Núu súcuán te tāca cuēchi jeē ní casquéjéé ndíyi jíi rō, máni un casáha ga maá ró.

³³ 'Va sēhe coō cácuu ró, chi xeēn rō nájnūhun coō. ¿Ndese cācu ró jéē ma jnahnú ndetū rō quingoo ró infierno? ³⁴ Núu súcuán te tají rí tāca tēe nacani jnúhun Yaā Dios nuū rō, jíin táca tēe ndíchí jéē castéén jnúhun ya. Te sava de cahni rō, te sava de cata caa ró jicā cruz. Te sava ga de cani ró de ini tācá vehe iī sinagoga, te scúnu ró de quingoo de tācá ñuu. ³⁵ Te súcuán te condee cuēchi siquī maá ró jeē ní cajehni jíi rō tāca tēe ndaā, xihna gā nde Abel

tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto iī jín altar. ³⁶ Jendaá cahán rī jín ró jeē tāca cuéchi yáha condee siquē ñáyuu iyó vijna.

Jeē cucuíhyá ni yā jító ya ñuu Jerusalén
(Lc. 13.34-35)

³⁷ 'Róhó ñuu Jerusalén, jéhni rō tēe cánacani jnūhun Yaā Dios, te jéhe ro yūū xinī téé tájí Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñūhun ndují jéē nastútú tí sēhe tí chíji ndijēn tī, te tu ní cúní rō. ³⁸ Núu súcuan te vijna te stóo uun na ri rohó jín sēhe ró. ³⁹ Chi cáhán rī jín ró jéē ndé vijna te ma cóto cuíti gā rō nuū rī, chi nde quiji quivī jeē cahán sēhe ró: Yōhyo vāha Yaā cúu Yaā véndiji jín jniñu máá Jítóho yō Yaā Dios, achi i. Achí yá.

Jeē ní cachi yā jeē náā templo
(Mr. 13.1-2; Lc. 21.5-6)

24

¹ Te ni quenda Jesús ini templo cáhnu cuahān yā. Te ni quecoo tēe cáscuáha jín yá, te ni cacahān de jín yá siquē tācá vehe jeē ndejnáhan jeē cúu máá templo un. ² Te ni cahān yā jín de:

Tāca jéē cájito ró yáha, jendaá cahán rī jín ró jeē quiji quivī jeē ma cóso jnáhan ga ni ñn yuū, chi ndíhi jnanū. Achí yá.

Na seña coo nuū cuácuyajni ndíhi ñayīví
(Mr. 13.3-23; Lc. 21.7-24; 17.22-24)

³ Te ni jehēn yā jín téé cáscuáha jín yá nde yucu Olivos, te ni cucōo ya yūcuán. Te ni quecoo de nuū yā, te ni cacajnūhun sñn de ya:

Castūhun ní ndé quiv̄ coo tāca jéē ní cachi ní jéē coo. ¿Te na seña coo núu ni cuyajni quiv̄ ndíji ní jín jéē jínu ñayiv̄? áchí de.

⁴ Te ni cahān Jesús:

Coto ró jéē ma stahú ni ñin de róhó. ⁵ Chi quijicoo cuehē tēe jeē stahú jín s̄hv̄ rí. Máá rí cúu Cristo, achi de. Te súcuan stáhú de cuehē ñayuu. ⁶ Te nih̄n rō jnūhun jeē tāca lado iyó guerra, chí je yajni coo guerra. Te ma yūhu ró, chi cánuu coo súcuan. Te ni ná tu jinū quiv̄ ndih̄i ñayiv̄. ⁷ Chi ndonda nación siqū inga nación, te ndonda ñuu siqū inga ñuu jeē cuajnáhan. Te coo jnamā jín cuéhȳ xeēn. Te cháha chúcuan jnāa. ⁸ Te tāca jéē yáha cácuu jnūndóho quejéé x̄hna ñúhún gá.

⁹ Yūcuán na te nastúu i róhó jijnáhan ró jéē stóho i róhó te cahni i róhó. Te ndih̄i ñayuu quit̄i ni i nuū rō jeē siqū ruhū. ¹⁰ Te quiv̄ ún chi cuehē ñayuu candíje caca yátá i, te quit̄i ni i nuū jnáhan i, te nastúu jnáhan i. ¹¹ Te canecoo cuehē tēe stáhú, te cahān de jeē jnúhun Yaā Dios cánacani de, te stáhú de cuehē ñayuu. ¹² Te nducuehē jniñu néé, te jeē yúcuan cuehē i ma cóo manī gā i. ¹³ Te ñayuu cuiñi nih̄in jín jnúhun ri nde quiv̄ jínu, ñayuu ún chi cācu. ¹⁴ Te jnūhun yáha síqū ndese ndácu Yaā Dios jniñu, cuitē núu n̄í cáhnu ñayiv̄, návāha cuni ñayuu tācá nación. Yūcuán na te jínu ñayiv̄.

¹⁵ Te Daniel, tēe ni nacani jnūhun Yaā Dios, ni tee de jnūhun ñin tēe néé jéē quíji. Te róhó jéē cácahu tutu ún, na jécūhun ni rō. Chi ñin quiv̄ te cuni rō jeē sáha ndevāha de jeē stiv̄i de tācá ndajniñu iñi ini templo, te cuiñi de ini lugar iñi. ¹⁶ Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁷ Te ñayuu cáyūcu núu quéhe, ma ndiv̄i i ini vehe jeē quénehen i ndajniñu i, chí cánuu cunu yachī i návāha cācu i. ¹⁸ Te ñayuu cáh̄in nuū itu, ma ndíji i vehe jeē quih̄in i sahma

i. ¹⁹ Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña. ²⁰ Te cacān tahu rō jeē ma quíji jnūndóho un jéē cunu ró máá tiempo cúun yuhvā ni quivī ndétātú. ²¹ Chi jeē quejéé un te coo cuehē jnūndóho xeēn, jeē ná tu coo súcuan nde quivī ní jecōo ñayīví te nde vijna. Te jeē ndēhi jnūndóho ún te ni ma cóo ga jeē súcuan. ²² Te núu tú nastíyi Yaā Dios tiempo jnūndóho ún, te ni ñin ñayuu ma cácu cuiti i. Te jeē siquí ñayuu cácondíje jeē ní nacāji ya, jeē yúcuan nastíyi ya tiempo un.

²³ 'Núu súcuan te núu ñin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahán i. ²⁴ Chi canecoo tēe cástáhu jéē achi de jeē Cristo cúu de, chí achi de jeē tēe nácani jnūhun Yaā Dios cúu de. Te sáha de jniñu jénu jeē naa ni ñayuu coto i, návāha stáhu de nde maá ñayuu ní nacāji ya, te núu na cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ñayuu jíin ró: Cuácondēhe ró, chi nde nuū ñūhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yāha íne ya, achi i, te ma candíje ró jíjnáhan ró. ²⁷ Chi nájnūhun jeē ndíndēe sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quivī ndiji ruhū, Yaā ní nduu tēe, chi ndihi ñayuu coto. ²⁸ Te nájnūhun jeē cutútú téji ndé-ni cúu nuū catú quiti ní jíhī, suni súcuan coo tāca jéē ni cáhān rī ndé-ni cúu-ni nuū cáhiyo ñayuu.

Ndese coo quivī ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

²⁹ Yūcuán na te núu ni ndihi tāca jnūndóho quivī ún, te cojnúu níāndii, te yoō ma ndíi gā. Te ñingoo quīmi andiví. Te tāca jéē íin andiví chi quisi i. ³⁰ Yūcuán na te coto ñayuu nuū maá rí, Yaā ní nduu tēe, ndiji ri ichi

ándiví. Te ndahyū ñayuu tācá nación ñí cáhnu ñayīví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu cujéhnu ri. ³¹ Te tají rí ndajéhé rī quingoo, te tiví ñihin ya trompeta. Te quinastútú yá ñayuu ní nacāji ri ndicúún lado ñayīví, nde ñin lado ñayīví jíin ndé inga lado.

³² 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ³³ Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo. ³⁴ Jendaá cahán rī jíin ró jeē ma cúu ndīhi ñayuu jeē cóto jnūndóho ún, chi nde squícu ndīhi jniñu ún. ³⁵ Andiví jíin ñáyīví chi naa, te tāca jnūhun cáhān rī chi ma náā, chi ndīhi squícu.

³⁶ 'Te quivī jíin hora jeē ndiji ri, tú ni ñin ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ñin ni Tátá rī Yaā Dios cúu jeē jiní.

³⁷ 'Chi nájnūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe. ³⁸ Chi quivī ún, nde ná tu cuun saū xeén, te cáyeji i cájiji i, cánandāha i, te cájēhe i sēhe sīhí i jeē nándāha, nde ni jinū quivī jeē ni quívi Noé ini barco cáhnu jeē naní arca. ³⁹ Te tu ní cácandíje ñayuu jeē cuun saū xeén, te ni cuun, te ni ndaa ndute ni cajihī ndīhi i. Te suni súcuan coo núu na ndíji ruhū, Yaā ní nduu tēe. ⁴⁰ Te quivī ún cone uū tēe sájniñu nuū ítu. Te ñin de naquihin ri, te inga de ndōo. ⁴¹ Te coo uū ñahan jeē ndíco cáhnu, te ñin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácandíje i.

⁴² 'Núu súcuan te ndito na cóo ni rō, chi tu cájini rō na quivī ndiji Jitoho rō. ⁴³ Te na chūhun ni rō jeē cahán jnūhun yátá yáha: Tēe chíí vehe, núu jeē jiní de na hora

quiji ñacuíhná, te condito de, te ma cuáha de jnūhun sácuíhná ndajníñu vehe de núú. ⁴⁴ Te róhó jíjnáhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

Jnūhun yátá síquī mozo

(Lc. 12.41-48)

⁴⁵ 'Núu súcuan te coo ró nájñūhun ñn mozo jeē ndíto xinī te squícu vāha. Te máá patrón ni jeni de mozo un jéē cóto i ñayuu vehe de, návāha scáji i máá hora. ⁴⁶ Te yōhyo ndetū mozo un jéē núu ni ndee patrón, te cuni de jeē súcuan squícu vāha i. ⁴⁷ Jendaá cahán rī jíín ró jeē cani de mozo un jéē cóto i ndíhi ndajníñu de. ⁴⁸ Te núu mozo sáha néé cúu i, te jéni ni i jeē ma ndíji yachī patrón i, ⁴⁹ te quejéé i cani i jnáhan mozo i, te caji i coho i jíín tēe cánajini, ⁵⁰ núu súcuan te ndee-ni patrón quivī jeē tu ndétu i jíín hora jeē tú na vé jéni ni i. ⁵¹ Te stóho xeēn de i, te squívī de i nuū cáhīin tēe stáhú-ni. Te yūcuan ndáhyū i te nacayīhí yuhu i jeē ndoho xeēn i. Achí yá.

Jnūhun yátá síquī uxī sūchi síhí

25

¹ Te suhva cúu jeē ndácu Yaā andíví jniñu nuū ñáyuu: Cúu nájñūhun ñn vico nándāha. Te ni īyo uxī sūchi síhí jeē ní caquihin i linterna cándaha i, te ni quendacoo i cuajnahan i ñn tēe nandāha. ² Te uhūn i chi tú ndito xinī i, te uhūn i chi ndito xinī i. ³ Te sūchi tú ndito xinī, cándaha i linterna i, te tu cándaha i petróleo jeē náchuhun i. ⁴ Te sūchí ndito xinī, chi cándaha i botella petróleo jíín linterna i. ⁵ Te níní cúcuéé quiji tēe nandāha ún, te ni quee māhná, te ni caquixī ndíhi i. ⁶ Te nuū ní cuu sava ñúú, te ni cajini i jeē cácana jee: Je vēji tēe nandāha. Cuángoo quijnahan rō de jíjnáhan ró, áchí. ⁷ Yūcuán na te tāca sūchi síhí un ní candonda i, te ni casátūhva i linterna i.

⁸ Te sūchi tú ndito xinī, ni cacahān i jín sūchi ndito xinī: Cuāha jecu petróleo nuū rī jijnáhan ró, chi cuandahvā linterna rī, achí i. ⁹ Te ni cacahān sūchí ndito xinī: Ma cúu, chí ma cánda jeē cúu máá rí jín máá ró. Vāha ga quingoo ró núū cúyāhu, te cuaan ró jéē cúu máá ró. Achí i. ¹⁰ Te níni cuángoo i cuaan i, te ni quee-ni tēe nandāha. Te sūchi cáhiyo tūhva un, ní quivicoo i jín de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyá na quivicoo ná, achí i. ¹² Te ni cahān maá de: ¿Ndé nuū véjicoo ró? Chi tu jíní rī rohó, achí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quiví na hora ndiji ruhū, Yaā ní nduu tēe. Achí yá.

Jñuhun yátá síquī tēe ní jēhe núu xūhun núū tāca mozo

¹⁴ 'Te suhva cúu jeē ndácu Yaā andiví jniñu nuū ñáyuu: Cúu nájnūhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jijnáhan, te ni jēhe núu de xūhún de nuū i, jeē na sájniñu i jín návāha nducuehē.

¹⁵ 'Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chi jíní de nasaa canda ñn ñn i sájniñu i jín. Yūcuán na te ni quihin de ichi cuahān jicá de. ¹⁶ Te mozo jeē ní quihin uhūn mil xūhún, ni sájniñu de jín. Te ni nihīn de uhūn gā mil síquī. ¹⁷ Te mozo jeē ní quihin uū mil xūhún, suni ni nihīn de uū gā mil síquī. ¹⁸ Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

¹⁹ 'Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. ²⁰ Te ni quee mozo jeē ní quihin uhūn mil xūhún un, te ni nacūaha de xūhún un núū patrón de jín úhūn gā mil jeē ni níhīn de

siquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni nīhīn na síquī. Achí de. ²¹ Te ni cahān patrón jíin de: Iyó váha núu súcuan. Yōhyo vāha mozo cúu ró jéē squícu vāha ró. Chi vāha ni squícu ró ìn jniñu lúli-ni, te vijna te cuāha ri jniñu jéhnū ndacu ró. Te quīvi ró núu cusī ni rō jíin rí. Achí de. ²² Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní úū mil nuū ná, te yāha íyó úū gā mil jeē ni nīhīn na síquī. Achí de. ²³ Te ni cahān patrón jíin de: Iyó váha núu súcuan. Yōhyo vāha mozo cúu ró jéē squícu vāha ró. Chi vāha ni squícu ró ìn jniñu lúli-ni, te vijna te cuāha ri jniñu jéhnū ndacu ró. Te quīvi ró núu cusī ni rō jíin rí. Achí de. ²⁴ Te ni quee mozo jeē ní quihin ìn mil xūhún un, te ni cahān de jíin patrón: Je jíni na nīhín jéē tée xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jéhe ní. ²⁵ Te jeē yúcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de. ²⁶ Te ni cahān patrón jíin de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jéhe ri. ²⁷ Núu jeē ni chúne ró xūhun rí nuū banco nuú, te jeē ní ndee rī te naquihin ri xūhun rí nde jíin séhe xūhun núu. Achí de jíin i. ²⁸ Te ni cahān de jíin táca gá mozo de: Núu súcuan te quende rō mil xūhun jíinā nuū i, te cuāha ro núu mozo névāha uxī mil. ²⁹ Chi ñayuu jeē névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰ Te mozo yáha jéē tu sájniñu vāha, quenehen ró i na quíhín i nuū quéhe nuū néé. Te yúcuan ndáhyū i te nacayíhí yuhu i jeē ndoho xeēn i. Achí patrón un.

Siquī jeē cóo juicio tācá nación

³¹ Te ni cahān gā yā:

Īn quivī te ndiji máa Yaā ní nduu tēe, te cuu ya Rey nuū ñáyuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujéhnua ya. ³² Te ndutútú ñayuu tācá nación nuū yā. Te sásin ya i jijnáhan i, nájnūhun cúsín lanchi jíin ndixúhú sáha tēe ndito ti. ³³ Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá. ³⁴ Yūcuán na te cahān Rey jíin ñáyuu cáhiin lado váha ya: Nacā ndetū rō jeē ni sáha Tátá rī jíin ró. Nehen quivicoo ró núu ndácu ró jniñu. Chi nde quivī ní jecōo ñayiví te je ni sátūhva ya nuū ndacu ró jniñu. ³⁵ Chi ni jiī rī sōco, te ni cajēhe ro jēé ní yeji rī. Ni jichī rī ndute, te ni cajēhe ró jēé ní jihi ri. Ni quiji ri nde ñuu jicá, te ni cajēhe núu ró vehe ni ndōo ri. ³⁶ Ni cumanī sahma ri, te ni cajēhe ró. Ni cocuhū rī, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuan cahān yā jíin ñáyuu cáhiin lado váha ya. ³⁷ Yūcuán na te cahān ñayuu váha un jíin yá: ¿Na quivī ní cajito ná níhín jēé jíi ni sóco, te ni cajēhe na jēé ní yeji ní, chí jēé jichí ni ndute, te ni cajēhe ná ní jihi ní? ³⁸ ¿Te na quivī ní cajito ná jēé ní quiji ní ndé ñuu jicá, te ni cajēhe núu ná vehe ni ndōo ní, chí jēé cumanī sahma ní, te ni cajēhe ná? ³⁹ ¿Te na quivī ní cajito ná jēé cuhú ni, chí jēé íne ní vecāa, te ni jecondēhe ná níhín? achi i. ⁴⁰ Yūcuán na te cahān Rey jíin i: Jendaá cahán rī jíin ró jēé ná ni casáha ró súcuan jíin ĩn tācá hermano rī jeē cácandíje, vēsú ñayuu núu ga cúu i, te nuū maá rí ni casáha ró.

⁴¹ Yūcuán na te suni cahān Rey jíin ñáyuu cáhiin lado jecó yá: Ñayuu jnahnū ndetū cácuu ró. Cuijiyo quingoo ró núu ñuhún jeē cayú ní cáni, nuū iyó túhva cone jexeén jíin táca táchī jeē cájejniñu nuū. ⁴² Chi ni jiī rī sōco, te tu ní cajēhe ro jēé cáji rī. Ni jichī rī ndute, te tu ní cajēhe ro

jéē coho ri. ⁴³ Ni quiji ri nde ñuu jicá, te tu ní cájēhe núú ró vehe ndōo ri. Ni cumanī sahma ri, te tu ní cájēhe ró. Ni cocuhū rī, ni ine ri vecāa, te tu ní jécondēhe ró ruhū. Súcuān cahān yā jíín ñáyuu cáhīin lado jecó yá. ⁴⁴ Yūcuán na te cahān ñáyuu un jíín yá: ¿Na quivī ní cajito na níhín jéē jíi ni sóco, chí jéē jichí ni ndute, chí jéē ní quiji ní ndé ñuu jicá, chí jéē cúmanī sahma ní, chí jéē cuhú ní, chí jéē íne ní vecāa, te tu ní cájēhe na jéē cúmanī nuū ní? Achi i. ⁴⁵ Yūcuán na te cahān yā jíín i: Jendaá cahán rī jíín ró, jeē tu ní cásáha ró súcuān jíín ni ñin tācá hermano rī jeē cácuandíje, vēsú ñáyuu núu ga cúu i. Núu súcuān te suni nuū maá rí cúu jeē tu ní cásáha ró, achi yā. ⁴⁶ Yūcuán na te quingoo ñáyuu un núu ndóho i níí cáni. Te ñáyuu váha un quívicoo i nuū cótecu i níí cáni. Achí Jesús.

*Jeē ní casquijnáhan de jnūhun jeē jni de Jesús
 (Mr. 14.1-2; Lc. 22.1-2; Jn. 11.45-53)*

26

¹ Te nuū ní ndihí ni cahān Jesús tāca jnúhun yáha, te ni cahān yā jíín téē cáscuáha jíín yá:

² Je cájini rō jeē uū na quivī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achí yá.

³ Yūcuán na te sutū cácujuhnu, jíín téē cástéén tutu ley, jíín táca téē jéhnú jeē cándacu jniñu nuū ñáyuu hebreo, ni candutútú de ini patio vehe palacio maá sūtū cujuhnu ga jeē naní Caifás. ⁴ Te ni candajnúhún de ndese jni de Jesús jíín jnúhun stáhú, te cahni de ya. ⁵ Te ni cacahān de:

Ma jni yó de máá quíví vico, chi ndonda ñáyuu siquī yō, achí de.

*Jnūhun ñahan jeē ní chuhun perfume xinī yā
 (Mr. 14.3-9; Jn. 12.1-8)*

⁶ Te íne Jesús ñuu Betania vehe Simón, tēe ni ndoho cuehyī stehyú. ⁷ Te ni quee ñin ñahan nuū yā, ndáhá ña ñin frasco yuū luu jeē ñúhun aceite perfume jeē yóhyo yahu ndéé. Te ni chuhun ña xinī yā níní jéē yéji yā staā. ⁸ Te ni cajito tēe cáscuáha jíin yá, te ni caquitī ni de, te ni cacahān de:

¿Najehē cúu jeē náā saá-ni perfume jíinā? ⁹ Chi cuu xīcó yahu yó núú, te cuāha yo xúhun núú ñáyuu ndahú. Achí de.

¹⁰ Te ni jini Jesús jnūhun cácahān de. Te ni cahān yā jíin de:

¿Naun cásáha ró jéē nácani uhū ni ñahan yáha? Chi ñin jniñu váha cúu jeē ni sáha ña jíin rí. ¹¹ Chi níní coyūcu ñáyuu ndahú jíin ró, te ruhū chi tuá condee rī jíin ró. ¹² Chi jeē ní chuhun ña perfume yáha ruhū, suu cúu jeē ni sátúhva ña ruhū nde quivī quíndūji ri. ¹³ Jendaá cahān rī jíin ró jeē ní cáhnu ñayīvi ndé-ni cúu nuū cuité jnūhun yáha jéē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mr. 14.10-11; Lc. 22.3-6)

¹⁴ Yūcuán na te ñin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujuhnu. ¹⁵ Te ni cahān de jíin:

¿Nasaa cuāha ní núú ná, te na nastúu ná de nuū ní? áchí de.

Te ni cajēhe ocō uxī xūhun plata nuū de. ¹⁶ Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máá quíwī jeē quejée vico jeē cáyeji ñayuu pan jeē tú na levadura yíhi, te ni quijicoo tēe cáscuáha un núū Jesús. Te ni cacahān de jíin yá:

¿Ndé nuū cuní ni jée quísatūhva ná cuxíni ní vico pascua? áchí de.

¹⁸ Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máá Maestro jeē ní cuyajni quíwī cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

¹⁹ Te tēe cáscuáha jíin yá, ni casáha de nájñūhun ni ndacu Jesús jniñū nuū de, te ni casátūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. ²¹ Te níni yéji yā jíin de te ni cahān yā:

Jendaá cahán rī jíin ró jeē ñin róhó nastúu ruhū vijna, áchí yá.

²² Te ni cacucuíhyá ndasí ni de. Te ná ñin ná ñin de ni cacajnūhún de ya:

¿A sáña cúu? áchí de.

²³ Te ni cahān yā:

Ñin róhó jée cáyeji cáhnu jíin rí ñin cohō, suu ró nastúu ruhū. ²⁴ Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jnúhun ri nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

²⁵ Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

²⁶ Te níní jēē cáyeji de jíin yá, te ni quihin ya pan, te ni nacuatáhu yá, te ni tahu cuéché yá, te ni jēhe ya nuū tée cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²⁷ Yūcuán na te ni quihin ya ĩn copa ndūxi uva, te ni nacuatáhu yá, te ni jēhe ya nuū de. Te ni cahān yā:

Coho jíináhan ró. ²⁸ Chi yāha cúu niñī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu, te coo jnūhun cáhnu ni nuū cuéchi i. ²⁹ Te cáhán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Tátá rī jniñu nñí ñayīví, te sáá te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jíní de ya

(Mr. 14.26-31; Lc. 22.31-34; Jn. 13.36-38)

³⁰ Te ni jita ya ĩn yaa ĩ jíin de jíináhan de. Te ni quenda ya cuahān yā jíin de nde yucu Olivos. ³¹ Yūcuán na te ni cahān yā:

Ndivii rō nayūhu ró jeē siquí ruhū jecuáā vijna. Chi suhva je yósó jnūhun ri nuū tútu ĩi, ni cahān Yaā Dios: Cuāha ri jnūhun jeē cáhni ñayuu tēe ndíto lanchi, te lanchi un cuítē núu tí jeē yūhu tí, achí. ³² Te jeē nátecu rī, te xihna ruhū cosnūu rí quihīn rī región Galilea, te sáá te najinūcoo ró, achí yá.

³³ Yūcuán na te ni cahān Pedro:

Vēsú ndīhi de na náyūhú de, te máá ná chi ma náyūhú cuítī ná, achí de jíin yá.

³⁴ Te ni cahān yā jíin de:

Jendaá cáhán rī jíin ró jeē jecuáā vijna, nde ná tu cana líhli, te yūhu ró jeē jññ ñayuu rohó, te unī jínu cahān rō jeē tu jíní rō ruhū, achí yá.

³⁵ Te ni cahān Pedro jíin yá:

Vēsú núu cuu na jíin ní, te ma cáhán cuítī na jēē tu jíní na níhín, achí de.

Te suni súcuan ni cacahān ndihī tēe cáscuáha jíin yá.

Jeē ni jicān tahu yā nuū huerto Getsemaní

(Mr. 14.32-42; Lc. 22.39-46)

³⁶ Yūcuán na te ni jinū Jesús jíin tēe cáscuáha jíin yá ĩn lugar nuū naní Getsemaní. Te ni cahān yā jíin de:

Yāhá-ni cucōo ró, te na quíhín rī yūcuan cácan tahu rī, achí yá.

³⁷ Te ni jeca ya Pedro jíin ndindúú séhe Zebedeo cuahān yā jíin de. Te ni quejéé yá cucuíhyá ndasí ni yā te cúxíi ni yā jeē quíji jnūndóho siquī yā. ³⁸ Yūcuán na te ni cahān yā jíin de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró jíin rí.

³⁹ Te ni jica ya jecu gā, te ni jecuiñī yití yá ni jequin ya nuū yā nuū ñúhun, te ni jicān tahu yā suhva nuū Yaā Dios:

Tátá maá ná, núu cuu te tejiyo ní jnūndóho yáha jéē ma quíji siquī ná. Te nasūu jéē cuní maá ná, chi jeē cuní maá ní na cóo, achí yá.

⁴⁰ Yūcuán na te ni ndee yā nuū ndinúní tēe cáscuáha jíin yá, te ni jito ya jeē cáquixí de. Te ni cahān yā jíin Pedro:

¿A tu ní cánda ró condito ró jíin rí vēsú ĩn hora? ⁴¹ Coondito ni rō te cacān tahu rō jeē chindéé ñáhán yá rohó jéē ma sáha ró cuéchi jeē coto ndee jeneé róhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

⁴² Te ni jehēn tucu ya vuelta uū, te suhva ni jicān tahu yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, achí yá.

⁴³ Te ni ndee tucu ya nuū de, te ni jito ya jeē cáquixí tucu de, chi yōhyo cájiū de māhná. ⁴⁴ Te ni stóo ya de, te cuahān tucu ya cuacacān tahu yā vuelta unī. Te suni

jnūhun yúcuan ní cahān yā. ⁴⁵ Yūcuán na te ni ndee tucu ya nuū de jínáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jniī tēe cáhiyo cuēchi ruhū. ⁴⁶ Ndocuiñī jijnáhan ró, chi je vēji tēe nastúu ruhū, te quihīn yō jíin de, áchí yá.

Jeē ní cajniī de Jesús

(Mr. 14.43-50; Lc. 22.47-53; Jn. 18.2-11)

⁴⁷ Te sá cáhán gā yā súcuan, te ni quee-ni Judas, iin jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujuhnu jíin táca tēe jéhnū cándacu jniñu nuū ñáyuu hebreo, ni catají tēe ún. ⁴⁸ Te Judas, tēe nástúu ya ún, je ni jēhe de iin seña nuū tēe un jínáhan, chi ni achí de:

Tēe jeē téchūhu rí un cúu. Te jniī ró jínáhan ró, áchí de.

⁴⁹ Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. ⁵⁰ Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajniī de Jesús.

⁵¹ Te iin tēe jeē cáhiin jíin Jesús, ni tava de espada de, te ni jehnde de sōho iin mozo maá sūtū cujéhnū ga.

⁵² Yūcuán na te ni cahān Jesús jíin de:

Nachuvāha espada rō, chi tāca jēe cájejnáhan jíin espada, suni jíin espada cuu. ⁵³ ¿Te á tu cájini rō jeē cuu cacān tahu rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū? ⁵⁴ Te núu súcuan, ¿te ndese cuu squícu jnūhun cáhán tutu iī jeē cánúu ndoho ri súcuan? áchí yá.

⁵⁵ Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin ujnu jeē jnií ró rúhū jeē súcuan. Tāca quívī ni cucōo ri jíin ró jijnáhan ró ini templo cáhnu, ni steén rī jnūhun, te tu ní cájnií ró rúhū. ⁵⁶ Te súcuan cásáha ró návāha na squícu jeē cahán tutu ií jeē ní catee tēe ni canacani jnūhun Yaā Dios, achí yá.

Yūcuán na te ndihí tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cácujéhnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajnií Jesús, cuango de jíin yá nuū Caifás, tēe cúu sutū cujéhnu ga. Te yūcuan cáhiin tútú tēe cástéén tutu ley jíin táca tēe jé́hnu cándacu jniñu. ⁵⁸ Te Pedro chí jícá-ni ndíquín de ya, te ni jinū de patio sutū cujéhnu ga. Te ni quívi de ini patio, te ni cucōo de jíin táca policía, návāha coto de ndese coo síquī yā.

⁵⁹ Te sutū cácujéhnu jíin táca tēe jé́hnu jíin ndihí tēe cásáha junta cujéhnu ga, ni canducú de tēe cahán jnūhun yáá síquī Jesús, chí cahni de ya cácuni de. ⁶⁰ Te vēsú ni quecoo cuehē ñayuu cácahán yaá, te tu ní cánihin de cuéchi síquī yā jeē cáhni de ya. Te jeē sándihí te ni quecoo uū testigo jeē cahán yaá síquī yā. ⁶¹ Te áchí:

Tēe yáha ní cahán de jeē cuu canu de templo Yaā Dios, te nuū uní-ni quívī te nucondichí sáha de, achí.

⁶² Yūcuán na te ni ndocuiñī maá sūtū cujéhnu ga, te ni cahán de jíin yá:

¿Naun tu cáhán cuiti rō? ¿A íyó ndáā jeē cácahán tēe yáha síquī rō? Achí de.

⁶³ Te Jesús tu ní cáhán cuiti yā. Te ni cahán maá sūtū cujéhnu ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jín yá.

⁶⁴ Te ni cahān yā:

Suu ri cúu, nájñuhun cáhán rō. Te na cástūhun rí nuū rō jijnáhan ró jēē tāca quívi jeē quíji te coto ró rúhū, Yaā ní nduu tēe, condee rī lado váha Yaā iyó poder. Te coto ró jēē ndíji ri ichi ándiví jín vícō. Achí yá.

⁶⁵ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

Tēe yáha chi cáhán de jñuhun ndevāha jeē quití ni Yaā Dios, chi sáha de máá de Sēhe Yaā Dios. ¿Ndé jíni ñúhún gá yō testigo núu súcuan? Chi je ni cajini ró jñuhun ndevāha cáhán de. ⁶⁶ ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahán de súcuan, te jíni ñúhún cuu de, achí.

⁶⁷ Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. ⁶⁸ Te ni cacahān de:

Te núu Cristo cúu ró, te cachi rō ndé ñn cúu jeē ní cani róhó, achí de.

Jeē ní cachi Pedro jeē tu jíní de ya

(Mr. 14.66-72; Lc. 22.56-62; Jn. 18.15-18, 25-27)

⁶⁹ Te níni jēē súcuan cúu, te Pedro néne de nuū quéhe ini patio. Te ni quee ñn ñahan jéjñíñu vehe ún, te ni cahān ña jín de:

Róhó chi suni ni jica ró jín Jesús tēe Galilea, achí ña.

⁷⁰ Te máá de tu ní cáchi de, chi ni cahān de ni cajini ndíhi ñayuu:

Tu jíní rī na jñuhun cáhán rō, achí de.

⁷¹ Te ni quenda de yéhyí núu quéhe, te ni jito inga ñahan nuū de. Te ni cahān ña jín ñáyuu cáhiin yūcuán:

Tēe yáha chi suni ni jica de jíin Jesús, tēe ñuu Nazaret, achí ña.

⁷² Te ñga jínu tu ní cáchi tucu de, chi sa ni cahān teyí de:

Tu jíni rī tēe ún, áchí de.

⁷³ Te ni cunúu jecu gā, te ñayuu cáhiin yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahán rō jeē tēe Galilea cúu ró, áchí i.

⁷⁴ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíni cuiti rī tēe ún, áchí de.

Te ni cana-ni líhli. ⁷⁵ Te ni nucūhun ni de jnūhun ni cahān Jesús jíin de: Nde ná tu cana líhli, te yūhu ró te cahān rō unī jínu jeē tu jíni rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíni de ya.

*Jeē cuángoo de jíin yá nuū Pilato
(Mr. 15.1; Lc. 23.1-2; Jn. 18.28-32)*

27

¹ Yūcuán na te ni cundijin. Te tāca sūtū cácujuhnu jíin táca tēe jéhu jeē cándacu jniñu nuū ñayuu hebreo, ni casquíjnáhan de jnūhun ndese sáha de jeē cuu Jesús. ² Te ni cajihni de ya, te cuangoo de jíin yá nuū Poncio Pilato, tēe cúu gobernador.

Jeē ni jíhi Judas

³ Yūcuán na te Judas, tēe ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni nacuāha de ocō uxī xūhun plata jeē ni níhin de nuū sutú cácujuhnu jíin núu tāca tēe jéhu. ⁴ Te ni cahān de jíin:

Cuēchi ni sáha ná jéē ní nastúu ná ñin tēe cuu de, te tú na cuēchi de.

Te máá sūtū un ní cacahān de:
¿Vé jítū ni ruhū? Cuēchi máá ró cúu. Achí de.

⁵ Te ni scáne Judas xūhún un ini templo. Te ni quenda de cuahān de, te ni scuéhne de máá de.

⁶ Te sutū cácujuhnu ni canastútú de xūhún un, te ni cacahān de:

Ma cúu chuhun yó xúhun yáha ini yejnū nuū cásocō ñayuu, chi xūhun jeē ni jéconaā jeē cúu ñn tēe cúu, achí de.

⁷ Yūcuán na te ni casándaā de jeē xūhun yúcuan cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jeē yúcuan cúu jeē ndé vijna nání ñuhun ún Lugar Ñuhun Níñī. ⁹ Te súcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caquihin de ndihóco uxī xūhun plata, te súcuan-ni cúu ñn yāhu jeē ní casáha ñayuu Israel cuenta jeē ndeé yā nuū i. ¹⁰ Te jín xúhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

*Jeē ní indichi Jesús nuū Pilato
(Mr. 15.2-5; Lc. 23.3-5; Jn. 18.33-38)*

¹¹ Te nuū ní jinūcoo de jín Jesús nuū gobernador, tēe cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájnūhun cáhán rō.

¹² Te sutū cácujuhnu jín tēe jéhu cándacu jniñu, ni cacahān de cuēchi siquī yā. Te tú na vé ni cáhán cuiñi yā.

¹³ Yūcuán na te ni cahān Pilato jín yá:

¿A tu jíní ró jéē cácahān de cuehē cuēchi siquī rō? achí de.

¹⁴ Te tu ní cáhán cuiñi yā ni ñn jnūhun jín de. Te nahán ní naa ni gobernador jeē tú na vé ni cáhán yā jín de.

Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siáá de ñn tēe íne vecāa, núu na-ni tēe cáconi ñayuu. ¹⁶ Te suu quivī un íyó ñn tēe íne vecāa, nání de Barrabás, te je ni jitē núu jnūhun jeē ni sáha de cuēchi xeēn. ¹⁷ Te nuū ní candutútú ñayuu, te ni cahān Pilato jíin i:

¿Ndé tēe cáconi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

¹⁸ Súcuan ni cahān de chi cúní de siáá de Jesús. Chi je ni jecūhun ni de jeē ní cacucuésún ni tāca sūtū un cájito de ya, te jeē yúcuan ní quijicoo jíin yá nuū de.

¹⁹ Te níní jēe néne Pilato silla nuū sándaā de jniñu, te ñasihí de ni tají ña jnūhun nuū de: Ma quíví nduu rō jíin ñáyuu siquī tēe ndaā jiñā, chi yōhyo ní siūhu jéni ruhū cuni jeē siquí de, achí ña.

²⁰ Te sutū cácujuhnu jíin táca tēe jéhu, ni cascáhán de ñayuu jeē na cácan i jeē siaá de Barrabás, te na cúu Jesús.

²¹ Yūcuán na te ni cajnūhún tucu gobernador:

Jeē uú de, ¿ndé ñn de cáconi rō jeē siaá rī? achí de.

Te ni cacahān i:

Siáá ni Barrabás, achí i.

²² Te ni cajnūhún Pilato:

Núu súcuan te ¿ndese cáconi rō jeē sáha ri jíin Jesús, tēe cúu Cristo? achí de.

Te ni cacahān ndíhi i:

Cata caa ní de jicā cruz, na cúu de, achí i.

²³ Yūcuán na te ni cahān Pilato:

¿Na cuēchi ni sáha de núu súcuan? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

²⁴ Te ni jini Pilato jeē tu cúndeyí de jíin ñáyuu, chi sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chi siquī maá ró jijnáhan ró na cóndee. Achí de.

²⁵ Te ni cacahān ndihi ñayuu:

Suu siquī maá ná jíin síquī séhe ná na cóndee cuēchi jeē cúu de, áchí i.

²⁶ Yūcuán na te ni siaá de Barrabás. Te ni ndacu de jniñu jeē na cáni tācá soldado un Jesús, jíin jéē cáta caa de ya jicā cruz.

²⁷ Yūcuán na te soldado un cuango de jíin Jesús ini palacio. Te ni cacana de ndihi jnáhan de ni candutútú nuū yā. ²⁸ Te ni caquenehen de sahma ya, te ni cachuhun de ya ñin sahma cuehé jeē cúu sahma rey. ²⁹ Te ni casáha de ñin corona iñu, ni cachuhun de xinī yā. Te ni cachihi de ndaha váha ya ñin yujnu jeē nájnūhun bastón. Te ni casácatā de nuū yā, chi ni cajecuiñī yití de, casáha de jeē chiñúhún de ya.

Nacā jeē váha rey cúu Rey ñayuu hebreo, achí de.

³⁰ Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de xinī yā. ³¹ Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máá yá. Te cuango de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíin yá, te ni cana-jnáhan de jíin ñin tēe ñuu Cirene, naní de Simón. Te ni catejníñu de tēe un jéē cóndiso de cruz yā.

³³ Te ni jinūcoo de ñin lugar nuū naní Gólgota, jeē cuní cahān Lugar Yiquí Xíní. ³⁴ Te ni cajēhe de vino jeē ni sácā

núu jíín ìn jeē uvuá jeē cóho ya. Te nuū ní jito ndee ya, te tu ní cúní yā coho ya.

³⁵ Te nuū ní cuu ni cacata caa de ya jicā cruz, te ni casáha de sorteo jeē síquí ndese nihīn ìn ìn de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo síquí ndese nihīn ìn ìn de sahma ri, achi yā, achí tutu. ³⁶ Yūcuán na te ni cacucōo de yūcuan jēē cóto de nde cuu yā. ³⁷ Te ni catee de ìn jnūhun xinī cruz yā jeē cahán na síquī ni jíhī yā: Yāha cúu Jesús, Rey ñayuu hebreo, achí.

³⁸ Te suni ni cacata caa de uū tēe cuíhná núū uū gā cruz, ìn de lado váha ya, te ìnga de lado jecó yá. ³⁹ Te ñayuu cáyāha yūcuan cáscuícó i xinī i, te cácahān neé i:

⁴⁰ Róhó chi cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz viī, achí i.

⁴¹ Te sutū cácujuhnu, jíín tēe cástéén tutu ley, jíín tēe grupo fariseo, jíín tēe jéhnú jíjnáhan de, suni súcuan ni cacahān catá de, te achí de cácahān maá de:

⁴² Núu ìnga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. ⁴³ Ni candíje de Yaā Dios, te na jnáma ya de vijna te núu cúndáhú ni yā de, chí ni cahān de jeē cúu de Sēhe ya. Achí de jíjnáhan de.

⁴⁴ Te tēe cuíhná jeē cándita caa xiin ya, suni súcuan ni cacahān neé de.

Jeē ni jíhī Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxī uū, te ni cunee ní cáhnu nde cahunī. ⁴⁶ Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷ Te sava ñayuu cáhiin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, áchí i.

⁴⁸ Te ni jinu-ni iin tēe, ni jequihin de iin cachī, te ni chundaji de nuū vinagre iyá. Te ni tee de xinī iin yujnu, te ni tee de yuhu ya jeē coho ya. ⁴⁹ Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, áchí de.

⁵⁰ Te Jesús ni cana jee ya inga jínu, te ni jihī-ni ya. ⁵¹ Te sahma ndíta caa jeē ndihyú cuarto iī ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sava toto. ⁵² Te ni cananune yaū nuū yíndūji ndīyī. Te cuehē ndīyī jeē ní cacandíje i Yaā Dios, ni canatecu i. ⁵³ Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu iī Jerusalén, te cuehē ñayuu ni cajito nuū i.

⁵⁴ Te ná ni jihī Jesús, te tēe cúu capitán jíin tēe cáhiin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

⁵⁵ Te yūcuan cáhiin cuehē ñahan, cándēhe jíca ña. Te suu ñahan un ní candiquin ña Jesús nde Galilea, vējicoo ña cájejniñu ña nuū yā. ⁵⁶ Te unī ñahan un cácuu María ñuu Magdala, jíin María naná Jacobo jíin José, jíin náná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

⁵⁷ Te nuū ní ini quiṽ́ ún, te ni quee ñn tēe cúcá, nání de José, te tēe ñuu Arimatea cúu de. Te suni tēe ni scuáha jíín Jesús cúu de. ⁵⁸ Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. ⁵⁹ Te José ni quihin de yiqui cúñu yā, te ni chusúcún de ñn sahma cuitá íyó ndoo. ⁶⁰ Te névāha de ñn yaū jeē ní caan jeē jícā ñn cava, nuū ná tu quindūji ndīyi. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de. ⁶¹ Te María ñuu Magdala, jíín inga María, cáyucú ña ichi núu nuū yíndūji ya.

Jeē ní cacondito soldado nuū yíndūji ya

⁶² Te ni cuu tācá jniñu yáha máá quiṽ́ jeē casátūhva ñayuu jeē quiji quiṽ́ ndétātú. Yūcuán na te ni cundijin maá quiṽ́ ndétātú. Te sutū cácujuhnu jíín tēe grupo fariseo ni jengoo de nuū Pilato. ⁶³ Te ni cacahān de:

Cánucūhun ni na jēe nde na técu tēe stáhú néé un te ni cahān de jeē nátecu de nuū uní quiṽ́. ⁶⁴ Núu súcuan te ndacu ní jniñu na cóto vāha tācá soldado yuhu yáú un nde núu ni yāha uní quiṽ́. Chi núu tuú te sanaa te quijicoo tēe ni cascuáha jíín de, te tava cuihná de ndīyi ún jecuāā, quingoo de jíín. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xíhna ñúhún. Achí de.

⁶⁵ Te ni cahān Pilato:

Yāha cáhīyo soldado. Cuángoo jíín de, te sácutú váha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutú de yuū jeē ndihyú yuhu yáú nuū yíndūji ya, te ni castñn nīhin de. Te ni castóo de tācá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quivī ndétātú un, te ni cundijin quivī domingo. Te María ñuu Magdala jíin inga María un, ní jecondéhe ña nuū ní yindūji Jesús. ² Yūcuán na te iin sanaa-ni te ni jnāa niñin ndasí. Chi iin ndajéhe maá Jítóho yō Yaā Dios ni cuun ya ichi ándiví, ni quee ya nuū ní yindūji Jesús. Te ni stáa ya yuū ndihyú yuhu yáú un, te ni cucōo ya siquī. ³ Te ndíndēe núū yā nájñuhun taja, te sahma ñúhun ya yaa quiyi nájñuhun yuhvā volcán. ⁴ Te soldado cándito yūcuan ní quisí i de jeē cáyūhú de cájito de ya. Te ni cacuu ndīyí de. ⁵ Te ni cahān ndajéhe jíin ndíndúú ñahan ún:

Ma yūhu ró, chi jíiní rī jeē vécondēhe ró Jesús, Yaā ni jíhī jicā cruz. ⁶ Tuá yā yāhá, chi je ni natecu yā, nájñuhun ni cahān yā. Nehen condēhe ró nuū ní cachindūji de ya. ⁷ Te yachī quingoo ró, te cachi rō nuū tée cáscuáha jíin yá jeē ní natecu yā. Te xihna gā maá yá jinū Galilea, te sáá te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhe.

⁸ Te ni quendacoo ña nuū ní yindūji ya, te yachī cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá. ⁹ Te níiní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jñuhun ní cacahān soldado

¹¹ Te níiní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu. ¹² Te sutū cácujuhnu ni candutútú de nuū táca tée jéhu cándacu jniñu, te ni

casquíjnáhan de jnūhun. Yūcuán na te ni cajēhe de cuehē xūhun núū soldado jijnáhan. ¹³ Te ni cacahān de jíin:

Cahān rō jijnáhan ró jēē tēe cáscuáha jíin de ni quiijicoo jecuáā, te ni catava cuihna ndíyi un níni cáquixī rō, achi rō. ¹⁴ Te núu na cūni gobernador jnūhun yáha, te máá rí quiscahán rī de, návāha tú nihīn rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájnūhun ni cacahān jíin de. Te nde vijna chi súcuan cácahān ñayuu hebreo nájnūhun ni cacahān soldado un.

Jeē ní tejníñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ĩn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. ¹⁷ Te nuū ní cajito de nuū yā, te ni cachiñúhún de ya. Te sava de tu cácandíje vāha de jeē maá yá cúu. ¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu ri jniñu andiví jíin ñáyiví. ¹⁹ Núu súcuan te cuángoo nuū ñáyuu tācá nación, te stéén rō jnūhun ri nuū i návāha na cándíje i. Te scuándute ró i jeē ní cacandíje i máá Tátá jíin Séhe jíin Espíritu Santo. ²⁰ Te stéén rō nuū i jeē na cuátáhú i tācá jniñu ní ndacu ri nuū rō. Te cocuhun ni rō jeē maá rí íne ri jíin ró ní cáni nde quiiví jínu ñáyiví. Achí yá. Te ni cuu. Amén.

Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)
copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 14 Jun 2022 from source files dated 13 Jun 2022

9665e546-39d0-5bd5-8b10-38916a94951f